




इलं ल्हयया

बालिनाबिसन

(सार संक्षेप)



- प्रेमहिरा तुलाधर

रवि शाक्य, इच्छाछै, यल

इलं ल्हयया

ललितविरुतर

(सार संक्षेप)

प्रेमहिरा तुलाधर



नेपालभाषा मिशन खल:

पिकाकः - नेपालभाषा मिसा खलः

जमः, यै , नेपाः

सफूया ब्याक्क भार कयादीम्ह - मय्जु केशरीतारा ताम्राकार

न्हापां - ७००

पिदंगु - ने.सं. ११२३ पोहेलागाः ३०

मू -

थाकू - हिसि अफसेट प्रिन्टर्स

जमः, यै । फोन ल्याः २२६४१६




ढेष्टा





जितः संसार खंकादीम्ह

मां हेरालानी व अबु नीलवीरसिं ताम्राकारया नापं
जीवनया लिधंसाय् न्ह्याग्गु कथं नं तिबः बियादीम्ह
दाजु पद्मवीरसिं ताम्राकारपिन्त ।



— प्रेमहिरा





नीलबीर सिंह ताम्राकार व हेरालानी ताम्राकार

बुद्धि

ने.सं. १०३० जूलाय सप्तमी

मदुगु दि


ने.सं. ११११ गुँलागा: एकादशी

बुद्धि

ने.सं. १०३५ पोहेलागा: द्वादसी

मदुगु दि

ने.सं. १०९३ पोहेलाय मिलापुन्हि



पद्मवीरसि तात्माकार

बुद्धि

नै.सं. १०६७ गुंलाश्व अष्टमी

मदुगु दि

नै.सं. ११११ सिल्लाश्व त्रियोदशी

पिथना पाखें

भाषा, साहित्य, संस्कृति, कलाया संरक्षण व नेवा: मिसा प्रतिभा व ऊर्जायात थनेगु व सशक्तिकरणया नितिं नेवा: मौलिकतायात घयेसुना न्हूकथं न्ह्यज्यां वनाच्चनागु नेपालभाषा मिसा खल:या न्याक्व:गु त:मुंज्या क्वचायेवं हे खल:या कार्यसमितिया ज: उप-प्राध्यापक प्रेमहिरा तुलाधरजुं च्वयादीगु थ्व सफू “इलं न्ह्यया “ललितविस्तर” (सार संक्षेप) पिथने दया: जिपिं साप लय्ता: ।

भी नेवा: मिस्त स:स्यू, सुं सिबें क्वमन्ह्या: तर छेंज्या व लजगालय् जक तक्थना: इग:मिग: जुयाच्चपिन्त थुजा:गु प्रतिभाया हावलासा त्वयेका भीगु भाषा, साहित्य, कला, संस्कृति व धर्मया धुकू जायेका: सकल नेवा:तय् न्हाय् तयेत ह:पा: जुइ धैगु जिमित भलसा दु ।

थ्व सफू पिथनेत ग्वाहालि यानादीपिं- च्वमि मय्जु प्रेमहिरा तुलाधर, “ललितविस्तरया सार सफूया खँय्” च्वयादीम्ह प्रा. प्रेमशान्ति तुलाधर, आर्थिक ग्वाहालि यानादीम्ह मय्जु केशरीतारा ताम्राकार व वय्क:या छेंज:पिं अले इलय् हे सफू पिथनेगु ज्याय् कम्प्युटर यानादीम्ह भक्तकृष्ण श्रेष्ठ लिसें थायेगु ज्याय् ग्वाहालि यानादीपिं हिसि अफसेट प्रिन्टर्सया सकल ज:पिन्त आपालं आपा: सुभाय् देछाना च्वना । नापं लिपालिपा नं थथे हे ग्वाहालि यानादी धैगु भलसा कयाच्वना ।

नेपालभाषा मिसा खल:या थीथी ज्याय् सकलसिनं सदां थें नुग:स्वां ह्वयेका: स्यल्ला:गु ग्वाहालि ह:पा: तिब: दया हे च्वनी धैगु विश्वास यासें सकलसित सुभाय् देछानाच्वना ।

ने.सं. १९२३ पोहेलागा: अमाइ

नेपालभाषा मिसा खल:

जम:, यैं ।

मनं खना

थुगु सफू नेपालभाषा साहित्य व नेपालय् बुद्धधर्म थकायेगु हेतुं आपालं योगदान बिया भ्नाःम्ह नेपालभाषा साहित्यया पुनर्जागरण कालया छगः थां, बुद्धधर्मया पुनरुद्धारक व नेपालभाषा साहित्यया आधुनिक गद्यया गद्यगुरु पण्डित निष्ठानन्द वज्राचार्यजुं चव्यादीगु ललितविस्तरया सार संक्षेप कथं न्ह्यब्वयागु खः । थुगु ललितविस्तर सफू शिक्षां वञ्चित राणाकालीन जनतातय्त थःके दुगु ज्ञान इनाबिइत वय्कलं अति हे दुःख सियाः थीथी ग्रन्थ अध्ययन यानाः थम्हं हे चव्याः, थःहे कलकत्ता थ्यंक भायाः, आखःया थासा हयाः, थः काय् पासा कयाः, थम्हं हे न्हिं छपाः छपाः छापये यानाः छैँखाछैँखा व पसःपसःपतिं मियाः उकिं वःगु ध्यबां मेगु पौ छापये यानादिल । थुकथं हे छापये यायां ने.सं. १०२९ निसैं पिकाकां ने.सं. १०३४ सालं पूर्वका द्यूगु सफू खः ।

थुगु सफुतिइ मीनबहादुर शाक्यजुं सम्पादन यानाः युवक बौद्ध मण्डल पाखें प्रकाशित जुयाच्चंगु निष्ठानन्दया ललितविस्तरया लिधंसाय् सारांश कथं ६६ गू परि वर्त दुध्याकागु दु । बुद्धया जीवनी व मेमेगु आपालं ग्रन्थया खँ दुध्यागु थुगु सफू भी सकस्यां ब्वनेमाःगु सफू खःसां विशेष यानाः नेपालभाषा एम.ए. ब्वनीपिनि नितिं नं तिबः जुइगु तायेका पिथनेगु कुतः यानागु खः । नापं आःतक पिदनाच्चंगु ललितविस्तर सफू पूर्वक ब्वनेत आपाः ई काइगुलिं थौया थुभनं लिमलाःगु इलय् बुद्धया जीवनी ललितविस्तर सफू म्हो इलय् हे क्वचायेक ब्वनेत आपालं ग्वाहालि जुइगुलिं नं थ्व सफू पिथनेगु आवश्यक तायेकागु खः ।

नापलाक्वपतिं ललितविस्तरया सारांश पिकाये माल धकाः हथाय् चायेका दीम्ह गुरुवर काशीनाथ तमोटजुप्रति जि आपालं आभारी । अले नेपालभाषा मिसा खलः जमः, यै पाखें थुगु सफू पिथनेगुली कुतः जूगुलिं खलःयात आपालं आपाः सुभाय् बियाचवना ।

सफू पिथनेगु इवलय् दिवंगत जिमि मां हेरालानी ताम्राकार, अबु नीलवीर

सिंह ताम्राकार व पीप्यदँया बैसय् मत्यवं मदुम्ह दाजु पद्मवीरसिं ताम्राकारया
लुमन्तिइ थुगु सफू पिकायेत तफाःगु नुगलं आर्थिक ग्वाहालि यानादीम्ह वय्कःया
जहान मय्जु केशरीतारा ताम्राकार, काय्भाजु नीरजवीरसिं ताम्राकार, म्हेयाय्पिं
मय्जु पलिना सिखाकार, मय्जु रेलिना ताम्राकार व मय्जु मिलिना ताम्राकारपिन्त
आपालं सुभाय् बियाच्चवना ।

ने.सं. ११२३ पोहेलागाः अमाइ

प्रेमहिरा तुलाधर
असं



“ललितविस्तरया सार” सफूया खंय्

प्रेमहिरा तुलाधर नेपालभाषा साहित्य ख्यःया नितिं अपरिचित व्यक्तित्व अवश्य मखु । ‘निष्ठानन्द वज्राचार्य’ व वय्कःया ‘ललितविस्तर’ सम्बन्धी इलय् ब्यलय् थीथी च्वसु च्वयेगुया नापं धर्म, भाषा, साहित्य, संस्कृति सम्बन्धी समसामयिक विषयस च्वसा न्ह्याकादीम्ह मयजु प्रेमहिरा तुलाधर थौं भीगु न्ह्यःने पवित्र बौद्ध ग्रन्थ ‘ललितविस्तरया सार’ सफू ज्वनाः दं भायादीगु दु । भीगु भाषा साहित्य ब्यलय् धर्म व साहित्यया अविभाज्य सम्बन्ध प्राचीनकालनिसें दुगु तथ्ययात लोमंके फैमखु । विभिन्न पुजा, व्रतबलय् तीर्थ व्रत महात्म्यया बाखं कनेगु, थीथी नखःचखःबलय् प्याखं क्यनेगु, अथे हे बाःपुजा आदिबलय् देवदेवीपिन्त शिलः तुतः छ्वायेगु परम्परा थौतकं नं विद्यमान हे तिति । थज्याःगु हे परम्परां यानाः नेपालभाषा साहित्यया नितिं तच्चःगु पकाः वःगु राणाशासनकालय् नं थ्व भाषाया साहित्यिक इतिहासया क्रमिकतायात अवरुद्ध यानातये माल । थथे हे धर्म व साहित्य संस्कृतियात छस्वा यानाः न्ह्यज्याकेगु ज्या यानादीम्ह छम्ह मयजु प्रेमहिरा तुलाधर नं खः । वय्कःया थ्व ‘ललितविस्तरया सार’ सफू थज्याःगु हे छगू कुतः खः । खः थौं धर्मप्रति आस्था दुपिके जुइमा वा साहित्यप्रति निष्ठा दुपिके जुइमा समय तसकं हे म्हो । थ्वहे अभावयात महसुस यानाः वय्कलं ललितविस्तर थें ज्याःगु तःहाकःगु बाखंयात संक्षेपं जक न्ह्यब्वयाः पाठकपनिगु अभाव ईया सदुपयोग यायेगु नापं अमिगु जिज्ञासा नं लंकेगु ज्या यानादिल । निष्ठानन्द वज्राचार्यया ‘ललितविस्तर’ सफुतिइ दुध्याःगु ६५ गू सर्गया नापं लिपा मीनबहादुर शाक्यजुया सम्पादनय् पिदंगु ‘ललितविस्तर’ सफुतिइ दुध्याःगु ‘निगम परिवर्त’ सर्ग नापं यानाः ६६ गू सर्गया सार संक्षेप थ्व सफुतिइ दुध्यानाच्चंगु दु । थुकथं ललितविस्तर बाखं सम्बन्धी छुं हे सर्ग त्वःमफीक, थम्हं दुग्यंक अध्ययन यानाः बाखंया सार संक्षेप जक न्ह्यब्वयाः थौया इलं मलाःपिं पाठकपिन्त अमिगु जिज्ञासा लंकेगु गुगु ज्या यानादिल प्रेमहिराया थ्व कुतः तसकं हे च्वछायेबहः जू ।

नेपाःया बौद्ध धर्मया ब्यलय् नापं नेपालभाषा साहित्यिक इतिहासय् निष्ठानन्दया ‘ललितविस्तर’ सफूया तःधंगु महत्त्व दु । नेपाःया बुद्ध धर्मय् पुनर्जागरण हःपिं मध्ये निष्ठानन्द वज्राचार्य नं छम्ह खः । बुद्धया जीवनी नापं बुद्धया अनेक शीलाचरणादि धर्म सम्बन्धी उपदेश नं दुध्याःगु, थासा आखलं थानातःगु याउँक हे न्याये दइगु, फुक्कस्यां थूगु जनभाषा, देवनागरि लिपिं च्वयातःगु ‘ललितविस्तर’ सफूया प्रकाशनं तत्कालीन समाजय् धार्मिक जागरणया नापनापं भाषिक जागरण नं हयाबिल । नां जक बौद्ध जुयाः बुद्ध धर्मया विषयस छुं मस्यूपिं, पुरोहिततय्सं छु धाल वहे जक याइपिं बौद्धतय् दथ्वी ‘ललितविस्तर’या प्रकाशनं

अतिकं प्रभावकारी भूमिका म्हितल । पुरोहितवादं ग्रस्त तत्कालीन बौद्ध धर्मय् सुधार हयेगु ज्या थ्व सफुतिं यात । बौद्ध धर्मप्रति हे छगू न्हूगु जागरण, न्हूगु दृष्टिकोण ब्वलंकल । नापं बौद्ध धर्मया थ्व सफू छँखा-छँखापतिं थ्यंके बियाः नेपालभाषाया प्रचार प्रसार यायेगु ज्या नं थ्व सफुतिं यात । तत्कालीन च्वमिपिन्त बोलिचालिया भाषा छचलाः सफू च्वयेगु लँपु क्यनाबिल । थुकथं 'बाइबल'या अंग्रेजी अनुवादं अंग्रेजी भाषाया प्रचार प्रसारय् गुगु महत्त्वपूर्ण भूमिका म्हितल नेपालभाषा साहित्यया प्रचार प्रसारय् नं उगु इलय् थ्व 'ललितविस्तर' सफुतिं अज्याःगु हे भूमिका म्हितगु दु । थुकथं नेपाःया धर्म साहित्य सम्बन्धी छगू महत्त्वपूर्ण सफूया सारसंक्षेप न्ह्यब्वयाः प्रेमहिरां धर्म, साहित्य नितांया सेवा यानादीगु दु ।

'ललितविस्तरया सार' सफू प्रेमहिराजुं थः पूज्य मां अबु नापं थः स्नेहमयी दाजुयात दछ्छा स्वरूप पिकयादीगु खः । मां अबुपिन्त मन्हिचरि ज्वनाः थःपिनिगु श्रद्धा भक्ति स्वरूप ख्वाः स्वःवनेगु, मदयेधुंकाः उमिगु नामय् विभिन्न तीर्थय् वनाः श्राद्ध यायेगु, निसलाः छायेगु गुगु भीगु पुलांगु संस्कार खः व स्वयाः नं तःजिगु ज्या अमिगु नामय् सफू पिकयाः अमित न्ह्याबलें अमर यानातयेगु खः धैगु खँया छगू नमूना थ्व 'ललितविस्तरया सार' सफू नं खः । उकिं थ्व सफूया च्वमि प्रेमहिरा नापं सफू पिकायेत आर्थिक ग्वाहालि यानादीम्ह वय्कःया पीभत केशरीतारा ताम्राकार अवश्य नं छगू न्हूगु संस्कार न्ह्याकेगुलिइ तिबः बियादीपिं खः ।

'ललितविस्तर' छगू धर्मया सफू, छगू नेपालभाषाया सफू जक मजुसे पठन-पाठनय् दुध्याःगु सफू नं खः । अथे हे प्रेमहिरा तुलाधर छम्ह न्ह्याय्, छम्ह केहें जक मजुसे नेपालभाषाया छम्ह प्राध्यापिका नं खः । थथे पठन-पाठनय् दुध्याःगु सफूयात कयाः उकिया सार संक्षेप न्ह्यब्वयाः विद्यार्थीपिन्त गुगु ग्वाहालि यानादिल थ्व वय्कःया थःगु पेशाप्रति निष्ठा परायणताया दसि नं खः । थुकथं प्रेमहिरा थःगु पेशा, थः मां-अबु-दाजुप्रति निष्ठावान जुयाः थःगु कर्म यानादीगु दुसा थः मातृभाषा नेपालभाषाया नापं बौद्ध धर्म सम्बन्धी सफू च्वयाः धर्म नं यानादीगु दु । उकिं थ्व 'ललितविस्तरया सार' सफू प्रेमहिराया धर्म नापं कर्मया नं सफू खः । आशा दु वय्कःथें ज्याःम्ह थःगु कर्मप्रति सचेत, धर्मप्रति निष्ठावानम्ह मयजुपाखें थथे हे मेमेगु नं सफू अवश्य पिदनी । तर छता सुभाव वय्कःयात बीमास्ति वः, वय्कःथें ज्याःम्ह च्वसा न्ह्याःम्ह मयजुपाखें पिदनीगु मेगु सफुतिइ फयांफचि थःगु हे भाषा शैली छचलेगु जुइमा, नापं वय्कलं अध्ययन अनुसन्धान यानादीगु निष्ठानन्द व 'ललितविस्तर' सम्बन्धी आपालं खँत याकनं हे प्रकाशनय् वयेमा थ्वहे वय्कःयात इनाप नापं भिंतुना नं ।

प्रेमशान्ति तुलाधर

ने.सं. १९२३, पोहेलागाः द्वादशी

ज्ञानेश्वर

न्त्यखं

नेपालभाषा साहित्यय् पुनर्जागरण कालया प्यंगः थामं नां दनाः चर्चा जूपिं प्यम्ह साहित्यकारपिं मध्ये छगं: घिसिलाःगु थां गद्यगुरु पण्डित निष्ठानन्द वज्राचार्य खः । नेपालभाषा साहित्यय् छुं ग्यसुलाःगु साहित्य मदुगु इलय् वय्कःपिसं नेपालभाषा व वया साहित्यय् ह्यूपा हयाबिल । गद्यया न्हूगु जग स्वनाबिल । थ्व पुनर्जागरण कालय् प्यंगः थांया थःथःगु कुतलं दकलय् न्हापां थासा आखलं ने.सं. १०२९ स निष्ठानन्द वज्राचार्यजुं देवनागरी लिपि छचलाः अष्ट सहस्रिका प्रज्ञापारमिता देवीया नीछपु श्लोकया अनुवाद पिकया दिल । थुकथं निष्ठानन्दजुं देवनागरी लिपिं थासा आखलय् सफू पिकयादीगु व्यावहारिकतां प्रेरित व भाषाया प्रचार व प्रसारया दृष्टिकोणं छगू न्हापांगु पलाः खः । डा. कमलप्रकाश मल्लजुया धापूकथं “वय्कःया थ्व पलाः हे भीगु भाषा व साहित्यया पुनर्जागरणया ब्याहांचुलि सः खः ।” थ्व सफुतिं हे भीगु भाषं थाना सफूया जग पलिस्था जुल ।

थ्वहे इलय् ने.सं. १०३४ बछलागा १३ शुक्रबाःखुन्हु ‘ललितविस्तर’ सफू पूर्वक थाना पिकया दिल । वय्कलं ‘ललितविस्तर’ थें ज्याःगु बृहत् रचना पिकयादीगु धैगु भाषानुराग व धर्म प्रचारया उच्च आदर्श स्वयाः नेपालभाषा साहित्यय् गद्य शैलीया सृजनाय् वय्कःया महान देन खः । बुद्ध धर्मया जः जुयाः लँ क्यनाच्चंगु थ्व सफू नेपालभाषाया गद्य विकासया दृष्टिं नं उलि हे महत्त्वपूर्ण जू ।

भीगु भाषाय् न्हिन्हिया खँल्हाबल्हा व्यवहारया भाय् न्हापा स्वयाः हिले धुंकाःनं च्वयेगु ज्याय् पुलांगु भाय् हे जुयाच्चंगुयात निष्ठानन्दजुं भाषाया प्रचार व प्रसारया लागिं च्वयेगु ज्याय् नं खँल्हाबल्हाया भाय् छचले माःगु आवश्यकताय् खँल्हायेगु भाषां हे च्वयेगु यानाः थासा आखलं सफू पिकयाः भीगु भाषाय् विशेष कथं गद्यय् जीवन दान बियादिल ।

थुकथं ‘ललितविस्तर’ सफू च्वयाः वय्कलं नेपालभाषाय् न्हूगु गद्यया शुरु यानादिल । अले नवायेगु कथं हे च्वयेगु थ्व इलनिसें वा थ्व सफुतिनिसें शुरु जूगुलिं

ललितविस्तरया भाषा नेपालभाषा गद्य साहित्यया प्राक्प्रतिमान खः । थौकन्हय् थ्व सफूया भाषा पुलां जुइ धुकूसां थ्व सफुतिं न्हापाया पुलांगु गद्ययात त्वाःथलाः न्हूगु हे गद्य शुरु यात । थुकथं वय्कलं आधुनिक नेपालभाषा गद्यया निर्माण यायेगु ज्याय् 'ललितविस्तर' सफू नेपालभाषां च्वयाः थासा आखलं पिथंगु महत्त्वपूर्णगु खँ जुल । थुकिं हे यानाः नेपालभाषा व साहित्य थौकन्हय्या अवस्थाय् तक ध्यंकेत तःधंगु तिबः जुल । थुकथं नेपालभाषा साहित्यय् वय्कःया आधुनिक गद्य निर्माण थें ज्याःगु देनयात कयाः हे स्व. चित्तधर हृदयजुं वय्कःयात गद्यगुरु धकाः सकसितं म्हसीका बिल । डा. कमलप्रकाश मल्लजुं नेपालभाषा साहित्यय् आधुनिक गद्यया शुरु याःम्ह निष्ठानन्द वज्राचार्य खः धकाः मूसः निबन्धया भूमिकाय् न्ह्यथनादीगु दु । थुकथं भाषानुराग व धर्म प्रचारया उद्देश्यं जक च्वयेगु यानादीसां वय्कः मुक्कं साहित्यकार मजुसे हे साहित्यिक देन दुम्ह साहित्यिक व्यक्तित्व जू वल ।

निष्ठानन्द वज्राचार्य नेपालभाषा साहित्यया प्यंगः थांया छगः थां खःसा वय्कःया ललितविस्तरं नेपालभाषा गद्य साहित्यय् व नेपालया महायान बौद्ध धर्मय् नं ऐतिहासिक महत्त्व कथं थाय् काःगु दु । उकिं वय्कःयात नेपाःया महायान बौद्ध धर्मया पुनरुद्धारक धकाः नं नालातःगु दु । नवधर्म वा नवबौद्ध महावैपुल्यया नामं नां जाःगु गुंगू महायान बौद्ध ग्रन्थया पुचलय् ललितविस्तर नं छगू खः । थ्वहे बुद्धया पूर्वक जीवनी दुगु ललितविस्तर निष्ठानन्द वज्राचार्यजुं च्वयादिल । थुकिं यानाः बुद्ध धर्मप्रति जनताया श्रद्धा वनाः धर्मया प्रचार जुल । थीथी विषयया अवदान, धारणी, मृत्यु संस्कार, संसार सृष्टि आदि खँ दुध्याकाः भद्रकल्पावदान, निर्वाण सूत्र, स्वयम्भू पुराण, नेपाल महात्म्य, अशोकावदान, रत्नमालावदान, अष्टसहस्रिका प्रज्ञापारमिता आदिया सार बाखं नं दुध्याकातःगु थुगु ग्रन्थं नेपालय् बुद्ध धर्मया पुनर्जागरण हयेत तिबः जुल ।

नेपालभाषा साहित्यय् साहित्यिक देन दुम्ह वय्कः नेपालभाषा साहित्यय् छम्ह प्रेरणास्पद व्यक्ति खः । नेपालभाषा साहित्यया न्हाय्कं जुयाच्चंगु चित्तधर हृदयजुया 'सुगत सौरभ' महाकाव्य सृजना यायेगुलिइ ललितविस्तर सफूया देन दु । ने.सं. १०३४ निसें १०६८ दँया दुने दँय्दसं गुंलां ललितविस्तर बाखं न्यनेगु ज्यां वय्कःयात सुगत सौरभ महाकाव्यया कथानक ल्ययेगुली प्रेरणा जूवंगु दु ।

'ललितविस्तर' सुफुतिं बौद्ध ऋषि महाप्रज्ञा नानीकाजि श्रेष्ठ तिनिबलय् चिनाखं च्वयेगु विषयवस्तु चूलाकाः बौद्ध धर्मय् धेचुइक वैराग्य पिज्वयेका ब्यूगु खः धकाः वसपोलया 'आत्मकथा' या 'वैराग्यया पुसा' अध्यायलय् धयातःगु दु ।

थुकथं थ्व ललितविस्तर सफुतिं नानीकाजि बौद्ध ऋषि महाप्रज्ञा जुइत भूमिका म्हितूगु न्ह्यथने बहः जू ।

थ्वहे 'ललितविस्तर' ग्रन्थया आधारय् यलया ॐकुली वर्ण महाविहारया शाक्यपिसं ने.सं. १०४४ स सर्वार्थसिद्धया नाटक दयेकाः न्हयन्हु-न्हय्चा तक प्याखं हुइकल । थुकिं अबलय्या जनतातय्त बोध यायेगु कुतःलं भगवान बुद्धया धर्म तसकं प्रचार जुयाः भोजपुरया टक्सारय्तक नं सर्वार्थसिद्ध प्याखं थ्वहे सफूया आधारय् क्यन । थ्वहे प्याखंया छम्ह प्याखंम्ब उपासक प्रज्ञा बिमल शाक्य (सुबोधानन्द महास्थविर) स्थविरवादी भिक्षु जुइत प्रेरणा बिल ।

अले येंय् मञ्जुश्री पर्वस्थानय् हर्षरत्न गुर्जुपाखें अष्टमीव्रत धलं दंकीबलय् लक्ष्मीनानी थ्वहे 'ललितविस्तर' या बाखं न्यंकीगु जुयाच्वन ।

थुकथं नेपालभाषा साहित्य ख्यलय् निष्ठानन्द वज्राचार्य व ललितविस्तर सफूया तःधंगु महत्त्व दु । उकिं वय्कः नेपालभाषा साहित्य ख्यलं गुबलें ल्वःमंके मफैकथंयाम्ह छम्ह ऐतिहासिक साहित्यिक व्यक्ति खः । भीसं थ्वय्कःयात हनेगु हे नेपालभाषा साहित्यय् थ्वय्कःया देनयात लुमंकेगु खः । थौं नं भीसं थ्वय्कःया ललितविस्तरया बारे सीकेगु, मालेगु ज्या यानाः थ्वय्कःया देनयात कदर यासे अभ् अप्पो वालास्वयेगु भीगु कर्तव्य खः ।



मूखँ कुला ललितविस्तरया

१. निदान परिवर्त

छन्हु भगवान् बुद्ध श्रावस्ती नगरया जेतवन विहारय् बिज्याना धर्म देशना याना बिज्याःगु खं तुरुन्त हे स्वर्ग व पातालय् प्रख्यात जुल । कन्हय्कुन्हु भगवान् बुद्ध सकलें मुनाच्चंथाय् भिक्षुपिन्त सःता थौ चान्हय् कायिका धैगु भुवनया देवपुत्रपिं बयाः न्हापा जुयावीपिं बुद्धपिसं मनूतय्त् हित सुख यायेत कना बिज्याःगु ललितविस्तर धर्म कथा कना बिज्याहुँ धकाः धया बिज्यात । ध्व खँ न्यनाः सकस्यां बोधिसत्वपिं, श्रावक भिक्षुपिं व यक्को देवपुत्रपिसं प्रशंसा याना बिज्याःगु ललितविस्तर जमित कना बिज्याहुँ धकाः बिन्ति यात । थुकथं सकसिगुं बिन्ति न्यना सकसितं हित व सुख जुइगु उपदेश बिइ धकाः मती तयाः भगवान् बुद्धं जवाः मब्युसे सुंक च्वनाबिज्यात ।

२. समुत्साह परिवर्त

अले भगवान् बुद्धं भिक्षुपिन्त ध्व शुद्धगु ललितविस्तर सूत्रया नं दुर्लभगु महावैपुल्य सूत्र कना बिज्यात । भगवान् बुद्ध न्हापान्हापाया जन्मय् दश पारमिता पुरेयानाः उद्धार हृदययाम्ह धर्म मेघ जुया बिज्यात । तुषिता भुवनय् बिज्याना च्वंम्ह श्वेतकेतु बोधिसत्व जगत हितया नितिं पृथ्वीलय् क्वहां बिज्यायेत तयार जुया बिज्याःम्ह खः । कलियुगय् मनूतय्सं धर्मकर्म मयासैं पाप यानाच्वंगुलिं थिमित उद्धार यायेमाल धकाः चतुर्मुख ब्रम्हां बिन्ति याःगुलिं बोधिसत्वं जगत उद्धार यायेत श्वेतकेतु बोधिसत्व जुयाः धर्म मेघ प्रकट जुयाः सकसिनं पुजा प्रशंसा याकाः तुषिता भुवनय् बिज्याना देवपुत्रपिन्त उपदेश बिया बिज्यात । थिमि राग, द्वेष, मोह छुं महु । छन्हु अप्सरातय्सं श्वेतकेतु बोधिसत्वयात याकनं बुद्ध जन्म काःबिज्याहुँ, याकनं जगत उद्धार यानाः तथागत पद लाना बिज्याहुँ धकाः भेरी पुयाः च्वयेकल ।

३. कुलशुद्धि परिवर्त

अप्सरातयसं भेरी पुयाः च्वयेकूगुलिं श्वेतकेतु बोधिसत्त्वं पृथ्वील्य जन्म जूवने धैगु मती तयाः तुषिता भुवनय् देवपुत्रपिं मुंकाः धर्म सभा याना बिज्यात । अले श्वेतकेतु बोधिसत्त्व जन्म जू बिज्याइगु ज्ञज्ञ१२ दँ न्ह्यो तुषिता भुवनं देवपुत्रपिं जम्बुद्वीपय् क्वहां बिज्यानाः १२ दँ लिपा ३२ ता लक्षणं युक्त, ८४ ता व्यञ्जनं पूर्ण जूम्ह, गृहस्थीइ च्वंसा चक्रवर्ती जुजु जुइम्ह जन्म जुइ धकाः ब्राम्हणपिन्त श्वेतकेतु बोधिसत्त्वयागु समाचार न्यंकल । वसपोलं चतुरंगबलं संयुक्त जुयाः सप्तरत्न लाभ यानाः चक्ररत्न माला बिज्याई नापं कुकर्म यायेगु त्वःति धकाः पूर्व दिशाया च्वंपिं जुजुपिन्त उपदेश बिया बिज्याइ । अले असत्य पाप कर्म यायेमते धर्म या धकाः उपदेश बियाः पूर्व समुद्र तरे याना दक्षिण दिशाया च्वंपिं जुजुपिन्त धर्म उपदेश बियाः पश्चिम दिशाया बिज्यानाः पश्चिम दिशाया समुद्र पारयानाः चक्ररत्न कयाः चतुरंगबलं सहित यानाः आकाश मार्गं थःगु राजधानिइ लिहां बिज्याइ । अले तुषिता भुवनय् बिज्यानाच्च्वंम्ह बोधिसत्त्वं मर्त्यलोकय् जन्म जूबिज्याय्त्त काल, द्वीप, देश, कुल आदि प्यंगू प्रकारया ध्यानालोक बिचाः याना बिज्यात ।

४. धर्मालोक मुख परिवर्त

श्वेतकेतु बोधिसत्त्वं जम्बुद्वीपय् जन्म जू बिज्याये धकाः धर्मोच्चय प्राशादं क्वहां बिज्यानाः उच्चध्वज धैगु बिमानय् थहां बिज्यानाः देवपुत्रपिन्त निमन्त्रणा याना बिज्यात । अले श्वेतकेतु बोधिसत्त्वं महामण्डलया बिचय्च्वंगु रत्नयागु सिंहासनय् बिज्यानाः धर्मालोक मुख धैगु १०८ गू धर्म मार्ग कना बिज्यात । थ्व धर्मालोक धर्म मार्ग न्यना ८८,००० देवपुत्रपिनि मती अनुत्तराया सम्यक् संबोधि ज्ञान लायेगु बाचा यानाः ३२,००० देवपुत्रपिनि न्हापायागु कर्मफलं उत्पत्ति जूगु धर्मय् सहनशीलता प्राप्त जुयाः ३६,००० देवपुत्रपिनि राग द्वेषरहितगु निर्मलगु धर्मय् धर्मचक्षु प्राप्त जुयाः अन दक्को देवपुत्रपिनि मन प्रसन्न जुयाच्च्वन । हानं श्वेतकेतु बोधिसत्त्वं देवपुत्रपिन्त संसारय् नित्य वस्तु छुं मदु धैगु सीका मैत्री चित्त यानाः परोपकारी जुयाः बुद्ध धर्म संघया खँ न्यँ धकाः आज्ञा बिया बिज्यात ।

५. प्रचलित परिवर्त

थुकथं श्वेतकेतु बोधिसत्त्वं फुक्क देवपुत्रपिन्त उपदेश बिया बिज्याये धुंकाः जि जम्बुद्वीपय् जन्म जू वनेत्यल, आः छिमित मैत्री बोधिसत्त्वं उपदेश बी धकाः मैत्री बोधिसत्त्वयात अभिषेक बियाः जिं लिपा अनुत्तर सम्यक् संबोधि लाइम्ह छ

जुइ धका: बोधिसत्त्वयात आशिर्वाद बिया बिज्यात । अले उग्रतेज धैम्ह देवपुत्रं शास्त्रय् च्वयात:थें गर्भं जू बिज्याइ धका: बित्ति या: थें मत्ताम्ह किसि जुया: गर्भय् च्वं बिज्याइ धका: कना बिज्यात । श्वेतकेतु बोधिसत्त्व गर्भय् च्वं बिज्याइखुन्हु महारानी मायादेवीया नं अष्टमी व्रत दनेगु इच्छा जुया: शुद्ध यांना: अष्टमी व्रत आरम्भ यांना बिज्यात । उखे फुक्क भुवनया देवतापिनि श्वेतकेतु बोधिसत्त्व ताप बाय् मालीन धका: मेगु ज्या त्व:ता थनिनिसे वसपोलं निर्वाण पद मलातलें भीसं पुजाभाव या:वने धका: सल्ला यांनाच्वन । अले श्वेतकेतु बोधिसत्त्व गर्भय् च्वं बिज्यायेत देव, नाग, असुर, यक्ष, राक्षस, गरुड, किन्नर आदिपिसं चा:हुइका पुजा याका: धर्मोच्चय धैगु बिमान न्ह्याका: जम्बुद्वीपय् क्वत हल ।

६. गर्भावक्रान्ति परिवर्त

बोधिसत्त्व तुषिता भुवनं खुपु वा दुम्ह छ्चो छ्ग: जक ह्याउँसे च्वना: म्ह तुइसे च्वंम्ह किसिया रूप कया: क्वहां बिज्याना: मायादेवीया जवगु न्हाय्पं प्वालं द्वां बिज्याना: व्यक्वय् रत्नव्यूह धैगु गर्भमल छुं मदुगु मचाछैय् द्वां बिज्याना: गर्भवास यांना बिज्यात । वनाच्वंम्ह महामायादेवीया नं खुपु वा दुम्ह छ्चो छ्ग: जक ह्याउँसे च्वना: म्ह छ्मं तुइसे च्वंम्ह किसि छ्मं न्हाय्पं प्वालं द्वां वना: गर्भवास यात धका: म्हनाच्वन । थज्या:गु आश्चर्यगु म्हनाच्वगुलिं कन्हय्कुन्हु मायादेवी थम्हं म्हगसय् खनागु खँ शुद्धोदनं महाराजयात बित्ति यात । अले महाराजां तुरुन्त हे स्वप्न परीक्षा स्यूपिं ब्राम्हणपिन्त सतके छूवया: ब्राम्हणपिं ध्येनेवं मायादेवीया अपूर्व कथं म्हनाच्वंगु खँ कनाबिज्या:गु न्यना: ब्राम्हणपिसं स्वप्न परीक्षा स्वया: छलपोलं म्हगसे खंगु भिंगु हे ख:, राजकुलय् त:धंम्ह पुरुष ज्वीम्ह काय्मचा जन्म जुइन । तर ध्व मचां राज्य त्याग यांना: भगवान् बुद्ध जुया: लोक रक्षा याइम्ह जुइ धका: बित्ति या:गु न्यना: महाराज शुद्धोदन खुसि जुया: ब्राम्हणपिन्त भोजन याका: प्रसाद बियाछूवल ।

मांया गर्भय् च्वनाबिज्या:म्ह बोधिसत्त्वं मायादेवीया जवगु व्यक्वय् पद्मासन यांना: न्हाय्कनय् दुने च्वंगु तस्वीर स्वये थें पिने खने दयाच्वन । थुबले अन बिज्यानाच्वपिं देवतापिसं बोधिसत्त्व दर्शन यांना: मलमुत्र आदि गर्भमल छुं मखना: आश्चर्य चायाच्वन । मायादेवीया थ:गु गर्भय् बिज्यानाच्वंम्ह काय्यागु छ्वा: स्वयेगु इच्छा जुया: स्व:बलय् तेजवानम्ह काय्या छ्वा: खना: खुसि जुयाबिज्यात । गर्भवास जुसानिसें मायादेवीया मनय् राग, द्वेष, मोह छुं मव: ।

७. जन्म परिवर्त

बोधिसत्त्व गर्भवास यानाबिज्याःगु भिला दसेलि जन्म जुइत शुद्धोदन महाराजया दरबारय् स्वीनिता अपूर्व लक्षण खने दयावल । छन्हु मायादेवी चाःह्यूवने मास्ती बल धायेवं शुद्धोदन महाराजां मन्त्रीयात माःगु तयार याके बिल । लुम्बिनी वनय् ध्यंसेलि मायादेवी रथं क्वहाबिज्यानाः वँवं वनय् दुने पिलासिमा क्वय् आराम कयाबिज्यात । जन्म जुइगु ई जुसेलि मायादेवी जवगु ल्हाः थछूवयाः सिमाकचा ज्वनाः आकाशय् स्वयाः वाका तयेवं मायादेवीया व्यक्वं बोधिसत्त्वया जन्म जुल । फयाच्चंषिं ब्रम्हा व इन्द्र निम्हस्यां धामय् यायेमफयाः बोधिसत्त्व बैय् त्वफित । अले पृथ्वी तज्यानाः पलेस्वां उत्पत्ति जुयाः पलेस्वांया द्योने लात । बोधिसत्त्व पलेस्वांया द्योने बिज्यानाः पूर्व, पश्चिम, उत्तर, दक्षिण प्यंगू दिशाय् स्वयाः न्हय्पलाः न्हय्पलाः छिनाः धर्म यायेगुलिइ जि न्हापांम्ह जुइ, लोके श्रेष्ठम्ह जि हे खः, सुनानं अन्त काये मफुम्ह अनन्त पुरुष जि हे खः, दैव मनुष्यपिं सकसिनं पुजा यायेगुलिइ योग्यम्ह जि हे जुइ धकाः आज्ञा दयेका बिज्यात ।

बोधिसत्त्व जन्म जुयाः खुन्हु दुखुन्हु कुलाचार कथं व्यंकाः मचाया नां सर्वार्थसिद्ध कुमार धकाः तल । न्हय्न्हु दुखुन्हु मायादेवी अकस्मातं प्राण त्याग यानाः स्वर्गवास जुल । उकिं राजकुमारयात गौतमी महारानी पालन-पोषण याना बिज्यात । राजकुमारयात लुम्बिनी कपिलवस्तु नगरय् दुत यंकूबलय् जनताया इच्छा कथं छैं छैं दुत यंकाः पुजा फयाववं प्यला फुना न्याला दसेलि राजकुलय् ध्यंका बिज्याकल । राजकुमार लाय्कुली बिज्याकूगु खँ असित ऋषिं सिइवं थः भिंचा नरदत्तयात नं ब्वनाः पाजुभिंचा निम्हं लाय्कुली बिज्यानाः शुद्धोदन महाराजा नापलानाः बोधिसत्त्वया पालि भ्वपुयाः मचा कयाः चिन्तना यानाः ख्वयाहल । शुद्धोदन महाराजां छाय् ख्वयाबिज्याना ? धकाः न्यना बिज्यायेवं ऋषिं थ्व मचा राज्यय् च्वन धाःसा चक्रवर्ती जुजु जुइ, गृह त्याग यात धाःसा तथागत जुयाः बोधिज्ञान लानाः धर्मचक्र प्रवर्तन यानाबिज्याइ । जि बुढा जुल ध्वसपोलं ज्ञान लाना बिज्याइबलय् जिं खनी मखुत । उकिं जितः नुगः मछिन धकाः ऋषिं कनाबिज्याःगु न्यनाः शुद्धोदन महाराजा खुसि जुयाः दनाः पुत्र बोधिसत्त्वयात पालि भ्वपुयाः नमस्कार याना बिज्यात । असित ऋषिं थः भिंचा नरदत्तयात ध्वसपोलं बुद्ध पद लाना बिज्यायेवं ध्वसपोलया शरणय् वनाः भिक्षु जुयाः ध्वसपोलया ज्ञानय् च्वंसा मोक्ष फल लाइ धकाः आज्ञा दयेका बोधिसत्त्वया पालि भ्वपुया बिदा जुयाबिज्यात ।

८. देवकुलोपनयन परिवर्त

सिद्धार्थकुमार प्यला फुनाः न्याला दसेलि कुलाचार कथं कुलदेवता दर्शन याकेत फुक्क ठीक याके बियाः देशया फुक्क मनूत मुंकाः मङ्गल यानाः राजकुमार यात रथय् तयाः जात्रा यानाः देवकुलय् बिज्याकल । बोधिसत्त्वं देवकुलय् पलाः तयेमात्रं चैतन्य मदुपि देवतापिं सकलें दनाः वसपोलया पालि भवपुया नमस्कार यानाच्चन । थज्याःगु अद्भूत दृष्य खनाः शुद्धोदन महाराजा व मेमेपिं सकलें आश्चर्य चायाः राजकुमारयात देवकुलं राजकुलय् लित हयाः अन्तपुरय् बिज्याकल ।

९. आभरण परिवर्त

छन्हु शुद्धोदन महाराजाया पुरोहित उदायन ब्राम्हणं जुजुयात राजकुमारया जंको यायेगु ई जुल धकाः बित्ति यासेलि शुद्धोदन महाराजां जंकोयात माःगु ज्वलं ताःलाके बियाः माःमाःगु आभरण दयेके बिल । जंकोखुन्हु विवल व्यूह धैगु क्यबय् यंका गौतमी महारानीयागु मुलय् तयाः यायेमाःगु कर्म क्रिया यात । ध्व धुंकाः भद्रिक धैम्ह शाक्य जुजु बयाः कुमारयात तिसां तिइकल । तर बोधिसत्त्वया तेजं फुक्क तिसा बलुसे च्चनावंगुलिं सकलें अजू चाल । थुबले हे व क्यबया देवता सुन्दरी रूप जुयाः महाजनया न्ह्योने वनाः लुं द्रुचिना ब्यूसां लुंया शोभा पिहां वइमखु, वसपोलया तेजं तिसा वसः फुक्क विशोभा जुल धकाः आज्ञा दयेका बिज्यात ।

१०. लिपिशाला सन्दर्शन परिवर्त

बोधिसत्त्व न्यादें फुनाः खुदै क्यसेलि भिद्वःम्ह मचात नापं पाठशालाय् यंकाः शुद्धोदन महाराजां गुरु विश्वामित्रयात राजकुमार व भिद्वः मस्त लःल्हानाः लिहां बिज्यात । राजकुमार गुरु विश्वामित्रया न्ह्योने वनाः संसारय् छ्वीप्यता लिपि दुगुमध्यय् न्हापां जितः छु स्यनाबिज्याये त्यना ? धकाः न्यनाबिज्यायेवं विश्वामित्र मुसुहुं न्हिलाः ध्वसपोल समान विद्या सःम्ह मेपिं सुं मदु धकाः मती तयाः थज्याम्हसिया अनुभावं लिपि विद्या स्यने धकाः मती तयाः विश्वामित्रं मा आखः भिनिगः, बा आखः स्वीप्यंगः च्वयाः ब्वंका बिज्यात । थुकथं बोधिसत्त्वया अनुभावं छगः छगः आखःयागु विशुद्धि शब्द पिहां वयाः कोष, काव्य, अलङ्कार आदि नाना शास्त्र सयाः धर्म संवाद याइपिं जुयाः सकलें ज्ञानं पुरे जुल । थुकथं राजकुमार प्रमुख भिद्वः कुमारपिं फुक्क शास्त्रं पारंगत जुसेलि जुजु शुद्धोदन भिद्वः कुमारपिं सहित राजकुमारयात न्ह्यःन्ह्यः तयाः मङ्गल उत्सव यानाः राजकुलय् दुत बिज्याकल ।

११. कृषिग्राम परिवर्त

सर्वार्थसिद्ध कुमार भिन्त्यादैँ भिंखुदैँ दुबलय् ग्रीष्म ऋतु शुरु जुइवं छन्हु मन्त्रीया काय् आदि सकलें मुनाः मांबौपिके मन्यंसे न्हिनय् कृषिग्रामय् बिज्यात । अन कृषकतय् चःति स्वःस्वः वयेक ज्या यानाच्चंगु खनाः राजकुमारया मन विरक्त जुयाः वंवं तापाक्क थ्यंसेलि पासापिं छखे लाका सुनानं मखंक जम्बुवनया भूमिसमाया क्वय् च्वनाः एकचित्त यानाः छु याःसा जगत उद्धार याये फै धकाः समाधि याना बिज्यात । उखे दरबारय् शुद्धोदन महाराजां राजकुमार मखना दक्कोभनं माला बिज्यातं नं मदया राजपुरुषपिं छूवयाः भिगू दिशाय् नं खबर याकेछूवल । पासापिनि नं राजकुमार मखना उखेंथुखें माःवंबलय् जम्बुवनय् भूमिसमाया क्वय् ध्यानयाना बिज्यानाच्चंगु खनाः राजकुलय् खबर ध्यंकल । अले जुजु शुद्धोदनं मन्त्री, भारदार, सकलें मुनाः जम्बुवनय् बिज्यानाः लहाः बित्ति यानाः कुमारया पालि भवपुयाः बारम्बार नमस्कार यात । लिपा समाधि योग यायेधुंकाः बोधिसत्वं मिखा कनास्वःबलय् थः बौ शुद्धोदन महाराजा बिज्यानाच्चंगु खनाः कृषकतय्सं दुःख सीम्वायेक धाःधाःपिन्त धाःधाःगु ब्यू धकाः आज्ञा बियाः सकलें मुंकाः राजकुलय् बिज्यात ।

१२. शिल्प सन्दर्शन परिवर्त

राजकुमार ल्याय्मह जुसेलि छैं त्वःता पिहां वनी धकाः शुद्धोदन महाराजां याकनं बिहाः यानाबी माल धकाः मती तयाः राजकुमारयाके न्यनाः राजकुमारं आज्ञा जूथें ज्याःमह कन्या मालाबिज्याहुँ धकाः ब्राम्हणपिन्त पत्र लःल्हानाबिज्यात । ब्राम्हणपिसं थज्याःगु गुणं पूर्ण जूपिं कन्यात मामां छन्हु दण्डपाणि शाक्य जुजुया छैंय् वनाः स्वःवंबलय् थ्व गुणं पूर्णमह कन्या खनाः ब्राम्हणपिसं कन्या लुल धकाः जुजुयात खबर ब्यूवल । अथेसां कुमारया गुम्ह यः स्वयेत शुद्धोदन जुजुया आज्ञा थें छन्हु दर्शनशालाय् निमन्त्रणा यायेवं मेमेपिं कन्यात थें यशोधरा नं पासापिं तापं अन छखे च्वनाच्वन । दक्कोसितं अशोकभाण्ड आदि, म्हितेगु वस्तु बीधुंकाः यशोधराया पाः वःबलय् बिइगु छुं मदुगुलिं राजकुमारं मुसुमुसु न्हिलाः लहाःतय् अंगू तयाबिल । यशोधरा नं अंगू कयाः छैंय् लिहांवन । यशोधरा व राजकुमार ताउत परस्पर खँ ल्हानाच्वन धैगु खँ जुजुं सियाः ब्राम्हणपिं छूवयाः दण्डपाणि जुजुयाथाय् यशोधरा कन्या पवंके छूवल । दण्डपाणि जुजुं शिल्प विद्या सःम्हसित जक कन्यादान बी धयाहःथें जिं शिल्पविद्या क्यने धकाः राजकुमारं आज्ञा दयेका बिज्यात । अले थनिं न्हय्न्हुत्वाः राजकुमारं शिल्प विद्या क्यनी शिल्पकार्य सःपिं रंगभूमिइ वा धकाः

नगरय् उर्दि व्युसैलि न्हय्नु दुखुन्हु फुक्क राजकुमारपिं राजकुलय् मुनाच्वन ।
दण्डपाणि जुजु नं यशोधरायात ब्वनाः सुनां फुक्क विद्या त्याकी वयात थः म्हायाय्
कन्यादान बी धकाः प्रतिज्ञा यानाच्वन । ख्वीप्यता विद्याय्सं मेमेपिं कुमारपिं नापं
ज्वरे जुयाः सिद्धार्थकुमारं फुक्कसितं त्याकल । अले दण्डपाणि जुजुं थः म्हायाय्
यशोधराया ल्हाः ज्वनाः सर्वार्थसिद्ध कुमारया न्ह्यःने वनाः कन्यादान बिल ।
शुद्धोदन महाराजा सहित मन्त्री, भारदार, दाजुकिजा, महाजन, नोकरचाकर आदि
सकलें मुनाः मङ्गल यानाः थःकाय् सर्वार्थसिद्ध व भौमचा यशोधरा निम्ह न्ह्यःन्ह्यः
तयाः सिन्दुरजात्रा याकाः लाय्कुली द्वाहां बिज्यात ।

१३. सञ्चोदना परिवर्त

बोधिसत्त्व अन्तपुरय् बिज्यानाः बांबांलाःपिं मिस्तनाप च्वना विभिन्न नाटक
क्यनाबिज्यानाः विलम्ब याःगु खनाः ब्रम्हा, इन्द्र, देव, नाग, यक्ष, गन्धर्व, किन्नर
आदिपिसं बोधिसत्त्वं गृहत्याग यायेगुलिइ छाया विलम्ब यानाच्वन धकाः सल्ला
यानाच्वन । छुन्हु भिगू दिशाय् बिज्यानाच्वपिं बोधिसत्त्वपिसं चान्हय् अन्तपुरय्
बिज्यानाः जगत संसार उद्धार यायेत पिहां बिज्यायेगु ई जुल धकाः च्वयेकाः धर्म
संगीति पुयाः धर्म शब्द न्यंकल । अन्तपुरय् धर्म संगीति पुयाहःगु तायाः मन
वैराग जुयाः संसार त्याग याये धकाः प्रतिज्ञा याना बिज्यात ।

१४. स्वप्न परिवर्त

थुकुन्हु चान्हय् जुजु शुद्धोदनया म्हागसय् राजकुमारं गृहत्याग यानाः भिक्षु
जुयाबिज्यात धकाः म्हाच्वन । उकिं राजकुमारायात पित मछ्वयेत अन्तपुरय्
युवतीपिंनाप म्ये हायेका बाजं थाकाः भुलेयाना तल । नापं मू ध्वाकाया खापा बल्लाक
छुके बिल । तर राजकुमार धाःसा पिहां वनेत ई स्वयाच्वन ।

छुन्हु राजकुमारं छन्दक सारथीयात सःता उद्यानय् चाःह्यू वने मास्तीवल
रथ तयार या धकाः आज्ञा दयेकूसेलि रथ तयार याना पासापिं मुंकाः उद्यानय्
बिज्याःबलय् शुद्धावासकायिका देवपुत्र बुढाया रूप कयाः च्वंच्वंगु राजकुमारं
खन । अले हुं वःम्ह पुरुष सु धकाः सारथियाके न्यसेलि सारथिं ध्व पुरुष जीर्ण
बुढा, छुं ज्या ख्यलय् मदुम्ह खः, भी नं बुढा जुइतिनि धकाः बित्ति यात । अय्सा
थौं जि उद्यानय् वनाः छाया न्ह्यइपुकःवने धका राजकुमार राजकुलय् तुं द्वाहां
बिज्यात । हानं छुन्हु उद्यानय् बिज्याःबलय् वहे देवपुत्र महारोगी जुयाः मलमुत्रय्
तुं लानाच्वन । ध्वयात खनेवं हुं सु धकाः आज्ञा दयेकूसेलि सारथिं ध्व महारोगी

खः धकाः बन्ति यात । अले राजकुमारं सुखं धैरु क्षणिक जक खः धकाः रथ फहीका राजकुल्य लिहां बिज्यात । हानं छन्हु उद्यानय बिज्याः बलय सिथं हः गु खनाः हुं छु बबुया हः गु ? , छाया मनुत ल्यूल्य ख्वया बल धकाः न्यना बिज्यायेवं सारथिं मनु सीगुलिं सिथं हः गु खः धकाः बन्ति यात । ध्व खँ न्यनाः राजकुमारं सदां म्वानाचवने मदुगु धिक्कार, जरा, व्याधि मृत्यु जुइ स्वायेकेगु उपाय बिचाः याये धकाः रथ फहीका राजकुल्य तुं लिहां बिज्यात । धथे हे छन्हु उद्यानय बिज्याः बलय छम्ह भिक्षु खनाः हुं बम्ह सु ? ध्व ला तसकं शान्तम्ह धकाः न्यसँलि व भिक्षु खः, ध्वसपोलं काम भोग यायेगु त्वः ता भिक्षु चर्या यानाचवन धकाः बन्ति याः गु न्यना राजकुमारं छन्दकयात छं भिंगु खँ ल्हात ध्वसपोल थें जिनं भिक्षु चर्या यायेगु इच्छा दु ध्व धर्मय च्वंसा थः त नं परयात नं हित जुइ धकाः आज्ञा दयेका राजकुल्य तुं लिहां बिज्यात । ध्व खँ न्यनाः शुद्धोदन महाराजां राजकुमार पिहां बिज्याये मफयेक फुक्क बन्दोबस्त यानातल । न्हापायापिं बोधिसत्वपिनि थें सर्वार्थ सिद्धकुमारया पिहां बिज्यायेत न्हापां म्हागसय पूर्व निमित्त खन ।

१५. अभिनिष्क्रमण परिवर्त

छन्हु देवतापिं राजकुमारया अन्तपुरय बिज्यानाः शुद्धोदन महाराजाया अन्तपुर छगुलिं ग्यानापुसे खिउँसे च्वंकाः सुयागुं हाः सः मवयेका याकनं पिहां बिज्याहुं धकाः च्वयेकूसँलि राजकुमार लासां दनाः धर्म चित्त उत्पन्न यानाः प्राणी मात्रया उपरय करुणा तयाबिज्यात । ध्वहे चान्हय राजकुमारं छन्दक सारथियात सः ताः प्राणीपिन्त उद्धार यायेगु ई जुल, कन्थक सलयात हिं धकाः आज्ञा दयेका बिज्यायेवं नुगः मछिकाः ख्वख्वं सल हल । अले राजकुमार अन्तपुरय बिज्याना स्वः बलय यशोधरा बानाचवंगु खनाः जि पिहां वनेवं शुद्धोदन महाराजयागु कुल्य वंश छिन्न जुइगु जुल धकाः मती तया. बानाचवम्ह यशोधराया नाभि मण्डलय जवगु तुतिया म्हालापतिं नं थियाः छ थनिनिसें गर्भवती जुल धकाः अधिष्ठान याना बिज्यात । अले छिपिं निम्हसिनं पूर्व जन्मय यानावः गु पापं खुदं तक गर्भ धारण यायेमाली, पुखुली, मी भीरं कुर्के छुबइ । अयसां धन्दा कायेमते त्रिरत्नया नां कयाचवं धकाः आज्ञा दयेकाः श्री प्रतिसरा देवीया जन्त्र ब्रह्मायेका दृष्टिभोग यानाः आशिर्वाद बियाः अन्तपुरं पिहां बिज्याना कन्थक सलया म्हाय च्वनाः इन्द्र व ब्रम्हा न्ह्यः न्ह्यः तयाः राजकुलं पिहां बिज्याना दक्षिण दिशा स्वयाबिज्यात ।

वं वं खुगू योजन थ्यंकाः सुथय जुइवं सल म्हां ब्रह्मा बिज्यानाः थः गु तिसा वसः फुक्क त्वयाः छन्दकयात बियाः छ राजकुल्य वनाः शुद्धोदन महाराजयात

जिगु समाचार कनाब्यु धकाः राजकुमारं आज्ञा दयेका बिज्याःगु न्यना छन्दकं नुगः मछिंकल । तर जि याकनं बोधिज्ञान लानाः वये धकाः छन्दकयात बोध यानाबिज्याःगु खनाः कन्थक सल नं छवयाः राजकुमारया तुति फ्यत्तुफ्ययाच्वन । अयसां राजकुमारं निम्हसितं ह्ययेका तिसा वसः बियाः लित छवयाबिज्यात । राजमहलय् फुक्कस्यां न्ह्यलं चाःबलय् राजकुमार मदुगुलिं दक्कोभनं माला जुल । तर गनं लुइके मफुसैलि सकलें छवयाच्वन । राजकुमार मायेके छ्वःपिं दूतपिसं कन्थक सल ज्वनावःम्ह छन्दक तापलायेव छन्दकं इमित जुक्को खँ कन । राजकुलय् ध्यंकाः छन्दकं शुद्धोदन महाराजयात राजकुमारया समाचार फुक्क बित्ति यात । ध्व खँ न्यनाः शुद्धोदन महाराज, गौतमी महारानी, यशोधरा फुक्कस्यां तसकं विरह यानाः छ्वल । यशोधरां थनिनिसें जि नं व्रत च्वनेगु जुल धकाः प्रतिज्ञा यात ।

१६. विम्बिसारोपसंक्रम परिवर्त

बोधिसत्त्वं चूडाकर्म यानाः चीवर पुनाः दक्षिणपाखे स्वयाबवं शाक्य ब्राम्हणी, पद्मा ब्राम्हणी, रैवत ब्रम्ह ऋषि पिन्थाय बासं च्वंच्वं प्यन्हु दुखुन्हु त्रिमंदडिक व राजक ऋषिपिसं निमन्त्रणा यात । न्यान्हु दुखुन्हु आराडकालामयाथाय् वनाः जितः नं ब्रम्हचर्या धर्मय् तया बिज्याहुँ धकाः बित्ति याःगु न्यनाः आराडकालामं ज्यू धकाः धयाबिज्यायेवं क्षणमात्र जक परिश्रम यानाः अध्ययन यायेवं साक्षात प्रत्यक्ष खना बिज्यात । तर आराडकालामयागु धर्म निर्वाण पद लाइमखु धकाः सिसैलि जगत उद्धार यायेत ध्वयासिकं तःधंगु ज्ञान माःवने धकाः वैशाली त्वःताः मगध देशय् बिज्यात । कन्हय्खुन्हु सुथय् राजगृहलय् भिक्षा प्वंबिज्याःबलय् वसपोलया तेज खनाः फुक्कस्यां स्वयाच्वन । जुजु विम्बिसारं खनाः भिक्षा बियाछ्ववत । ध्वसपोल अन पाण्डव पर्वतय् बिज्यानाच्वंगु सिइवं थुकुन्हु हे बहनी जुजु विम्बिसार पाण्डव पर्वतय् बिज्यानाः वसपोलनापं कुशल वार्ता यानाः धुगु उमेरय् आम्हे भिक्षु जुइमत्वः, बरु जिगु बच्छि राज्य बी जिमि म्हाय्यं नं बिहाः यानाबी आनन्दं च्वनाबिज्याहुँ धकाः बित्ति यात । तर बोधिसत्त्वं ध्व खँ मन्यसें जिगु नं राज्य दु तर बोधिज्ञान लानाः लोकहित याये धकाः राज्य त्वःता चूडाकर्म यानाः तपोवन वने धकाः वया । जिके राज्य भोग यायेगु अभिलाषा मदु धकाः जुजुयात लिसः बिल । अयसा छलपोलं बोधिज्ञान लाना बिज्यायेवं धर्मज्ञान न्यनीम्ह जि हे जुल, छलपोलया इच्छा पुरेयानाः याकनं जिगु लायेकुली लिहां बिज्याहुँ धकाः बित्ति याना पालि भवपुयाः राजगृहलय् लिहां बिज्यात । वसपोलया चच्छि ध्यान यानाः सुथय् नैरन्जना खुसिइ बिज्याये धकाः बिज्यात ।

१७. दुष्कर चर्या परिवर्त

बोधिसत्त्व नैरन्जना खुसिइ बिज्याः बलय् ऋषि रुद्रक रामपुत्र थः शिष्यपिन्त धर्म उपदेश बियाच्चंगु खनाः थ्व तःधंम्ह योगी जुइ धकाः अन बिज्यात । तर बोधिसत्त्व थ्व ज्ञानय् च्वना मोक्ष लाये फैमखु धकाः अन बिज्याः बलय् पञ्चभद्रवर्गी धैपिं न्याम्ह योगीत नं गौतमया ल्यूल्यु बल । वसपोल गुबलें गयाशीर्ष, गुबलें नैरन्जना खुसिसिथय् आश्रम दयेका समाधि योग याना बिज्यानाच्चन । थुकथं ध्यान यायां जगत् संसार उद्धार यायेत दुष्कर चर्या यानाः व्रत तप याना क्यने धकाः थः गु शरीरया नाडी दक्को खिचय् यानाः समाधि यायेवं सासः बन्दजुयाः सीम्ह थें बैय् भ्वसुनाच्चन । थ्व खनाः मनूतय्सं प्रतिज्ञा पुरे मजुइकं राजकुमारया मृत्यु जुल धकाः धाल । गुलित्यां मृत्यु जूगु मखु समाधि योगय् बिज्यानाच्चन धाल । थ्व खँ मायादेवी सियाः थः काय्तं जगत संसार उद्धार यायेत बोधिज्ञान प्राप्त याये फैमखुत धकाः दुःख ताया बिलाप यात । असित ऋषिया नं थ्वसपोल बुद्ध भगवान धायेका लोक रक्षा याइ धाः गु शास्त्र नं भुग्ना जुल धकाः मतिइ तयाच्चन । थ्व खँ बोधिसत्त्व सियाः बरु पृथ्वी सच्छिक्कू दयावनी, सुमेरु पर्वत लखं चुइके यंकी, चन्द्र सूर्य नगु फुक्क कुतुंवनी तर जि सी मखु । जिं बोधिज्ञान लाइगु छलपोल खनीतिनि धकाः बिन्ति याः गु न्यनाः मायादेवी खुसि जुयाः स्वर्गय् लिहां बिज्यात । हानं बोधिसत्त्व संसारया ज्ञानीजनपिसं अल्पआहार यानाः विशुद्धि बिचाः याइथें जिनं याये धकाः भिंच्यालातक निहं छगः जक क्वलः, भिंच्यालातक निहं छगः जाकि, भिंच्यालातक निहं छगः जक हामो नयाः हानं भिंच्यालातक छुं मनसें च्वनाबिज्यात । थुकथं मनसें च्वनाबिज्याः गुलिं गंसि जुयाः बल, तागत मदयाः खुदँ दयेकाः दने धकाः स्वः बलय् दने मफयाः धेधेचुया बैय् भ्वसुवन । थुकथं खुदँतक फुक्क सहयानाः दुष्कर चर्या याना बिज्यात । खुदँ दसेलि नमुचि मारं सियाः तप भङ्ग याये धकाः वसपोलया न्ह्यः ने वयाः छं आम्हे सास्ति नयाच्चने स्वयाः सिनावने भिं, आः छ म्वाइ मुखत छैय् वनाः धर्मकर्म याःहुं, छं दुष्कर चर्या याये फैमखुत लिहां हुं धकाः धाल । थ्व खँ न्यनाः बोधिसत्त्व जि सी धकाः नं मग्नाः, जि ब्रम्हचर्याय् च्वंच्वनाम्ह विना प्रतिज्ञापुरे मयासें लिहां वने मखु । छं च्याम्ह सेनातय्त जिगु ज्ञानं नाश यानाबी छं जितः छुयाइ धकाः धायेवं पापी मार कृष्णबन्धुं स्वयेका छंगु तमाशा धकाः धया तँम्बयेका लिहां वन ।

१८. गर्भ संधारण परिवर्त

राजकुमारं गृह त्याग यानाबिज्यासेलि यशोधरां तसकं दुःख सिल । गौतमी

महारानी ख्वख्वं कां जुल । शुद्धोदन महाराजा व राजकुमारया पासापिं फुक्कस्यां शोक यानाच्वन । देवदत्त छम्ह जक फुक्क जिगु जुल धकाः खुसि जुल । राजकुमार पिहां बिज्यासॅलि यशोधरा न्हिन्हिं अष्टमी व्रतय् च्वनाः न्ह्याबलें राजकुमार लुमंका जिं छु पाप यानागुलिं थज्याःगु दुःख भोग यायेमाल धकाः थःगु कर्मयात धिक्कार यानाच्वन । अय्सां प्वाथय् दुगुलिं मचा मबूतले न्ह्याथें जूसां सह यानाच्वने धकाः मतिइ तयाच्वन । थुकथं हे दिन बिते जुजुं यशोधराया गर्भलक्षण सी दयावल । गौतमी महारानी शुद्धोदन महाराजायात यशोधरा गर्भवती जूगु खँ बित्ति यासॅलि थ्व मचा जन्म जुइवं जिगु शोक शान्त जुइ, थ्व मचां गृहधर्मय् च्वनाः कुल स्थीर याइ धकाः शुद्धोदन महाराजा खुसी जुल । अले शुद्धोदन महाराजाया आज्ञाथें गौतमी महारानी यशोधरायात बांलाक नकेत्वंके यानाः न्हिथं त्रिरत्नया स्मरण यानाः प्वाथय् च्वंम्ह मचायात रक्षा या, छं शोक यायेमते कुमार बोधिज्ञान लाना लिहां वइ धकाः बोध याःसां कुमार आज्ञा दयेका बिज्याःगु दुःखया खँ लुमंका गौतमी महारानीयात थौं सुखं च्वनां छुयाये लिपा दुःख भोग यायेमालीतिनि धकाः बित्ति यात । थ्व खँ न्यनाः गौतमी महारानीं छं दुःख भोग यायेमालीगु कारण छु ? धकाः न्यसॅलि थः भाःतं आज्ञा दयेकूगु खँ कने धकाः स्वःबलय् यशोधरा मूर्छा जुल ।

थये मूर्छा जूम्हेसित सखि मनोधरां बोध यानाः छलपोलं न्ह्याबलें दुःखी धकाः आज्ञा दयेका बिज्याइ, राजकुमारं छु आज्ञा दयेका बिज्यात ? फुगु उपकार याये धकाः बित्ति यासॅलि सुयातं मकंसे तयातःगु खँ कना बिज्यात । अय्सां थ्व खँ सुयातं कनेमते, जितः सुनां रक्षा याइ धकाः यशोधरां धाःगु न्यना मनोधरां छलपोलं शोक यानाबिज्याये मते धैर्य यानाबिज्याहुं कर्मया फल ला भीसं भोग मयासैं मगाः धकाः यशोधरायात बोध यात ।

१९. देवदत्त कामलोभोन्मत्त परिवर्त

राजकुमारं गृहत्याग यायेवं दुष्ट देवदत्तं शुद्धोदन महाराजया लिपा जि जुजु जुइ दइगु जुल धकाः हर्ष यानाच्वन । यशोधरा गर्भवती जूगु सियाः यदि थ्वया काय् बुल धाःसा थः जुजु जुइ खनीमखु धकाः दण्डपाणि जुजुया छेंय् वनाः यशोधरा छम्ह जितः ब्यू धकाः धाःगु न्यनाः दण्डपाणि जुजु तसकं तँम्बयेका देवदत्त वँय् जुल धकाः निन्दा यात । देवदत्त दण्डपाणि जुजु खनाः तँम्बयेका बदला कायेत छन्हु यशोधराया ख्वपिइ दुहां वनाः यशोधरायात जितः दण्डपाणि जुजुं छ्वयाहल धकाः धाःगु न्यनाः त्रिरत्नया नां कयाः थः भाःत लुमंकाः थौं जिं गज्याःगु वचन

न्यनेमाल ? ध्वयात अघोर पाप लात धकाः मतिइ तया मूर्छा जुयावन । लिपा होश वयेवं मनोधरायात सःता चण्डाल देवदत्तं जितः दुःख बिल धकाः राजुकमार लुमंकाः बिलाप यानाबिज्यायेवं मनोधरां शाक्यकुल ध्वंस याःवःम्ह दुष्ट देवदत्त तरकय् वनी धकाः धाल । अन तं देवदत्त तंम्बयेका छिमिसं जितः अपमान यात, तर जि जुजु जुइवं छिमिगु तमाशा स्वये धकाः लिहां वनाः मनय् ताप जुइका चच्छि मद्यंसे बितेयात ।

२०. गोपातीर्थ परिवर्त

थुकुन्हुया चा बिते जुसेलि यशोधरा न्ह्याबलें थें अष्टमी व्रतय् च्वना त्रिरत्न लुमंका माजु, ससःअबुया सेवा याना बिज्यानाच्वन । देवदत्तया न्हिथं यशोधराया गल्ली मालाच्वन । यशोधरा गर्भवती जूगु भिला फुइधुंकाः तं मचा मबूनी । थुकथं हे यशोधराया प्वाथय् दुगु दच्छि फुना वसेलि दुष्ट देवदत्त जुजुया सभाय् वयाः छलपोलया भौमचा गर्भवती जूगु दच्छि फुइधुंकल अय् नं मचा मबूनी, निश्चय तं यशोधरा ल्यवःसिं खः छलपोलं बिचाः यानाबिज्याहुं धकाः बित्ति यात । तर शुद्धोदन महाराजा यशोधरा निश्चय तं पतिव्रताम्ह मिसा खः, न्ह्याम्हस्यां न्ह्यागु धाःसां मेगु खुलातकं यशोधराया उपरय् दया तयाः सुंक च्वने धकाः धया बिज्यात । शुद्धोदन महाराजाया खँ न्यनाः दुष्ट देवदत्त थःगु प्रतिज्ञा पुरे मज्जुगुलिं मन आकुलव्याकुल जुइकाच्वन ।

तर निर्दे फुनाः वन तं भौमचाया मचा मबूनिगुलिं लज्जा जुयाः कर्म दोषं जक जुल ला ? गर्भय् च्वंम्ह मचा जकं अलछिन जुल ला धकाः जुजुं मिखाय् श्वबि तयाः आज्ञा दयेका बिज्याःगु न्यनाः देवदत्तं छलपोलं दुःख ताया बिज्यायेमते छलपोलयागु दुःख हरण याइपिं जिपिं मदुला धकाः बित्ति यात । अले यशोधरा व मनोधरा निम्ह ल्यवःसिं जूगुलिं दाजुं गृहत्याग यात । छलपोलया काय् नापलाये धैगु जूसा यशोधरा व मनोधरा निम्ह ल्यवःसितय् थ्व राज्यं पितृव्याबिज्याहुं । थ्व ज्या छलपोलं याये मछाःसा नीछन्हुतक जितः राज्य बियाबिज्याहुं । नीछन्हुया दुने जत्तन यानाः काय् बौ संयोग याकाबिइ धकाः बित्ति यात । देवदत्तया खँ न्यनाः शुद्धोदन महाराजां थनिनिसें नीछन्हुतक जिगु राज्यया हर्ताकर्ता छन्त जुल, अन्याय यायेमते धकाः आज्ञा दयेका राज्य त्वताबिल । दुष्ट देवदत्त जुजुया भाला क्वबुया बालहथ्या, स्त्रीहथ्या लाइगु जूसां यशोधरायात पुखुली क्वफानाः स्यानाः सुयागुं भय मदयेक राज्यभोग यायेदैगु जुल धकाः मतिइ पाप तयाच्वन । कन्हय्कुन्हु राजसभाय् वनाः माःमाःगु अहे यानाः प्रतिहार धैम्ह द्वाच्यायात सःताः यशोधरां ल्यवःकयाः

गर्भ धारणा यानाच्चन धकाः तँम्बयेकाः थःम्ह याये मछाला यशोधरायात पुखुलिइ
 क्वफाना छ्व धकाः जितः अहेयानाः हल, उकिं यशोधरायात पुखुलिइ क्वफाना
 छ्वयेत्यना धकाः न्यंकाब्यु धकाः धायेके छ्वल । द्वाऱ्यां यशोधराया अन्तपुरय्
 वनाः देवदत्तं आज्ञा जूगु खँ तसकं नुगःमछिंकाः ख्वख्वं बित्ति यात । थ्व खँ न्यनाः
 यशोधरां छं थौं जितः भिंगु हे खँ न्यंकल, जिगु कारणय् थौं महाराजा आदि सकलें
 लज्जा चायाच्चन । उकिं जि पुखुलिइ क्वब्बानाः सिनावने धकाः धया बिज्यात ।
 थ्व खँ न्यनाः सकस्यां देवदत्तया निन्दा यात ।

यशोधरां मनोधरायात बोध यानाः अष्टमीव्रत च्वनेसिधयेका गौतमी
 महारानीयात व्रतया प्रसाद बियाः शाक्य कुलया दोषी जि पापी पुखुलिइ क्वब्बाः
 वनेत्यना, छलपोलं दुःख तायेमते धकाः थः भाःतया वचन शिरोपर यानाः अन्तपुरं
 पिहां बिज्यात । यशोधरा नाप सकलें ख्वख्वं ल्यूल्यु वन । यशोधरा पुखुलिइ
 क्वब्बायेत तयार जूबलय् मनोधरा मूर्छा जुयाः प्राण त्याग यानाः तुषिता भुवनय्
 वन । अन सकस्यां बोध याःसां कर्मया फल भोग मयासैं मगाः धकाः पुखुलिइ
 क्वब्बाःवन । यशोधरा पुखुलिइ कुतुं वना धर्मस्वामी नागराजाया फणाय् जुत ।
 नागराजां जिगु फणाय् छु जू वल धकाः स्वःबलय् यशोधरा महारानी खनाः नाग
 भुवनय् यंकाः नागराजां छलपोल सु ? छाया क्वब्बाःवया धकाः न्यंसैलि यशोधरा
 महारानी थःगु दुःखया खँ दक्को बित्ति यानाः लिपा सर्वार्थसिद्ध राजुकमारया कलाः
 धकाः बित्ति यासैंलि नागराजा खुसि जुयाः यशोधरायात आनन्दं बिज्याका तल ।
 देवदत्तया धाःसा यशोधरा सित भाःपा खुसि जुयाः लोकं धाइ धकाः मिखाय् ख्वबि
 तयाः जिगु इच्छा पुरे जुल धकाः हर्ष यानाः सकलें मुंका छैय् लिहां वयाः आनन्दं
 च्वनाच्चन ।

२१. प्रत्यागमन परिवर्त

कन्हय्कुन्हु यशोधरायात पुखुलिइ क्वफाना सन्तुष्ट जुयाः आः जितः सुयागुं
 भय मन्त, जि जुजु जुल धकाः देवदत्त खुसि जुयाच्चन । उखे दण्डपाणि जुजु पुखूयागु
 सिधय्च्वनाः यशोधरा लुमंकाः ख्वयाच्चन । थुबले हे म्हिते धकाः थहां बिज्याःम्ह
 धर्मस्वामी नागराजां दण्डपाणि जुजु ख्वयाः बिलाप यानाच्चंगु तायाः जुजुयात धैर्य
 याना बिज्याहुं धकाः बोध यानाः थः पुखुलिइ क्वब्बानाः यशोधरायाथाय् वनाः
 दण्डपाणि जुजु छलपोलयात लुमंकाः बिलाप यानाच्चन, जिं छलपोलया समाचार
 कनाः बोध यानावया छलपोल थहां बिज्याहुं धकाः यशोधरायात बित्ति यात ।
 नागराजाया बित्ति न्यनाः थहां वनेगु इच्छा मदुम्ह यशोधरा महारानी गज्यागज्यागु

दुःख भोग याये मालीतिनि थें धकाः आज्ञा दयेका बिज्यात । नागराजां यशोधरायात
ब्वनाः पुखुलिं थहां बिज्यानाः मांबौया न्ह्यःने तयाः नागभुवनयत्तुं लिहां बिज्यात ।

पुखुलिं थहां बिज्याःम्ह यशोधरा खनाः सकलें खुसि जुल । यशोधरां नं
सकसितं नागभुवनया खँ कनाः नागयागु दयां जि पापी स्वानाच्चनातिनि धकाः आज्ञा
दयेकाबिज्यात । दण्डपाणि जुजुया नं जिगु भाग्यं नागराजाया दयां भीपिं निम्ह संयोग
जुल धकाः हर्ष जुल । यशोधरायात बोध यानाः नागराजाया नामं पुखुली पुजा यानाः
लिहां बिज्यात । थ्व समाचार न्यनाः सकलें आश्चर्य चायाच्चन । थुकथं सकस्यां
प्रशंसा याकाः यशोधरा महारानी राजकुल्य दुहां बिज्यानाः गौतमी महारानीयाथाय्
वनाः नागभुवनया खँ कनाः छलपोलया काय् व श्री प्रतिसरादेवीयागु प्रभावं रक्षा
जुया वया, उकिं जि दुःखी धयागु धकाः बिल्लि यात । अले न्हापा राजुकमारं थःत
आज्ञा बिया बिज्याःगु खँ बिल्लि यासैंलि गौतमी महारानी गज्यागज्यागु स्वयेमाली
तिनि थें धकाः शोक याता बिज्यात ।

२२. गोपा अग्निपातन परिवर्त

दुर्मति जुयाच्चंम्ह देवदत्तं हानं जत्तन लुइकाः शुद्धोदन महाराजयाथाय् वनाः
यशोधरा मन्त्रं पारंगत जुयाच्चंम्ह डाकिनी खः । यशोधरा मन्त्र मसःम्ह जूसा
पुखुलिइ क्वव्वा वनेधुंकूम्ह गथे थहां वइ ? जिं याकनं छलपोलया काय् नापलाका
बी धकाः बिल्लि यासैंलि शुद्धोदन महाराजां फुक्क अधिकार देवदत्तयात बिल । थुकथं
आज्ञा दयेकूगु न्यना देवदत्तं द्वाऱ्यायात सःता यशोधरायात ब्वनाः याकनं लुम्बिनी
वनय् वा धकाः धयाः सकलें लुम्बिनी वनय् वन । द्वाऱ्यां यशोधरायात देवदत्तं सःतके
हल धकाः बिल्लि यायेवं जि वयेत्यल धकाः माजु गौतमी महारानीयाथाय् बिज्यानाः
थौं जितः ब्वनायंके धकाः द्वाऱ्या वयाच्चन । जि पुखुलिइ क्वव्वावने धुन, थौं मी
कुर्के छव्वयेत सःतके हल धकाः बिल्लि याताः व्रत सिधयेका सखिपिं नापं राजद्वारं
पिहां बिज्यानाः लुम्बिनी वनय् दुहां बिज्यात । अन यशोधरायात खनेवं देवदत्तं थ्व
दत्तले राज्य मङ्गल जुइमखु धकाः दाजुं धयाहःगुलिं ध्वयात नाश यायेत जुजुं जितः
अहे याताहल । उकिं श्रीखण्ड आदि सिं पचिनाः यशोधरायात तयाः मि तयाब्यु
धकाः आज्ञा बिल । थ्व खँ न्यनाः स्वयाच्चपिं सकस्यां नुगलय् देवदत्तप्रति क्रोध
यानाच्चन । नुगःमछिंम्ह थें मिखाय् ख्वबि तयाः आम क्वखाया तयागु जन्त्र त्वयाः
अग्निइ क्वव्वाबिज्याहुं धकाः कपट मती तयाः देवदत्तं बिल्लि यात । अले यशोधरा
प्रतिसरादेवीया जन्त्र त्वयाः सकसितं रक्षा यानाबिज्याम्हं धर्म रक्षा याई धकाः थःगु
पतिव्रता धर्म प्रकाश यानाक्यने धकाः मिया न्ह्यःने बिज्यानाः थः स्वामीयात

नमस्कार यांना: छुवयाचवंगु मिइ तिंन्हुया: क्वब्वा: बिज्यात । यशोधरा मिइ क्वब्वा: वनेमात्रं प्वाथय्चवंह मचा ग्याना: श्री प्रतिसरादेवीयात नुगलं स्मरण यांना: धारणी ब्वना: बिन्ति यांनाच्वन । थुकथं बिन्ति यायेवं प्रतिसरादेवीया अनुभावं यशोधराया सत्य धर्मया प्रभावं मि सिना: मिं ल: पिहांवल । थुकथं यशोधरा महारानी रक्षा जूगु खना: सकलें आश्चर्य चाया: यशोधरा महारानीयात प्रशंसा यांना परमेश्वर तुल्य धका: स्तोत्र यांनाच्वन ।

२३. गोपा भृगुपातन परिवर्त

यशोधरा रक्षा जूगु खना: यशोधरा डाकिनी तं थ:गु मन्त्रं मि स्यात धका: देवदत्तं अग्नि देवतायात निन्दा यांना: तँम्बयेकाच्वन । आ: भी लिहां वंसा महाराज तँम्बयेकी धका: लोकाचार यांना: द्वाऱ्यायात स्वया: महाराज हुकुम जूथें थ्वयात पिला छगलय् तया: भीरं कुर्का लिहां वा धका: आज्ञा दयेकल । देवदत्तया आज्ञा न्यना सकस्यां देवदत्तयात धिक्कार यांनाच्वन । देवदत्तया आज्ञानुसार द्वाऱ्यां यशोधरायाथाय् वना: छलपोलयात देवदत्तं बिज्याहुँ धाल धका: बिन्ति यात । अले यशोधरा देवदत्तया न्ह्योने बिज्याना: जित: छु यायेत्यना याकनं कर्मभोग याका: जिगु पाप फुकाब्यु धया बिज्यायेवं देवदत्तं यदि छलपोल पतिव्रताम्ह ख: धयागु जूसा पिला दुने बिज्याना: भीरं क्वब्वाना रक्षा जुया बिज्याहुँ धाल । देवदत्तया वचन न्यना: थ:गु सत्ययागु प्रभाव क्यने धका: मतिइ तया: सकलें मुंका: पर्वत गया: च्वकाय् थ्यंक: बिज्यात । अन देवदत्त सुंक च्वनाच्वनेवं थ:हे पिलाय् च्वनेमात्रं यशोधराया सत्यया प्रभावं पिला तज्याना वन । अयसां छुं भय मकासैं त्रिरत्न स्मरण यांना: भीरं क्वब्वानाबिज्यात । तर क्वय् समुद्र खना: ग्याना: न्हसिकापया भीरय् बुयाचवंगु थसिमाय् घयेपुनाच्वन । देवदत्तया यशोधरा सित जुइ धका: मनय् हर्ष यांना: मिखाय् ख्वबि तया: लोकाचार यांना: सकलें मुंका पर्वतं क्वहां वल ।

न्हसिकापय् धर्म सुबल्लभा धैम्ह माकलं यशोधरा महारानी भीरं कुतुंबया थसिमा घयेपुनाचवंगु खना: लिक्क वना: थन छाया बिज्याना धका: बिन्ति यात । अले यशोधरां थ:गु दु:खया खँ कना: लिपा सर्वार्थसिद्ध कुमारया कला: जि समुद्र खना: ग्यानाच्वना धका: आज्ञा दयेका बिज्यात । थ्व खँ न्यना: माकलं यशोधरायात लुकुंछिना: समुद्र पार यांना: लँय् तया: थ:गु थासय् वन । सकलें अन थ्यंका: यशोधरायात खनेवं अद्भूत चाया: छु छु जुल धका: बिन्ति यासैंलि जूगु वृत्तान्त कना बिज्यात । यशोधरां कनाबिज्या:गु खँ न्यना: पतिव्रता धर्म पालन यांना: सत्यवादी जुयाबिज्या:म्ह धका: सकस्यां प्रशंसा यांना: नमस्कार यात । माकलं

लुकुंछिनाः तयेहः गु खंम्ह देवदत्तया धाः सा माकः खनाः तँम्बयेकाच्चन । तर देवदत्त यशोधराया न्ह्यः ने वनाः माकः या दयां जिमिसं छलपोलया दर्शन यायेदत्त धकाः उल्टा खँ ल्हात । अहंकारी देवदत्त थः गु कार्य सिद्ध मज्जुगुलिं लज्जा चायाः शुद्धि मदयेका वँय् थें जुयावल ।

२४. गुर्बिन्याशय परिवर्त

थुकथं सत्यवादी यशोधरां जिं छु यानागु पापं थज्याः गु दुःख भोग यायेमाल ध्व खँ स्वामियाके न्यने धकाः मतिइ तयाः न्हिथं अष्टमीव्रत दनाच्चन । दुष्टम्ह देवदत्तया जक शुद्धोदन महाराजां दण्ड याइ, लोकं अपवाद याइ धकाः धन्दा कयाच्चन । नीनिन्हु दसेलि शुद्धोदन महाराजा देवदत्त खनाः तँम्बयेकाः राजसभाय् तयाः छं राज्ययागु ज्या मस्वः, प्वाथय्दुम्ह यशोधरायात दुःख बिल । उकिं छं गथे यशोधरायात दुःख बिल छन्त नं अथे हे यायेगु धकाः आज्ञा दयेका बिज्यायेवं देवदत्त ग्यानाः क्षमा यानाबिज्याहुँ धकाः बिन्ति यानाच्चन । ध्व खँ यशोधरां सीका देवदत्त दोषी मखु दोषी जि खः, वयात क्षमा यानाबिज्याहुँ धकाः धयाः थःम्हं कर्मभोग यायेमाः गु, राजकुमारं आज्ञा दयेकाबिज्याः गु खँ नं शुद्धोदन महाराजयात बिन्ति यात । थुकथं यशोधरां देवदत्तया जीव रक्षा यानाः शुद्धोदन महाराजयात पालि भवपुयाः अन्तपुरय् बिज्यागु खनाः सकसिनं प्रशंसा यात , देवदत्त धाः सा अफ्र नं यशोधराया चुक मालाच्चन ।

२५. पुत्र जन्म परिवर्त

राजकुमारं गृहत्याग यानाबिज्याः गु खुदँ दसेलि यशोधरा महारानीया नं काय् बुल । तर व मचा हाक्कुसे च्वनाः स्वये हे ग्यानापुसे च्वनाः राहुथें च्वंगुलिं सखिपिं ग्यानाः बिस्युंवन । ध्व मचा खनाः आश्चर्य चायाः ध्व मचां पूर्वजन्मय् छु पाप यानावल ? ध्व मचाया रूप खनाः सकस्यां जितः धिक्कार याइ धकाः यशोधरा महारानी आज्ञा दयेका बिज्यात । गौतमी महारानी मचा स्वयाः ग्यानाः मिखाय् ख्वबि तयाः हर्ष जूम्ह थें च्वंक धन्य यशोधरा कुलछिन्न मज्जुइक छय्चिया जन्म बिल धकाः आज्ञा दयेका बिज्यात । शुद्धोदन महाराजां मचा स्वः बिज्याबलय् छय्चिया ख्वाः खनाः ग्यानाः मतिइ संखा यानाः लज्जा चायाः पिहां बिज्यात । ध्व समाचार न्यनाः देवदत्त छम्ह जक खुसि जुयाच्चन ।

मचाया जातकर्म यायेगु ई जूसां थज्याःम्ह शाक्य कुलय् कलंक प्युवःम्ह मचाया छु कर्म यायेगु धकाः जुजुं पुसेहितयात जातकर्म मयायेगु आज्ञा दयेका

बिज्यात । तर पुरोहितं बालकयाके छुं दोष मदु, मब्यंकुसे मगाः धकाः महाराजयात बिल्लि यात । अयसा ध्व मचाया नां जिं छुइ धकाः शुद्धोदन महाराजां मचाया नां राहुल धकाः तल । बःचाधिकः जुसेलि बाज्याम्हेस्यां गुरुयात लःल्हाना मब्यूसां गुरुयाथाय वनाः आखः ब्वनाः शास्त्रं पारंगत जुयाः पासापिन्त स्यनेकने यानाः थःगु गुण प्रकाश यानाः बाज्यायात, मांयात खुसि यात । देवदत्त छम्ह जक राहुलया ज्ञानगुण खनाः तँम्बयेकाच्चन । छन्हु देवदत्तं राहुल तापलानाः छ सुया काय् ? छं बौ सु ? धकाः धाःगु न्यनाः ख्वया मांया अन्तपुरय् वनाः मांयात जिमि बौ सु ? वया नां छु ? दु ला कि मदु धकाः न्यन । अले यशोधरां छ ख्वय्मते, छं बौ शुद्धोदन महाराजया काय् सर्वार्थसिद्ध जगत् संसार उद्धार याये धकाः धर्मद्वीपय् बिज्यात धकाः काय्यात कना बिज्यात , गुबलेतक छं बौ लिहांबिज्याइ मखुनि उबलेतक न्ह्याम्हस्यां न्ह्यागु धाःसां सहयानाच्चं, देवदत्तया संगत यायेमते धकाः राहुलयात यशोधरां बोध याना बिज्यात । हानं राहुल कुमारं जितः देवदत्त जारपुत्र धकाः धाइ ध्व छु धाःगु धकाः बारम्बार बिल्लि यासेलि ध्व खँ न्यनेमते छन्तं नं पाप लाइ जितः नं पाप लाइ, छिमि बौ लिहांबिज्यायेवं न्यनास्व लिपा हानं थथे धाःसा न्हाय्पं प्वाःतिनाः त्रिरत्न लुमंकाः वा धकाः राहुलयात यशोधरां बोध याना बिज्यात ।

२६. नैरञ्जना परिवर्त

सिद्धार्थकुमार खुदैतक दुष्कर चर्या याना नं बोधिज्ञान लाये मफु अले प्रीतिसुख धैगु प्रथम द्वितीय तृतीय व चतुर्थ ध्यान यानाः बोधिज्ञान प्राप्त यायेफै धैगु ज्ञान उत्पत्ति जुयावल । तर भोजन मयानागुलिं शरीर दुर्बल जुल, ज्ञान प्राप्त याये मफुत, सुनानं भोजन यायेगु वस्तु बिल धाःसा भोजन याये धयाबिज्याःगु वचन पञ्चभद्रवर्गीपिसं सियाः राजकुमारं दुष्कर चर्या पुरे याये मफयाः आहारा फ्वन, ध्वयाके छुं ज्ञान मदुनि धकाः वसपोलयात त्वःता मृगदावनय् च्वनाच्चन । वसपोलयात उरूविल्वा गांया ग्रामिक धैम्ह द्वाय्याया म्हाय्पिसं भोजन याकातल । सुजाताया नं जिं दान यानागु क्षीर भोजन यानाः बोधिसत्त्वं सम्यक् संबोधि ज्ञान लानाबिज्याये फयेमा धकाः आशिका यानाच्चन ।

सुजातां क्षीर दान यायेत थः दासियात श्रमण ब्राम्हण ब्वनाहिं धकाः मायेके छ्वत । सुजाताया दासिं वसपोलयाथाय् वनाः सुजातां छलपोलयात निमन्त्रणा यानाहल धकाः बिल्लि यायेवं वसपोल बोधिसत्त्व सुजाताया छैय् बिज्यानाः क्षीरं पूर्णगु पिण्डपात्र दान याःगु कयाबिज्यानाः क्षीर भोजन यानाः निश्चय नं अनुत्तर सम्यक्सम्बोधि ज्ञान लाये धकाः मती तयाः पिण्डपात्र ज्वना नैरञ्जना खुसिया

सिधय् भोजन यानाः पिण्डपात्र खुसिइ बांछवयाबिज्यात । थौं सुजातां ब्यूगु क्षीर भोजन यानागुलिं बलवान जुल । आः जि सर्वज्ञता ज्ञान बोध यायेत बोधिमण्डपय् वने धकाः अनं बिज्यात ।

२७. बोधिमण्डप गमन परिवर्त

नैरन्जनां बोधिसत्त्व बोधिमण्डप बिज्याः बलय् न्हापा जुयावंपिं तथागतपिसं तृण आसन यानाबिज्याथें वसपोलं नं घाँय्या आसनय् च्वने धकाः मती तथा बिज्यात । अन हे घाँय् लयाच्चंम्ह स्वस्तिक घाँसियाके घाँय् छम्हू कयाबिज्यात । अले अनं बिज्यानाः बोधिसिमाया व्वय् घाँय्यागु आसन दयेका वज्रासन यानाबिज्यानाः ध्व आसनय् जिगु शरीरया ला हि छचंगू दक्को सुकय् जुयाः प्रलय् जूसां नं अति दुर्लभगु बोधिज्ञान मलासें जि गनं चिलेमखु धकाः प्रतिज्ञा यानाः आसन व्वातुका बिज्यात ।

२८. बोधि मण्डप व्यूह परिवर्त

बोधिसत्त्वं बोधि मण्डपय् बिज्यानाः समाधि योग याना बिज्यासेंलि वसपोलयागु शरीरं सञ्चोदनी धैगु रश्मि पिहांवयाः भिगू दिशाया आदि बुद्ध क्षेत्रय् खयाः अन बिज्यानाच्चपिं बोधिसत्त्वपिन्त याकनं वा धकाः च्वयेकल । थुकथं च्वयेकूगु न्यना भिगू दिशाय् च्वपिं बोधिसत्त्वपिं बोधिमण्डपय् बिज्यानाः पूजा याःवल । हानं देवगति छगू त्वःता च्यागू गतिं उत्पत्ति जुयाच्चपिं प्राणीपिन्त बोधिमण्डपय् बिज्यानाच्चंम्ह बोधिसत्त्वयात न्ह्यःने क्यनाबिल । हानं आकाशय् वयाः स्वयाच्चपिं देवता दानवपिसं बोधिसत्त्वयात नाना प्रकारं पुजा यानाः पुष्पवृष्टि यानाः थःथःगु भुवनय् लिहां वन ।

२९. मार धर्षण परिवर्त

बोधिसत्त्व बोधिमण्डपय् ध्यान याना बिज्याःगु स्वयाः ब्रम्हा, इन्द्र आदि देवतापिं सकलें लिहां बिज्यासेंलि कामधातु भुवनय् च्वना मारतय् अधिपति जुयाच्चंम्ह कृष्णबन्धुयात मसीकं अनुत्तर सम्यक संबोधि ज्ञान लाना वनेमखु धकाः मती तथाः सर्वार्थसिद्ध कुमारं अनुत्तरगु बोधिज्ञान लाना बिज्याइन याकनं जत्तन या धकाः कृष्णबन्धु मारयात वसपोलया रश्मि पिज्बयाः गाथा व्वनाः च्वयेकाच्चन । थुकुन्हु चान्हय् कृष्णबन्धु मारया ३२ ता प्रकारं मभिकं म्हनाच्चन । न्ह्यलं चासेंलि कृष्णबन्धुया मन आकुल व्याकुल जुइका थः कायपिन्त सःताः रश्मि वयाः गाथा व्वंगु व म्हगसय् म्हंगु खं कनाः सर्वार्थसिद्ध कुमारं जिगु बलयात दुर्बल यानाः धर्मया

जुजु जुयाः तथागत जुइन धकाः कन । अले कृष्णबन्धु तँम्बयेका ग्यानापुसेच्चंभिं सैन्यतयत् खटेयाना छूवत । इमिसं बोधिसत्त्वयात त्रास क्यंवन । तर बोधिसत्त्वया चित्त भतिचा हे अस्थीर मजू । अथे हे कृष्णबन्धु आज्ञा जूथे अप्सरात बोधिसत्त्वया न्ह्यःने वनाः ३२ ता प्रकारं स्त्रीमाया क्यनाः मोहलय् भुलय् याये धकाः स्वल तर बोधिसत्त्वयात मोहलय् भुलय् याये मफयाः लज्जा चायाः क्षमा फवनाः थः बौयाथाय् वनाः बोधिसत्त्वनाप संग्राम यायेवं थःत महाकष्ट जुइ, संग्राम याना बिज्यायेमते धकाः बिन्ति यात ।

हानं कृष्णबन्धु सहित नमुचिमारया सैन्यतयसं शस्त्रअस्त्र प्रहार याःवयेवं प्रतिसरादेवीया स्तोत्र ब्वना बिज्यात । ध्वया प्रभावं बोधिसत्त्वया चिम्संप्वालं द्रलंदः शस्त्रअस्त्र ज्वनाच्चंभिं पुरुषीं प्रकट जुयाः शस्त्रअस्त्र प्रहार यायेव सैन्यत फुक्क बिस्सुं वन । कृष्णबन्धु छम्ह बोधिसत्त्वया न्ह्यःने अचेत जुल । ध्व दृश्य खनाः फुक्क देवताभिं वयाः बोधिसत्त्वयात पुजा यानाः छलपोलं बोधिवृक्ष सिमाया क्वय् बिज्यानाः शत्रुया भावना यानाच्चंम्ह मारयात त्याका बिज्यात । छलपोलं ध्व आसनय् बिज्यानाः बोधिज्ञान लाना बिज्याहुं धकाः बिन्ति यानाः थःथःगु भुवनय् लिहां बिज्यात ।

३०. अभिसंबोधन परिवर्त

बोधिसत्त्वं बोधिवृक्षया क्वय् बिज्यानाः फुक्क मारयात त्याकाः सांसारिक भोगया छुं कामना मयासें सवितर्क सविचारयागु विवेकं उत्पत्ति जूगु प्रीति सुख दुगु प्रथम ध्यानय् च्वनाबिज्याबलय् दिव्यचक्षु उत्पत्ति जुल । अले निर्वितर्क निर्विचार वितर्क विचार मदुगु समाधी उत्पत्ति जूगु प्रीति सुख दुगु द्वितीय ध्यान व निष्प्रीतिक प्रीति मदुगु तृतीय ध्यानय् च्वनाबिज्यानाः प्रीति निरोध याना बिज्यात । हानं सुख, दुःखयात उपेक्षा यानाः स्मृतियागु परिशुद्धं चतुर्थ ध्यानय् च्वनाबिज्यात । थुखुन्हु चाया प्रथम प्रहरय् प्राणीपिन्त दिव्यचक्षुं स्वयाबिज्याःबलय् अनेक प्रकारं दुःख सुख भोग यानाच्चंभिं प्राणीपिन्त प्रत्यक्ष खनाबिज्यात । थुखुन्हु चाया द्वितीयप्रहरय् ध्यान याना बिज्यायेवं पूर्व जन्मया फुक्क खं लुमना बल । थुखुन्हु हे तृतीय प्रहरय् ध्यान याना बिज्यायेवं ध्व समाधियागु प्रभावं हेतु प्रत्यय समुत्पाद व प्रत्यये प्रतीत्य समुत्पाद निगूयागुं ज्ञान दयाः जन्ममरणया ज्ञान दक्कों बोध जुल ।

हानं छु याःसा जन्ममरण जुइ म्वाली, जन्म, जरा, मरण निरोध यायेगु उपाय छु धकाः निवृत्ति मार्गया ज्ञान लुइकेत बिचाः याना बिज्यात । नापं सुख धैगु ध्व, दुःख धैगु ध्व धकाः प्रवृत्ति, निवृत्तियागु ज्ञान सिइका बिज्यानाः थुखुन्हु नसंचा इलय्

बोधिसत्त्व आश्रव क्षय यायेगु उपाय चिन्तना याना बिज्यानाः दुःख, दुःख समुदय, दुःख निरोध, दुःख निरोध गामिनी प्रतिपदा धैरु चतुआर्य सत्ययागु ज्ञान प्राप्त याना बिज्यानाः अर्हत् सम्यक संबुद्ध जुया बिज्यात ।

हानं षट्पारमिता (दान, शील, क्षान्ति, वीर्य, ध्यान, प्रज्ञा) या नापं मैत्री, करुणा, मुदिता व उपेक्षा चतुब्रम्ह बिहारयागु भावना उदय जुयावसेल सर्वज्ञ ज्ञान प्राप्त जुल । अले बोधिसत्त्वं सकल प्राणीपिन्त मैत्री चित्त तयाः हित यायेत बुद्ध जुइ धकाः मती तयाः प्यंगू स्मृति पस्थान (कायानुस्मृति, वेदानुस्मृति, चित्तानुस्मृति, धर्मानुस्मृति) भावना यानाः प्रथम, द्वितीय, तृतीय, चतुर्थ ध्यानय् बिज्यानाः आस्फानक समाधियोग याना बिज्यात । ध्व समाधिया प्रभावं पञ्चोपादान स्कन्ध स्वरूप वेदना, संज्ञा, संस्कार, विज्ञान आदि नास जुयाः पञ्चज्ञान प्राप्त जुया दिव्यचक्षुं स्वयाबिज्याः बलय् फुक्क तथागतपिनिगु चित्त समान थःगु चित्त खनाबिज्यात । थुबले हे न्हापा जुयाबिज्याःपिं सकल तथागतपिं बिज्यानाः सकल प्राणीपिन्त हित यायेत धर्मचक्र प्रवर्तन या धकाः आज्ञा दयेका अन्तरध्यान जुयाबिज्यात ।

३१. संस्तव परिवर्त

बोधिसत्त्व बुद्ध जुया बिज्याये धुंकाः सकल भुवनया देवतापिसं पुजा यानाः सकल प्राणीपिन्त धर्म उपदेश बियाः बोध यानाः तरेयाना बिज्याहुं धकाः बिनित्त यानाच्चन । थये हे देवराज इन्द्र, चतुमहाराजापिं नापं देवतापिं मुंकाः बोधिमण्डपय् बिज्यानाः पुजा यानाः सम्यक् संबोधि ज्ञान लाना बिज्याःम्ह छलपोलया शरणय् जिपिं वया धकाः वसपोलया शरणय् वल । अथे हे आकाशय् च्वनाच्चपिं देवतापिं, भुमिइ च्वनाच्चपिं देवतापिं सकस्यां बोधिज्ञान लानाबिज्याःम्ह सम्यक् संबुद्धयात पुजा यानाः नमस्कार यानाच्चन ।

३२. त्रपुष भल्लिक परिवर्त

बोधिसत्त्वं सम्यक् संबोधि ज्ञान लाना बिज्यायेधुनेवं वसपोलं प्रीत्याहार धैरु समाधि योग यानाः न्हय्न्हु तक बोधिवृक्षया क्वय् बिज्यानाच्चन । च्यान्हु दुखुन्हु तथागत सिंहासनं दनाः त्रिसाहस्र, महासाहस्र लोक धातुया बिचाःयानाः चक्रमण याना बिज्यात । अले बुद्ध जुयाः प्यंगूगु हप्ता दुबलय् पूर्व समुद्रं पश्चिम समुद्र तक बिचाः याना च्वनाबिज्यात । अले न्हय्गूगु हप्ताय् तारायण धैरु जङ्गलय् दुहां वनाः तालवृक्षया क्वय् आसन याना बिज्यानाच्चन । थुकुन्हु त्रपुष भल्लिक धैपिं निम्ह

दाजुकिजा व्यापारया नितिं न्यासःगू गाडा जायेक मालताल दक्षिणयागु लं उत्तर स्वया ववं तालवृक्षया वनय् दथ्वी ध्यंबलय् अनया वनदेवी अधिष्ठान याःगुलिं गाडा दक्को रोके जुल । वनदेवी पिहां वयाः थन छुं भय मदु धाःगु न्यनाः गाडां सायेका वने त्यंबलय् दोहंतय्सं भगवान् बुद्ध दुगु थासय् गाडा साला यंकल । अन भगवान् बुद्ध खनाः त्रपुष भल्लिक व मेमेपिं महाजनत आश्चर्य चायाः ध्वसपोलयात त्रपुष भल्लिकपिसं शुद्धगु पिण्डपात्रय् क्षीर तयाः वसुपोलयात दान याना बिज्यायेवं आशिर्वाद बियाः इच्छा भोजन यानाः पात्र आकाशय् वांछूवया बिज्यात । अले त्रपुष भल्लिक आदि महाजनपिसं वसपोलयात प्रणाम यानाः सकलें मुंका बुद्ध धर्म संघयागु नां कयाः थःगु देशय् वने धकाः उत्तर दिशा स्वयावन ।

३३. अध्येषणा परिवर्त

बोधिसत्त्वं बोधिज्ञान लाना बिज्याये धुसेलि शिखि महाब्रम्ह तथागतयाथाय् वनाः छलपोलं अनुत्तर सम्यक् संबोधि ज्ञान लाना बिज्याये धुंकल, याकनं धर्मचक्र प्रवर्तन यानाः धर्म उपदेश बियाबिज्याहुं धकाः बिन्ति यात । तर भगवान् बुद्ध मौन भावं सुम्क च्वना बिज्यानाच्वन । उकिं हानं इन्द्र, महाब्रम्हा आदि देवतापिसं याकनं धर्म उपदेश बिया बिज्याहुं धकाः बिन्ति यासेलि तथागतं जिं कष्टसियाः लानागु ध्व ज्ञान मनूतय्सं थुइके फइमखु धकाः सुम्क च्वना बिज्यात । थुगु हे इलय् मगध देशय् मनूतय्गु पाप बढे जुयाः महाउत्पात जुयाच्चंगुलिं थनया मनूतय् धर्म उपदेश बियाः याकनं रक्षा याना बिज्याहुं धकाः बिन्ति याःगु न्यनाः धर्मचक्र प्रवर्तन यानाः मगध देशय् च्वपिं मनूतय् धर्म उपदेश बीगु जुल धकाः महाब्रम्हायात आज्ञा दयेका बिज्यात । अले तुरुन्त हे भगवान् बुद्ध लोकहित यायेत काशी क्षेत्रया ऋषिपतन मृगमदावनय् धर्मचक्र प्रवर्तन यानाबिज्याइन धकाः देवलोकय् प्रचार जुल ।

३४. धर्मचक्र प्रवर्तन परिवर्त

तथागतं धर्मचक्र प्रवर्तन याये धकाः मती तयाः बुद्ध चक्षुं स्वया बिज्यानाः न्हापां ध्व धर्म सुयात कने, ध्व ज्ञान न्यनाः सु बोध जुइ धकाः बिचाः याना बिज्याःबलय् रुद्रक रामपुत्र व आराड कालामयात खना बिज्यात । तर थिपिं निम्हं मृत्यु जुइ धुंकूगुलिं शुद्ध सत्त्वपिं सु दु धकाः स्वया बिज्याःबलय् पञ्चभद्रवर्गीपिं न्याम्ह योगीत खन । अले थिमित निं धर्म उपदेश बी धकाः थिपिं च्वनाच्वंगु थासय् काशी देशय् बिज्यात । भगवान् बुद्ध काशी देशया मृगदावनय् बिज्याःबलय् पञ्चभद्रवर्गीपिसं खनाः खुदं तक तपस्या यानाः नं ज्ञान लाये मफयाः पवना नयाः

शरीर पुष्ट यानावल, ध्वयात भीसं सत्कार याः वने मखु धकाः च्वंच्वन । तर वसपोलया तेजं सुम्क च्वने मफया सत्कार याः वन । इमिसं वसपोलयात आर्यज्ञान प्रत्यक्ष स्वया बिज्याये धुन ला धकाः बन्ति यासैलि सकसितं हित सुख जुइगु मोक्ष वनेगु ज्ञान प्रत्यक्ष स्वये धुन । आः छिमित कने धकाः वया, ध्व धर्म छिमिगु आश्रव क्षय जुयाः दिव्यचक्षुं ध्व धर्म प्रत्यक्ष खनी धकाः आज्ञा दयेका बिज्यात । भगवान् बुद्ध धर्मचक्र प्रवर्तन यायेत मृगदावनय् बिज्यानाच्वन धैगु सियाः फुक्क देव मनुष्य वयाः जिमित मोक्ष वनेगु धर्म उपदेश बिया बिज्याहुं धकाः बन्ति यानाच्वन । थुकथं धर्मचक्र प्रवर्तन याना बिज्याइगु स्वये धकाः वयाच्वं पिं सकसितं द्वितीय प्रहरय् संरञ्जनी कथा व तृतीय प्रहरय् पञ्चभद्रवर्गी भिक्षुपिं, ब्रम्हा आदि देवतापिन्त मोक्ष वनेगु आर्य अष्टाङ्गिक मार्ग व चतुआर्य सत्यया ज्ञान उपदेश बिया बिज्यात । अले पञ्चस्कन्ध षडायतन फुक्क हेतु धकाः सीका ध्व ज्ञान स्यूम्हेसित बुद्ध धाइ धकाः भगवान् बुद्ध उपदेश बिया बिज्यात । ध्व धर्म उपदेश न्यनाः पञ्चभद्रवर्गीपिं मध्ये कौण्डिन्यात न्हापां ज्ञानचक्षु प्राप्त जुल । अनं वाष्प, भद्रीय, महानाम व अश्वजितपिन्त ध्व ज्ञान प्राप्त जुल । अले पञ्चभद्रवर्गीपिं, ब्रम्हा आदि देवतापिं, मनूत सकलें ल्यूल्यू तयाः धर्मचक्र प्रवर्तन याना बिज्यात ।

३५. ब्रम्हादिस्तुति परिवर्त

वसपोल तथागतं देवतापिं सकस्यां धर्मया खँ न्यने धकाः इच्छा याः गु सियाः पञ्चभद्रवर्गीपिन्त स्वयाः छिमित सद्धर्मया खँ संक्षिप्त कने धकाः पञ्चस्कन्धया खँ कना बिज्यात । अले ध्व न्यागू स्कन्ध दुःखया मूल खः धकाः सिइकाः चतुब्रम्ह विहारय् च्वना जन्म जरा व्याधि मरण जुइ स्वाक मोक्ष फल लाना वनेगु स्व धकाः तथागतं आज्ञा दयेका बिज्यात । अले अन बिज्यानाच्वं पिं देवतापिं मध्ये अवलोकितेश्वर लोकनाथया काय् चतुर्मुख ब्रम्हा, लोकेश्वरया नुगलं पिहांवः मह विष्णु, लोकनाथया कपालं पिहांवः मह महादेव, इन्द्र आदि देवतापिन्त क्लेश नास यानाः पाप कर्म यायेगु त्वः ता चतुब्रम्हा विहारय् च्वनाः दशपारमिता लायेगु स्व धकाः भगवान् बुद्ध आज्ञा दयेका बिज्यात । नापं वसपोलं कना बिज्याः गु आर्य अष्टाङ्गिक मार्ग व चतुआर्य सत्यया खँ न्यनाः फुक्क देवतापिं खुसि जुयाः न्ह्याबलें बोधिचर्या व्रत याये धकाः ल्हाः बन्ति यानाः प्रशंसा याना बिज्यात ।

३६. नालक मुनिचर्या परिवर्त

भगवान् बुद्ध पञ्चभद्रवर्गीपिं नापं थः गु देशय् बिज्यायेत्यंबलय् भद्रागी देवताया अनुरोध कथं बुद्ध धर्मया खँ न्यंकाः गोष्ठिक ब्राम्हणपिं सकसितं बोध यानाः

भिक्षु याना बिज्यात । थुमिगु प्रभावं सुचिर ब्राम्हण प्रमुख फुक्क ब्राम्हणपिसं भगवान बुद्धयात पालि भवपुयाः जिपिं भिक्षु जुइ धकाः बित्ति यायेवं भगवान बुद्धं इमित चतुआर्यया खँ कनाः बोध जुइवं भिक्षु यानाः त्रिरत्नया नां कयाः जगत् हित जुइगु ज्या या धकाः आज्ञा दयेका बिज्यात । थुकुन्हु हे बुद्धया शरणय् वनाः पूर्ण ऋषि भिक्षु चर्या याना बिज्याः गु खनाः शिष्यपिं सकसितं भिक्षु चर्या यायेत भगवान बुद्धयात बित्ति याय्वं सकसितं चूडाकर्म याना बिज्यात । थथे हे सद्धर्म लाये धकाः इच्छा यानाच्चंम्ह नालक असित ऋषि ब्वनाः बुद्धयाथाय् वनेत वन । नालक भगवान बुद्धया न्ह्योने वनाः जितः भिक्षु चर्या यानाः मोक्ष वनेगु ज्ञान उपदेश बिया बिज्याहुं धकाः बित्ति यासेलि भिक्षु याना बिज्यात । अले नालक नापं वःम्ह वया पाजु धृत ऋषि व वया ५०० म्ह शिष्यतय्सं नं भगवान बुद्धयात जिमिसं तं बोधिचर्या व्रत याये भिक्षु याना बिज्याहुं धायेवं थिपिं सकसितं भिक्षु यानाः थःगु संघय् दुकया बिज्यात ।

३७. यशोदकुमार प्रवज्या परिवर्त

यशोदकुमार जन्म जुइन्ह्यो हे तःधिकः जुइवं छँ त्वःता वनी धकाः स्युगलिं मांबौपिसं बांलाक बिचाः यानातल । यशोदकुमारया नं पूर्व जन्मया खँ लुमका गबलें चूडाकर्म याःवने धकाः मती तयाच्चन । छन्हु यशोदकुमारया दाजुकिजापिसं भगवान बुद्धया धर्म उपदेश न्यनावया वयात कनेवं यशोदकुमारं फुक्क त्याग यानाः भिक्षु चर्याय् च्वने धकाः मती तल । छन्हु ई स्वयाः सुगति धैम्ह पासा ब्वनाः छँ पिहां वंबलय् लैय् भगवान बुद्ध नापलाय्वं वसपोलया पालि भवपुयाः बित्ति यानाच्चन । थुबले भगवान बुद्ध चतुआर्य सत्य आज्ञा दयेका बिज्यायेवं यशोदकुमार या इन्द्रिय फुक्क नास जुयाः ऋषिश्वर समान समर्थवान् जुयावल ।

उखे छँय् यशोदकुमार मदया मांबौ सकस्यां मामां भगवान बुद्ध बिज्याना च्वंथाय् माःवन । अन भगवान बुद्धं आज्ञा जुइवं यशोदकुमार आकाशय् थहां वनाः पुरुषार्थ क्यन । थुबले यशोदकुमारया मांबौपिं खुसिजुयाः बुद्धयात नमस्कार यानाः यशोदकुमारयात छलपोलया धर्मय् तया बिज्याहुं धकाः बित्ति यायेवं भगवान बुद्धं भिक्षु यानाः शील स्वभाव भिंका ब्रम्हचर्याय् च्वं धकाः आज्ञा दयेका बिज्यात । यशोदकुमारया पासां नं बोधिचर्या व्रत याये धकाः बित्ति यासेलि भिक्षु यानाः बुद्ध थःगु धर्मय् तयाबिज्यात । थुकथं यशोदकुमार अर्हत पद लाःगु खनाः भिक्षुपिं सकलें विस्मय चायाः पूर्वजन्मय् छु धर्म याना वःगुलिं थौं थथे जुल जिमित कना बिज्याहुं धकाः बित्ति यासेलि भगवान बुद्धं यशोदकुमारया पूर्व जन्मया खँ नं कना बिज्यात ।

३८. दिवोदासराजा प्रवज्या परिवर्त

छन्हु काशी देशय् स्वस्तिक धैम्ह निर्धनी किसानी ब्राम्हणं भगवान बुद्धयात क्षीर भोजन याकूगुलिं इमिप्रति करुणा तयाः बुद्धं तछ्व स्वंगः बियाबिज्यागु थःगु बुँइ पिनाः कन्हय्कुन्हु स्वःवंबलय् लुँयागु तछ्व सयाच्चंगु खनाः आश्चर्य चायाः दक्को तछ्व कयाः खुब्बय् छब्ब जुजुयात बिइ धकाः जुजु दिवोदासयात नापलाना जुक्को खँ कनाः खुब्बय् छब्ब लुँ न्ह्योने तयाबिल । जुजु नं खुसि जुयाः ध्व लुँ जितः म्वाल भगवान बुद्धयात पुजा यानाब्यु धकाः लित बियाहल । जुजु भगवान बुद्धयाथाय् बिज्यायेवं ब्राम्हण नं बुद्धं कना बिज्याइगु धर्म उपदेश न्यने धकाः ल्यूल्यू वन । मृगदावनय् भगवान बुद्धं जुजुयात चतुआर्य सत्यया धर्म आज्ञा दयेका बिज्यागु न्यनाः खुसि जुयाः भिक्षुपिं सहित बुद्धयात कन्हय्या निम्ति निमन्त्रणा यानाः लिहां वन । कन्हय्छुन्हु भगवान बुद्ध काशी नगरय् बिज्यानाः राजकुलय् थ्यंका भोजन याके धुंकाः जुजुया चित्त शुद्ध जूगु खनाः जुजुयात छलपोलं बोधिचर्या यानाबिज्याहुँ, न्ह्याबलें दान धर्म यात धाःसा मभिंगु गती वनेमाली मखु धकाः आज्ञा दयेका बिज्यात । अले व ब्राम्हणं नं भगवान बुद्धयात निमन्त्रणा यानाः भोजन याका लिपा बुद्धयाथाय् वनाः जि बोधिज्ञान लाये धकाः छलपोलया शरणय् वया, जितः चूडाकर्म यानाः ब्रम्हचर्याय् तयाबिज्याहुँ धकाः बित्ति यायेवं भगवान बुद्धं ब्राम्हणया चित्त शुद्ध जूगु खनाः चूडाकर्म यानाः थःगु शासनय् दुकया बिज्यात ।

३९. गांगेय नाविक प्रवज्या परिवर्त

छन्हु भगवान बुद्ध थाय्थासय् बिज्यानाः मनूतय्त उद्धार याये धकाः मृगदावनं पिहां बिज्यानाः गङ्गा खुसिया तीरय् बिज्याःगु खनाः गांगेय माफ्ति खुसिजुयाः पालि भवपुयाः न्हापायागु खँ लुमना पश्चात्ताप चायाः नमस्कार यानाः न्हापा छलपोलयात यानागु अपराधयात क्षमा यानाः डुंगाय् बिज्याहुँ धकाः बित्ति यात । तर डुंगा अन हे पैँचाय् तुनावन । वहे डुंगाय् भगवान बुद्ध बिज्यायेवं डुंगा चले याये धकाः स्वःबलय् चले याये मफुगु खनाः भगवान बुद्धं माफियात छं दस्तुर कयाः न जक नयाच्चन, डुंगा नं सफा मयाः ध्व यच्चुक सिलाछ्वल कि तिनि पं कं छुटे जुया पार वनी, वथें छंके च्वंगु राग द्वेषरूपी पापयात सिलाः निर्मल याये फुसा मोक्ष फल लाये दै । काय्, वाक, चित्त शुद्ध यानाः ब्रम्हचारी जुयाः इन्द्रिययात बसय् कयाः समाधि यात धाःसा जक निर्वाण पद लाइ धकाः भगवान बुद्धं आज्ञा दयेकूगु न्यनाः गांगेय माफ्ति बोध जुयाः गंगायागु लखं छ्वाकाः डुंगा सिसैलि पं कं छुटे जुयाः तुरुन्त पार यानाबिल । अले डुंगां व्वाहां वया गांगेय माफ्ति भगवान

बुद्धया पालि भवपुयाः छलपोलया उपदेश न्यना जि बोध जुइ धुन जितः नं निर्वाण पद लाइगु धर्मय् तयाबिज्याहुँ धकाः बित्ति याःगु न्यनाः भगवान् बुद्धं व गांगेय माभियात भिक्षु याना बिज्यात ।

४०. फुल्लविल्वादि प्रवज्या परिवर्त

अनं भगवान् बुद्ध आकाशमार्ग व्वयाः समाधियागु प्रभावं द्वःछिम्ह जटाधारी योगीपिं उत्पन्न यानाः गयाय् बिज्यानाः फुल्लविल्वा काश्यपया नाग दुगु अगिमथलय् दुहां वनाः ध्यान याना व नागयात बोध यानाः पिहां बिज्याःगु खनाः सकलें आश्चर्य चायाच्वन । काश्यप ऋषि तं आश्चर्य चायाः न्यासः शिष्यपिं सहित बोधिचर्या व्रत यायेगु इच्छा याना बिज्यात । नापं ध्वया किजापिं नदि काश्यप व गया काश्यप ऋषिपिं, भिंचा उपसेन ऋषि तं स्वसः स्वसः शिष्यपिं सहित बोधिचर्या व्रत यायेगु इच्छा याना बिज्यात । थिपिं फुक्कसिगु इच्छाकथं ऋषिपिन्त चूडाकर्म यानाः भिक्षु याना बिज्यात ।

४१. सुजातादि प्रवज्या परिवर्त

भगवान् बुद्ध किंस्वसः भिक्षुपिं मुंकाः धर्मारण्य वन उरूविल्वागामय् बिज्याःबलय् नन्दिक धैम्ह द्वाःन्या खुसि जुयाः सुजाता आदि भिम्ह म्हायाय्पिसं पुजा याकाः धर्म कथा न्यने धकाः बित्ति यानाच्वन । भगवान् बुद्धं नं सकसितं रक्षा जुइगु बोधिचर्या व्रत यायेगु धर्म उपदेश बिया बिज्यात । अले नन्दिक द्वाःन्याया सुजाता आदि भिम्ह म्हायाय्पिं बोधिचर्या व्रत यायेगु इच्छा यानाः बौयाके वचन कयाः भगवान् बुद्धयाथाय् वनाः न्हापा छलपोलं तपस्या याना बिज्याःबलय् छलपोलयात क्वलः, हामो आदि भोजन याकाच्वनापिं दासिपिन्त मोक्षफल लायेत बोधिचर्या व्रत यानाः चूडाकर्म याये धकाः इच्छा यानाच्वना धकाः बित्ति यात । सुजाता आदि सकस्यां चित्त शुद्ध जूगु खनाः भगवान् बुद्धं सकसितं चूडाकर्म याना बिज्यात ।

४२. विम्बिसार नराधिप समागम परिवर्त

छन्हु राजगृहया जुजु विम्बिसारं भगवान् बुद्धयात लुमंका आःतकं भगवान् बुद्ध थन बिमज्यानि धकाः दुःख तायाच्वंम्ह जुजुयात भगवान् बुद्ध थःगु राज्यय् बिज्याये धकाः उरूविल्वा गामय् बिज्याना च्वन । वसपोलयात निमन्त्रणा याना बिज्याहुँ धकाः शुद्धानन्द पुरोहितं बित्ति याःगु न्यनाः विम्बिसार जुजु खुसि जुल । अले जुजुं सकलें मुंकाः भगवान् बुद्ध बिज्यानाच्वंगु यष्टि वनय् वनाः धर्मया खँ न्यने

धकाः इच्छा याःथे अन भगवान बुद्ध धर्म उपदेश ब्यूगु न्यनाः सकलें बोध जुल ।
 थुकथं जुजु बोध जूगु खनाः भगवान बुद्ध आसनं दनाः जुजुयात आशिर्वाद बियाः
 भिक्षुपिं सकलें मुंकाः आम्रवनय् बिज्यात ।

४३. शालिपुत्र मौगल्यायन परिवर्त

भगवान बुद्ध आम्रवनय् बिज्यायेवं सकलें वयाः नमस्कार यानाः पुजा यानाः
 धर्म कथा न्यने धकाः च्वनाच्वन । थुबले राजगृहया नारद धैगु गामय् च्वंम्ह
 शालिपुत्र व कोलिका गांया मौगल्यायन निम्हं वेदय् पारंगत जुइधुनेवं निम्हस्यां
 संसार अनित्य धैगु सिइका राजगृह नगरय् वनाः संजयी धैम्ह संन्यासीयाथाय् वनाः
 संन्यासी जुल । निम्हस्यां धर्म शास्त्रं पूर्ण यानाः ज्ञानं बिचाः यानाः स्वःबलय् ध्व
 धर्म मोक्ष वनेगु लँ मखना ध्वयासिनं तःधंगु मोक्ष वनेगु धर्म माःवने माल धकाः
 सल्हा यानाः निम्ह निगू दिशा स्वयाः वन ।

थुबले शालिपुत्र उपसेन भिक्षु नापलाना छलपोल सु ? गन बिज्याये त्यना
 धकाः न्यंसेलि उपसेन भिक्षुं जि भगवान बुद्धया सेवक खः जि भिक्षा फवने धकाः
 वया धकाः आज्ञा दयेकूगु न्यनाः छलपोलया गुरुं छु धर्म उपदेश बिया बिज्यात
 जितः कना बिज्याहुँ धकाः बित्ति यात । अले उपसेनं भिक्षुं जिमि गुरु तथागतं आज्ञा
 दयेका बिज्याःगु धर्म संसारय् न्यागू हेतु उत्पत्ति जुयाच्वंगु न्हयगू धर्म दु । ध्वयात
 निरोध यायेगु प्रतित्यसमुत्पाद, प्यंगू आर्य सत्ययागु धर्म खः धकाः कना बिज्यात ।
 थुलि ज्ञान दयेके मात्रं शालिपुत्रया चित्त निर्मल जुयाः धर्म चक्षु उत्पत्ति जुयाः गुरु
 लुल धकाः खुसि जुयाः मौगल्यायन नापलानाः गुरुरागु खबर न्यनावये धुन धकाः
 आज्ञा दयेकल । गुरुं उपदेश ब्यूगु धर्म शालिपुत्रं आज्ञा दयेके मात्रं मौगल्यायनया
 चित्त निर्मल जुयाः धर्म चक्षु उत्पत्ति जुल । अले शालिपुत्र वेणुवनय् बिज्यानाः
 भगवान बुद्धया पालि भवपुयाः जिमित बोधिज्ञान साधन याये फैगु धर्म उपदेश
 बियाबिज्याहुँ धकाः बित्ति याःगु न्यनाः भगवान बुद्धं सकसितं भिक्षु यानाः संघय्
 दुकया बिज्यात । नापं भगवान बुद्धं संसारय् अबिद्यां यानाः तृष्णा प्रत्यय जुयाः
 प्राणीपिं जन्म जुयाः थम्हं यानावयागु कर्म अनुसारं सुख दुःख भोग यानाच्वन धकाः
 आज्ञा दयेका बिज्याःगु न्यनाः शालिपुत्र व मौगल्यायन प्रमुख भिक्षुपिं सकलें बोध
 जुल । अले शालिपुत्र व मौगल्यायन निम्ह भिक्षुपिं मध्ये मुख्यपिं शिष्य जुयाः भगवान
 बुद्धया जवय् व खवय् बिज्यानाच्वन ।

४४. कुशलानन्द आनन्द प्रवज्या परिवर्त

शालिपुत्र, मौगल्यायन आदि भिक्षुपिं मुंका भगवान बुद्ध मगध देशय् बिज्यानाः अनं श्रावस्तीपुरय् बिज्यात । श्रावस्तीपुरय् थ्यंका जेत ऋषि बिज्यानाचवंगु वनय् दुहां बिज्याः बलय् जेत ऋषि खुसि जुयाः भगवान बुद्धया पालि भवपुयाः कुशल वार्ता याना बिज्यात । थुबले मिथिला नगरय् च्वंपिं जनतातय् धर्म कथा न्यनेगु इच्छा यानाचवगुलिं भगवान बुद्धं सकसितं बोधिचर्या व्रत यायेगु धर्म उपदेश बियाः बोध याना बिज्यात । कुशलानन्द ब्राम्हणनं उपदेश न्यना थःगु छँ लिहां वयाः आनन्द ब्राम्हण्यात भगवान बुद्धया उपदेश न्यनाः वया धायेवं भगवान बुद्ध गन बिज्यानाचवन, छु धर्म आज्ञा दयेका बिज्यात धकाः न्यन । कुशलानन्द बुद्धया उपदेश कंगु न्यनाः कुशलानन्द नाप आनन्द भगवान बुद्ध बिज्यानाचवंगु जेत ऋषिया आश्रमय् वनाः भगवान बुद्धया पालि भवपुया, नमस्कार यानाचवन । निम्हसिगुं चित्त निर्मल जूगु खनाः भगवान बुद्ध इमित चतुआर्य सत्यया खँ कनेवं निम्हं बोध जुयाः निम्हं भिक्षु जुल । भगवान बुद्ध जेत ऋषिं दान याना बिज्याःगु जेतवन विहारय् दच्छितक च्वना बिज्यात ।

४५. नरदत्तादि ऋषिगण प्रवज्या परिवर्त

दच्छितक जेतवन विहारय् बिज्यानाचवबलय् असित ऋषिया भिंचा नरदत्त ऋषि जेतवन विहारय् बिज्यानाः भगवान बुद्धयाथाय् वनाः छलपोलया स्मरण यानाः भिक्षु जुइ धकाः इच्छा यानाचवना जितः चूडाकर्म यानाः बोधिचर्या व्रतया धर्म उपदेश बियाबिज्याहुँ धकाः बित्ति यात । भगवान बुद्ध वयात भिक्षु यानाः थःगु शासनय् दुकया स्यनेकने याना बिज्यागुलिं नरदत्त ऋषिं अर्हत् पद प्राप्त याना बिज्यात । थथे हे शाक्य ब्राम्हणी व पद्मा ब्राम्हणी निम्हं जेतवन विहारय् वनाः भगवान बुद्धया शरणय् वनाः चूडाकर्म याना बिज्याहुँ धकाः बित्ति याःगुलिं निम्हसितं चूडाकर्म यानाः सुजातापिं नापं च्वना बोधिचर्या व्रत यानाचव धकाः आज्ञा दयेका बिज्यात ।

थथे हे रुद्रक रामपुत्र मदयेवं वया न्हय्सः शिष्यपिं, रेवतमुनि जेतवन विहारय् बिज्यानाः जिमित भिक्षु याना बोधिचर्या व्रत याकाबिज्याहुँ धकाः बित्ति यासैलि भगवान बुद्धं चूडाकर्म यानाः थःगु शासनय् दुकया बिज्यात । अन श्रावस्तीपुरय् च्वंपिं पूर्ण महाजन, अनाथपिण्ड महाजन प्रमुख यक्को मनूतय्त धर्म उपदेश बियाः भगवान बुद्ध निदँतक जेतवन विहारय् च्वना बिज्यात । अले भगवान

बुद्ध जेतवन विहारं पिहां बिज्यानाः वेणुवनय् बिज्यानाः सकसितं धर्म उपदेश आज्ञा दयेका बिज्यात ।

४६. उदायी छन्दक प्रबज्या परिवर्त

थुकथं भिक्षुपिं मुंकाः भगवान् बुद्ध वेणुवनय् च्वनाबिज्याना च्वंबलय् जुजु विम्बिसारं नं थः परिवार सहित भगवान् बुद्धयाथाय् बिज्यानाः उपदेश न्यनाः बुद्धया सेवा यानाच्वन । उखे कपिलवस्तु नगरय् च्वंपिं मनूतय्सं सिद्धार्थकुमार बुद्ध जुयाः धर्म उपदेश बियाच्वन धैगु खँ सियाः गुबले वसपोलया ख्वाः स्वये दइ धकाः सकलें तत्पर जुयाच्वन । छन्हु सकसिगुं बिन्ति न्यनाः शुद्धोदन महाराजं बुद्धयात निमन्त्रणा याके छ्व धकाः मन्त्रीतयूत आज्ञा बिल । महाराजया आज्ञा न्यनाः राजकुमारया योपिं पासापिं छन्दक व उदायी निम्हसित वेणुवनय् वनाः बुद्धयात निमन्त्रणा याना वा धकाः छ्वत । निम्हं वेणुवनय् वनाः वसपोलया पालि भवपुयाच्वनेवं भगवान् बुद्ध छिपिं फुक्क कुशल जू मखुला धकाः आज्ञा दयेका बिज्यात । अले उदायी व छन्दक निम्हस्यां शुद्धोदन महाराजं छलपोलया धर्म न्यनेगु इच्छा जुयाः जिमित छ्वयाहल, भिक्षुपिं मुंकाः थःगु देशय् बिज्यानाः धर्म उपदेश बिया बिज्याहुं धकाः बिन्ति यात । थ्व खँ न्यनाः भगवान् बुद्ध थः बौ शुद्धोदन, कलाः यशोधरा, मां गौतमी, किजा देवदत्तपिनिगु खँ कं धकाः आज्ञा दयेका बिज्यायेवं ग्याग्यां वसपोलं गृहत्याग यायेधुंकाः जूगु घटना फुक्क कनाः छलपोल बिमज्यायेकं अन्धकार नाश जुइमखु धकाः बिन्ति यात । थ्व खँ न्यनाः निम्हसितं भगवान् बुद्धं चूडाकर्म यानाः थःगु संघय् दुकया बिज्यात । निम्हस्यां न्हिथं समाधि धारणी बिद्या साधन यानाः अर्हत् पद प्राप्त यात ।

छन्हु उदायी भिक्षु न्हापा जुयाबिज्याःपिं तथागतपिसं थें छलपोलं थःगु राज्यय् बिज्यानाः सकसितं धर्म उपदेश बियाः उद्धार याना बिज्याहुं धकाः बिन्ति याना बिज्यात । उदायी भिक्षुया बिन्ति न्यनाः शालिपुत्रं छलपोल भिक्षुपिं मुंकाः थःगु राज्यय् बिज्यानाः मांबौ, दाजुकिजा बन्धुपिं सकसितं बोध यानाबिज्याहुं धकाः बिन्ति याःगु न्यनाः भगवान् बुद्ध आसनं दनाः भिक्षुपिं मुंका उदायी, छन्दक न्ह्यःने तयाः थःगु राज्यय् वने धकाः वेणुवन त्वःता बिज्यात । ववं थःगु राज्यय् थ्यंकाः अन च्वंगु न्यग्रोधाराम आश्रमय् दुहां बिज्यानाः भिक्षुपिं मुंकाः सभा दयेका बिज्यात ।

४७. पितापुत्र समागम परिवर्त

भगवान् बुद्ध कपिलवस्तु नगरया न्यग्रोधारामय् बिज्यानाच्वन धैगु खँ न्यनाः

बुद्धया दर्शन याः वनेत शुद्धोदन महाराजां गौतमी महारानी, यशोधरा, दाजुकिजापिं, शाक्य कुमारपिं, मन्त्री, पुरोहित, प्रजात सकलें मुंका बिज्यात । कपिलवस्तु नगरय् भिक्षा बिज्यापिं भिक्षुपिन्त महाराजं छिमिगु ख्वाः स्वयेगु इच्छा मयाः धकाः देवदत्तं लित छूवयाबिल । देवदत्तं शुद्धोदन महाराजायात नं बोध यानाः दरबारय् लित हल । उखे भिक्षुपिं लिहां वःगु खनाः बुद्धं छायां लिहां वया धकाः न्यना बिज्यायेवं फुक्क खँ बित्ति यात । भगवान् बुद्धं नं अयसा नगरय् भिक्षा पवनेमते, जिमि बौ शुद्धोदनयात थन ब्वनाहजि धकाः उदायीयात आज्ञा दयेका बिज्यात । उदायी नं शुद्धोदन महाराजाया सभाय् बिज्यानाः ऋद्धि प्रतिहार्य क्यनाः भगवान् बुद्धया सत्गुणया महात्म्य कनाः बोध याना बिज्यात । अले उदायी भिक्षुं छलपोल भगवानयाथाय् बिज्यायेवं संघ सहित वसपोल दरबारय् बिज्यानाः सकसितं हित जुइगु धर्म उपदेश बियाबिज्याइ धकाः आज्ञा दयेकूगु न्यनाः शुद्धोदन महाराजां छलपोलया खँ न्यनाः जि बोध जुल, छलपोलया धर्म न्यनेगु इच्छा जुल धकाः बित्ति यायेवं उदायी भिक्षुं चतुआर्य सत्यया खँ कनाः महाराजां ब्यूगु पिण्डपात्र कयाः जुजुयात आशिर्वाद बियाः आकाश मार्गं न्यग्रोधारामय् बिज्यात । अन थ्यंकाः भगवान् बुद्धं छु उपदेश बिया धकाः आज्ञा दयेकें उदायी भिक्षुं छलपोलया आज्ञा थें अन वनाः धर्म उपदेश बियाः जुजुयात बोध याये धुन, याकनं हे थन बिज्याइ धकाः बित्ति यायेवं भगवान् बुद्ध प्रसन्न जुया बिज्यात ।

उखे दरबारय् शुद्धोदन महाराजां गौतमी महारानी, यशोधरा, शाक्य कुमारपिं, इष्टमित्र, प्रजापिं सकलें मुंका न्यग्रोधारामय् बिज्यात । अन वसपोलं चतुर्महाराजा, वज्रपाणि आदि ऋषिमुनि, भिक्षु, प्रत्येक शुद्ध, बोधिसत्त्व, चक्रवर्ती जुजुया रूप कया दर्शन बिया बिज्यात । थ्व खनाः सकलें आश्चर्य चायाः भगवान् बुद्धयात नमस्कार यात । अले वसपोलं थःगु छचनय् च्वंगु अमृतयागु सार कयाः गौतमीयात तयेकेवं मिखां खनाः खुसि जुल । उबले भोजनया निमित्तं सकलें राजकुलय् बिज्याहुँ धकाः शुद्धोदन महाराजां बित्ति यासेलि भगवान् बुद्ध सुम्क च्वना बिज्याना च्वन । कन्हय् खुन्हु दूतत छूवयाः भगवान् बुद्धयात राजकुलय् बिज्याहुँ धकाः बित्ति याके छूवसेलि भगवान् बुद्ध भिक्षुपिं मुंकाः राजकुलय् दुहां बिज्यानाः आसनय् बिज्यात । थः परिवार सकलें च्वनाः पुजा यानाः भोजन याके धुनेवं शुद्धोदन महाराजां धर्म कथा न्यने धकाः बित्ति याना च्वन । भगवान् बुद्धं नं सकसितं हित जुइगु चतुआर्य सत्ययागु धर्म उपदेश बियाबिज्यानाः सकसितं बोध यानाः आशिर्वाद बियाः भिक्षुपिं मुंकाः न्यग्रोधारामय् बिज्यात ।

४८. राहुल भद्र प्रशंसाभिबोधिनी परिवर्त

थुकथं भगवान् बुद्ध न्यग्रोधाराम्य बिज्यानाः सकसितं बोध यानाबिज्याना च्वन । शुद्धोदन महाराजां राहुलयात बौ म्हसीका बीमते, वं नं गृहत्याग याइ धकाः यशोधरायात आज्ञा दयेका बिज्यात । न्हिन्हि थें छन्हु गौतमी महारानी निमन्त्रणा यासैलि भगवान् बुद्ध भिक्षुपिं नापं मांया अन्तपुरय् बिज्यात । थुबले राहुलकुमार यात अन हयाः भगवान् बुद्धया किपालुं दायेके मात्रं राहुलया रूप बांलानाः पापमोचन जुल । भगवान् बुद्ध लिहां बिज्यायेधुंकाः राहुलभद्रं थः सुन्दर जूगु खनाः खुसि जुयाः थः मांयाके जि बौ गन बिज्यात ? भीगु राजगृहय् बिज्यानाच्वंम्ह सु ? वसपोलया किपालुं दायेमात्रं जिगु रूप बांलाना वल, सत्य खँ कनाबिज्याहुँ धासैलि सत्य खँ कंसा सःसःअबु तँचाइ धकाः ग्याःसां कर्मय् च्वयाहःथें जुइ धकाः बौयागु खँ कन्हय् कने धकाः यशोधरां काय्यात बोध यात । कन्हय्कुन्ह राहुल कुमार थः बौया खँ न्यने धकाः मांयाथाय् वनाः बौया खँ कना बिज्याहुँ धकाः बिन्ति यात । थुबले हे भगवान् बुद्ध दरबारय् बिज्यानाच्वंगु खनाः यशोधरां काय्यात छं बौ राजकुमार बोधिरत्न ज्वना बिज्यानाच्वन याकनं स्वःवा धकाः झ्यालय् वंबलय् धवाकां दुहां बिज्यानाच्वंगु खनाः नमस्कार यानाः हुं का छं बौ बिज्यात, छं स्वये धकाः इच्छा यानाच्वंगु यक्को दत, याकनं दर्शन या धकाः भगवान् बुद्धयात क्यनाः भगवान् बुद्धया गुण प्रशंसा याना बिज्यात ।

थुकथं मामं थः बौया खँ फुक्क कनाबिज्याःगु न्यनाः राहुल कुमार विस्मय चाया मुसुमुसु न्हिलाच्वन । भोजन सिधयेका भगवान् बुद्धं सकसितं हित जुइगु प्यंगू आर्य सत्ययागु धर्म कनाबिज्याना सकसितं आशिर्वाद बियाः न्यग्रोधाराम्य बिज्यात । थुकथं हे शुद्धोदन महाराजाया दाजुकिजापिं शुक्रोदन, अमृतोदन, घौतोदन आदि सकसिनं निमन्त्रणा यानाः भगवान् बुद्ध सहित भिक्षुपिन्त भोजन याका बिज्यात । छन्हु यशोधराया नं थःगु अन्तपुरय् थः स्वामी भगवान् बुद्धयात बिज्याकेगु इच्छा जुयाः शुद्धोदन महाराजाया बचं कयाः भिक्षु संघ सकसितं निमन्त्रणा यानाः भोजन याकाः भगवान् बुद्धं कना बिज्याःगु बोधिचर्या व्रत यायेगु धर्म उपदेश न्यनाः बोध जुल ।

४९. यशोधरा राहुलभद्र कर्म विपाक परिवर्त

थुकथं सकस्यां पुजा याकाः न्यग्रोधाराम्य च्वनाबिज्याना च्वंबलय् छन्हु सभाय् च्वपिं सकस्यां यशोधरां छु पाप यानाबिज्यागुलिं पुखुली, मी, भीरं कुर्के छ्वल, खुदैतक गर्भ धारण यायेमाल ? अथे हे राहुल कुमार खुदैतक गर्भवास च्वनेमाल,

छ्वाः बिरूप जुल धकाः बन्ति याः गु न्यनाः भगवान् बुद्धं यशोधरा राहुल निम्हसिगुं
 पूर्व जन्मया खँ कना बिज्यात । न्हापा विदेहया सुपुर धैगु गामय् भद्राहरिणी धैपिं
 निम्ह माचा सा म्ये लहिनाः, धौ-दुरु मियाः जीविका यानाच्वन । छन्हु म्हायम्ह
 हरिणी मांम्हेसित झ्यातुगु दुरु घः ज्वंकूगुलिं ज्वने मफया बुलुं वनाच्वन । म्हायम्हं
 न्हापान्हापा वनाः लिफः स्वःबलय् बुलुं वयाच्वंगु खनाः याकनं वा, जितः दुःख
 ब्यूवःम्ह छ बुरियात मि छवयेकाः मी कुर्के, पुखुली कुर्के, भीरं कुर्काछवये धकाः
 मांयात निन्दा यानाः तँम्वंयेका वन । थुकथं म्हायम्हं सराः ब्यूगुलिं मिखाय् ख्वबि
 तयाः तसकं दुःख तायाः मतिमति छं हे भोगय् याये मालेमा धकाः धयाः खुक्वय्तक
 झ्यातुगु दुरु घः ज्वनाः दुरु मिया छँय् लिहां वल । ध्वहे पापं हरिणी धैम्ह म्हायम्ह
 यशोधरा धायेका जन्म जुयाः खुदँतक झ्यातुगु गर्भ धारण यायेमाल ।

थयेहे राहुल कुमार नं थम्हं याना वयागु कर्म भोग यात । न्हापा विदेहया
 मिथिला नगरय् जुजु पुष्पदेवया चन्द्र व सूर्य धैपिं निम्ह कायपिं दु । जुजु सीवं
 पुरोहितं दाजुम्हेसित जुजु जुया बिज्याहुँ धकाः बन्ति यात, तर माने मजुसैं तपोवन
 वनाः मुनिचर्या यानाच्वने किजायात जुजु या धकाः धाःगु न्यनाः पुरोहितं
 किजाम्हेसित जुजु यात । छन्हु चन्द्र मुनिश्वरं थः गुरुया कमण्डलुइच्वंगु लः मन्त्यसैं
 त्वनेधुंकाः पश्चात्ताप चायाः आः जितः पाप लाइगु जुल, ध्व पाप मोचन यायेत
 जुजुयाथाय् वने धकाः सूर्य जुजुयाथाय् बिज्यानाः जूगु वृत्तान्त कना बिज्यात । तर
 जुजुं थुलि याना नं पाप लाइला ? मती संखा तया बिज्यायेमते धका बन्ति यातं
 मुनीश्वरं जुजुं दण्ड मयासैं ध्व पाप शोधन जुइ मखु धकाः आज्ञा दयेकूगु न्यनाः
 जुजुं कन्हय् पाप शोधन यायेगु ज्या याये धकाः धयाबिज्यागु न्यना बोध जुया जुजुया
 उद्धानय् बिज्याना सिमाक्वय् बिज्यानाच्वन । धयां नं माने मजुम्हेसित न्यान्हुखुन्हु
 अथें तयाति धकाः जुजुया राजकाज याना बिज्यानाच्वन । न्हय्न्हु दुखुन्हु
 स्वःबिज्याबलय् दाजुम्ह गंसि जुइका ध्यान याना बिज्यानाच्वंगु खनाः लज्जा चायाः
 पालि भवपुया ब्राम्हणपिन्त बोध याकाः भोजन याकाः क्षमा पवनाः थःगु आश्रमय्
 बिज्याहुँ धकाः बिदा बियाछवत ।

थुकथं दाजुयात विवेक मयासैं खुन्हुतक दालाकाः बन्धनय् तयातःगु पापं
 ध्व जन्मय् खुदँतक गर्भवास याये माल ।

५०. मातृपोष हस्ति जातक परिवर्त

न्हाबलें थें तःन्हु न्यग्रोधारामय् धर्म उपदेश बियाबिज्याना च्वंबलय्
 भिक्षुपिं सकस्यां यशोधरा छायां झ्यालं कुतु वल ? छायां मोह जुयाः छलपोलं

ल्हाःज्वनाः थनाबिज्याना ? यशोधरा छलपोलनाप बायाच्चने माःगु कारण छु जिमित कनाबिज्याहुँ धकाः बुद्धयात बित्ति यायेवं ध्वया कारण बुद्ध कना बिज्यात । जितः स्वयेत तत्पर जुयाः इयालं व्वस्वःबलय् स्मृतिहीन जुयाः इयालं कुतुं वल । पूर्व जन्मय् जि नं ध्वयागु कारणं संताप जुयाः दुःख सियावया । यशोधरा मनोहरा किन्नर कन्या धायेका जन्म जबलय् ध्वयागु ख्वाः स्वयेगु इच्छा जुयाः उखेंथुखें स्वः जुया । अथे हे थौं यशोधरा नं जिगु विरहनं ताप जुइका कामरूपी अग्निं दाह जुयाः मोह जुयाच्चन । थथे हे न्हापा काशी देशया इक्ष्वाकु जुजुया काय् वीरकुश धायेका जन्म जुयाः यशोधरा कन्याकुब्ज नगरया समुद्रक जुजुया म्हायाय् सुदर्शना धायेका जन्म जुल । जि बिरुप जूगुलिं निर्माया जुयाः त्याग यानाः थःछें वनाच्चन । वथें ध्व जन्मय् जि नं ध्वयात त्वःता तपोवन वना । अबले वीरकुश जि हे खः, सुदर्शना यशोधरा खः । अथे हे पूर्व जन्मय् बोधिज्ञान लाये धकाः सुप्रिय सार्थबाह धायेका लोक रक्षा याये धकाः बोधिसत्व जुयाः स्त्री आदि परिवारपिं सकलें त्वःताः वरदीप यात्रा यानाः दुष्कर चर्या यानाः बोधिचर्या व्रत यानावयागु पुण्यं बोधिज्ञान लाना धकाः भगवान् बुद्धं आज्ञा दयेका बिज्याःगु न्यनाः सकलें बोध जुल ।

छन्हु न्यग्रोधारामय् भगवान् बुद्धयात भिक्षुपिं उपासकपिसं गौतमी महारानी कां जुइ धुकूम्ह हानं गथे मिखां खन कना बिज्याहुँ धकाः बित्ति यासैलि थुकिया कारण भगवान् बुद्धं कना बिज्यात । न्हापा चन्द्रागिरी पर्वतया व्वसं च्वंगु छगू वनय् गजराज धायेका जन्म जुयाः बुरीम्ह मिखां मखंम्ह मांयात नके त्वंके यानाः सेवा यानाच्चन । छन्हु व किसियात मनुतय्सं घेरे यानाः खिपतं चिनाः नरदत्त जुजुयाथाय् यंकल । अन व किसियात नकेत्वंके याकलं मनसैं थः मां जक लुमंका ख्वबि हायेका च्वन । जुजु हे वयाः भोजन या धकाः धयाबिज्याःगु न्यनाः जुजुयात बोध याये धकाः मनूया भाषां जि मिखां मखंम्ह बुरिम्ह मां चण्डारण्य वनय् च्वनाच्चन, जि मखनेवं जिमि मामं जितः मालाच्चन जुइ । जि मांयागु ख्वाः मस्वसैं छुं नये मखु धाःगु न्यना जुजुया माया वनाः व किसियात बन्धन छुटे यानाबिल । किसि खुसि जुयाः चण्डारण्य वनय् वनाः थः मां नापलाना जुक्को खँ वृत्तान्त कन । अले काय्म्हं मांम्हसित सफा याना मिखाय् च्वंगु पिचः लिकाःबलय् मिखाया पिलि गुनाः मिखां खनाः काय्या ख्वाः खनाः खुसि जुल ।

थुकथं पूर्व जन्मय् किसि जुयाः जन्म जुयाबलय् नं जिमि मांया मिखां मखं, जिं उपकार यासैलि तिनि मिखां खन । मिखां मखंम्ह जिमि मां हस्तिनी गौतमी महारानी खः । गजराज धैम्ह किसि जि हे खः धकाः कनाबिज्यात ।

५१. सुन्दर नन्दादि पञ्चशत कुमार प्रवज्या परिवर्त

छन्हु शुद्धोदन महाराजा भगवान बुद्धया गुण न्यनाः बोध जुयाः शुद्धोदन महाराजां शाक्य कुमारपिं सःताः बुद्धया शरणय् वनाः बोधिचर्या व्रत याःसा छिमिगु इन्द्रिय शुद्ध जुयाः अर्हत् पद लाइ धकाः आज्ञा दयेकूगु न्यनाः कुमारपिं सकलें बोध जुयाः शुद्धोदन महाराजां आज्ञा जूथें वृत्तान्त फुक्क मांबौपिन्त कनाः मांबौपिंके बिदा कयाः राजकुलय् वन । थुकथं मुनाच्चपिं न्यासःम्ह राजकुमारपिन्त शुद्धोदन महाराजां न्यग्रोधारामय् वनाः बुद्धया शरणय् वनाः बोधिचर्या व्रत यानाच्च धकाः आज्ञा दयेका बिज्याःथें न्यग्रोधारामय् वनाः भगवान बुद्धयात दर्शन यानाः सुम्क च्वनाच्चन । शाक्य कुमारपिं सकस्यां चूडाकर्म याये धकाः बुद्धया न्ह्यःने वनाः बिन्ति यात । भगवान बुद्धं न्यासःम्ह शाक्य कुमारपिन्त चूडाकर्म यानाः थःगु शासनय् दुकया बिज्यात ।

५२. सकलानन्द जन्म राहुलभद्र प्रवज्या परिवर्त

छन्हु निमन्त्रणा यानातःथें गौतमी महारानीया अन्तपुरय् भोजन सिधयेका सकलें धर्म उपदेश न्यने धकाः च्वनाच्चन । थुबले राहुल कुमार भगवान बुद्धया किपालुइ वनाः विश्राम याये मात्रं चित्त शुद्ध जुयाः चूडाकर्म यायेगु इच्छा जुयाः भगवान बुद्धयात जितः पैतृक धन बियाबिज्याहुँ धकाः बिन्ति यात । भगवान बुद्धं जिके च्वंगु धन कायेगु जूसा जिगु शासनय् च्वनाः चूडाकर्म या धकाः आज्ञा दयेका बिज्याःगु न्यनाः राहुल कुमारया चूडाकर्म याये धकाः इच्छा यानाच्चन । भगवान बुद्ध थन चतुआर्य सत्ययागु धर्म आज्ञा दयेका बिज्याःगु न्यना राहुल कुमार बोध जुल । अले जिमि बौ नं थें ज्ञान लायेत चूडाकर्म यायेगु इच्छा जुल धकाः बिन्ति यानाः मां यशोधरा व अजि गौतमी महारानीयात नं बोध यानाः आशिर्वाद काल । थुकथं आशिर्वाद कयाः न्यग्रोधारामय् बिज्यागु शुद्धोदन महाराजां सियाः न्यग्रोधारामय् बिज्यानाः भगवान बुद्धयात राहुल कुमार चूडाकर्म याये धकाः वल ध्वयात भिक्षु यात धायेवं जिगु वंश छिन्न जुइ । उकिं राहुलया बिहाः यानाः मचा मदुतले छलपोल थन हे बिज्याहुँ धकाः बिन्ति याःगु न्यनाः बुद्धं ज्यू धकाः आज्ञा दयेका अन हे बिज्यानाच्चन । छय्चा राहुलयात ब्वना राजकुलय् लिहां वयाः गुखुन्हु छं काय्मचा दइ उकुन्हु छन्त छ्वंयाबी धकाः राहुलयात बोध याना बिज्यात । अले याकनं हे राहुल कुमारयात पुण्यमित्र शाक्यया म्हाय् कमला नापं बिहा यानाबिल । याकनं सन्तान दयेके धकाः राहुल कुमारया भोग यायेगुली उत्सुक जुयाच्चन । भगवान बुद्धया अनुभावं बिहा यानाः निला स्वला दयेवं गर्भ धारण जुयाः

भिला दयेवं कमलां सुन्दर कुमारया जन्म बिल । उबले छुइचिया खाः स्वयाः शुद्धोदन महाराजा सन्तोष जुया बिज्यात । बौम्ह राहुल कुमारया नं राज्य स्थीर याइम्ह काय् जन्म जुल धकाः खुसि जुल । थ्व समाचार न्यनाः बुद्ध राजदरबारय् बिज्यानाः छय्चिया खाः स्वयाः आशिर्वाद बियाः भोजन यानाः न्यग्रोधारामय् बिज्यानाः राहुल कुमार वइ धकाः लँ स्वयाबिज्यात । थुबले हे राहुल कुमारं थः आजु शुद्धोदन महाराजयाके बेला कयाः भगवान बुद्धयाथाय् वया पालि भवपुयाः बोधिचर्या व्रत याये धकाः इच्छा यायेव राहुल कुमारयात चूडाकर्म यानाः शुद्ध याना बिज्यात । थ्व समाचार दरबारय् थ्यनेवं शुद्धोदन महाराजा, गौतमी महारानी, यशोधरा आदि फुक्क राहुलयात स्वये धकाः न्यग्रोधारामय् बिज्याः बलय् राहुल कुमारयात खनाः विस्मय चायाः भगवान बुद्ध प्रमुख भिक्षुपिन्त वन्दना यानाः एकान्तय् बिज्यानाच्वन । थुबले भगवान बुद्ध फुक्कसित चतुआर्य सत्य धर्म आज्ञा दयेका बिज्याः बलय् सकलें बोध जुयाः थः थः गु छैय् लिहां वन ।

५३. संबुद्ध धर्मानु परिवर्त

छन्हु राहुल कुमार भिक्षा बिज्याज्यां राजद्वारय् बिज्याबलय् यशोधरां सः ताः भोजन याके धुनेवं गौतमी महारानी आदि सकलें धर्म उपदेश न्यने धकाः इच्छा यानाच्वन । राहुल कुमारं बोधिचर्या व्रत यायेगु धर्म आज्ञा दयेका बिज्याः बलय् गौतमी महारानी, यशोधरा प्रमुख मेमेपिं मिस्त बोध जुयाः त्रिरत्नया शरण वनाः चूडाकर्म यानाः बोधिचर्या व्रत याये धकाः इच्छा यानाच्वन । छन्हु यशोधरादेवी त्रिरत्नया शरण वनाः व्रत यायेत माजु गौतमी महारानीयाके बित्ति याः बिज्याः बलय् जि नं वये धकाः निम्हस्यां जुजुयाके आज्ञा कयाः बुद्धया शरणय् वनेत्यंबलय् अन्तपुरय् च्वनाच्वं पिं मिस्त नं ल्यूल्यु वल । इमित ल्यूल्यु तया यशोधरा, गौतमी महारानी न्यग्रोधारामय् थ्यंकः बिज्यात । अन भगवान बुद्धया न्ह्योने बिज्यानाः जिमित चूडाकर्म यानाः छलपोलया शासनय् दुकया बिज्याहुँ धकाः बित्ति याः गु न्यनाः निम्हेसित चूडाकर्म यानाः त्रिरत्नया भजन यानाः बोधिचर्या व्रतय् च्वं धकाः आज्ञा दयेका बिज्यात । अले मेमेपिं मिस्तय्सं नं चूडाकर्म यायेग इच्छा याः गुलिं गौतमी महारानी चूडाकर्म याना बिज्यात । थुकथं सकलें बोधिचर्या व्रतय् च्वनाच्वंगु खनाः शुद्धोदन महाराजा नापं मन्त्री, प्रजा आदिपिं नं भगवान बुद्धया शिक्षा न्यना बोधिचर्या व्रतय् च्वनाच्वन । देवदत्त छम्ह जक भगवान बुद्ध खनाः तँम्बयेकाच्वन । उकिं छन्हु देवदत्त भगवान बुद्ध व भिक्षुपिन्त निमन्त्रण यानाः विष तयाः भोजन याकल । तर सकस्यां विष शोधन यानाः जक भोजन यानाबिज्यागुलिं

सुयातं छुं मजू। ध्व खनाः देवदत्त आश्चर्य चायाच्वन। देवदत्त छम्हेसित थम्हं यानागु पाप थःत लगे जुयाः म्हुतुं लाः स्वःस्वः वयेका, म्ह छम्हं चःति वयेका बैय् ग्वाराग्वारा तुला तमाशा क्यनाच्वन। अले देवदत्तया बौ शुक्रोधनं भगवान् बुद्धया न्ह्योने वनाः मूर्खम्ह किजायात क्षमा यानाबिज्याहुँ धकाः बिन्ति यासैलि भगवान् बुद्धं पापी देवदत्तयात क्षमा याये धकाः मिखा ब्वयेमात्रं विष दक्को हरण जुल। बौम्हस्यां देवदत्तयात बोध यानाः भगवान् बुद्धया शरणय् हुँ धकाः छूवत। तर भिक्षु चर्या यायेगु इच्छा मजुयाः बुद्धयात स्यायेत मन्त्र साधन याये धकाः संन्यासी जुयाः त्रिरत्न धर्मयात निन्दा यानाः उखेंथुखें जुया सकस्यां निन्दा याकाजुल।

५४. सकलानन्द राज्याभिषेक परिवर्त

छन्हु भगवान् बुद्ध भिक्षुभिक्षुणीपिन्त जि थासंथासय् वनाः धर्म उपदेश बियाः मनूतय्त्त बोध यायेत वने त्यल धकाः आज्ञा दयेका बिज्याःगु जुजुं सियाः न्यगोघारामय् वनाः जि छम्ह दत्तले छलपोल गनं बिज्यायेमते धकाः बिन्ति यात। बौयाःखँ न्यनाः जि छगू थासय् जक च्वने धकाः बुद्ध जुयागु मखु जगत संसार हित यायेत बुद्ध जुयागु खः। छलपोलपिनि धर्म लायेगु इच्छा दःसा बुद्ध भगवानपिं सकलें बिज्याइगु चैत्य दयेका सेवा यानाबिज्याहुँ धकाः बुद्धं आज्ञा दयेकूगु न्यनाः शुद्धोदन महाराजा बोध जुयाबिज्यात। अले महाराजां बिन्ति यानाबिज्याःथें भगवान् बुद्ध थःगु सँ, लुसि बियाः पुन्हुकुन्हु चैत्य प्रतिष्ठा यानाः सकलानन्दयात नं राज्याभिषेक बिइ धकाः आज्ञा दयेका बिज्यात। शुद्धोदन महाराजां भिंगु थाय् स्वयाः बिधिं चैत्य दयेके सिधयेका कतिपुन्हुकुन्हु भगवान् बुद्ध प्रमुख भिक्षुपिं लाय्कुली बिज्याका महाराजां चैत्य प्रतिष्ठा यानाबिज्यानाः छुइचा सकलानन्दयात राज्याभिषेक बिल। थुकथं न्हय्नुहुतक लाय्कुली बिज्यानाः धर्म उपदेश बियाः सकसितं बोध यानाः च्यान्हु दुखुन्हु लुम्बिनी बिज्यायेत सकसितं आशिर्वाद बियाः भिक्षुपिं मुंकाः लाय्कुलीं पिहां बिज्यात। भगवान् बुद्ध बिज्याःगु खनाः शुद्धोदन महाराजाया नुगः मछिनाः वैराग्य चित्त उत्पन्न जुयाः फुक्क त्याग यानाः तपोवन बिज्याये धकाः बिज्यात। भगवान् बुद्ध कपिलवस्तु नगरं देव, मनुष्य, गन्धर्व, असुर सकस्यां पुजा याकाः जात्रा याकाः लुम्बिनी वनय् बिज्यात।

५५. नेपाल महात्म्य परिवर्त

लुम्बिनी वनय् थ्यंकाः सकसितं धर्म उपदेश बियाबिज्याये धुंका देवतापिं भिक्षुपिं मुंकाः श्री स्वयम्भू भगवानया दर्शन यायेत लुम्बिनी पिहां बिज्यानाः नेपालय् थ्यंकाः गोपुच्छ पर्वतय् थहां बिज्यात। अन श्री स्वयम्भू भगवान्या दर्शन यानाः

शिष्यपि मुंकाः श्री स्वयम्भू भगवान्या पश्चिम दिशाय् च्वंगु पुच्छाग्र पर्वतय् थहां बिज्यात । थुबले थन बिज्यानाच्चंम्ह मैत्री बोधिसत्त्वं नेपाल महात्म्य न्यनेगु इच्छा जुल कनाबिज्याहुँ धकाः भगवान बुद्धयात बित्ति यासेलि नेपाल महात्म्यया खँ कना बिज्यात ।

न्हापा सत्य युगय् बन्धुमति धैगु नगरय् जि सत्यधर्म धैम्ह बोधिसत्त्व धायेकाः विपस्वी तथागतया सेवा यानाच्चना । उगु इलय् नेपाल क्षेत्रय् लखं जायाः कर्कोटक आदि नागराजापि विभिन्न प्रकारया जलजन्तुं जायाः छ्चाखेर पर्वतं चाहिलाच्चंगु नागबास दह धकाः प्रसिद्ध जुयाच्चन । छन्हु विपस्वी तथागतं ध्व दहलय् खाः सिले धकाः शिष्यपि ब्वनाः वायुव्य कोणय् (जामाच्चय्) च्वंगु पर्वतय् थहां बिज्यानाः योग यानाः पलेस्वांया सकि (पुसा) वांछ्वया बिज्यात । ध्व सकिया पलेस्वां गुबले बुयावइ धकाः शिष्यपिसं बित्ति यासेलि लिपा पलेस्वां उत्पत्ति जुयाः अनं ज्योतिरूप भगवान् थःथम्हं उत्पत्ति जुइ धकाः आज्ञा दयेका बिज्यात ।

हानं द्वापर युगय् अरुण्यपुर धैगु देशय् जि क्षमंकर बोधिसत्त्व धायेकाः शिखि तथागतया सेवा यानाच्चना । थबले ध्वहे दहया दथुं पलेस्वां उत्पत्ति जुयाः पलेस्वांया दथुं श्री स्वयम्भू ज्योतिरूप थःथम्हं उत्पत्ति जुयाबिज्यात । छन्हु शिखि तथागतं श्री स्वयम्भूया दर्शन याये धकाः ध्व दहया नैऋत्यकोणय् (ध्यानाच्चय्) च्वंगु पर्वतय् थहां बिज्यानाः पलेस्वांया दथुं उत्पत्ति जुयाबिज्याम्ह श्री ज्योतिरूप भगवानयात दर्शन याना बिज्यात ।

अनं द्वापर युगय् हे मनूतय् आयु खुइद्वः जूबलय् अनुपम धैगु नगरय् जि पर्वताव्य बोधिसत्त्व धायेकाः विश्वभू तथागतया सेवा यानाच्चना । छन्हु विश्वभू तथागत श्री स्वयम्भू ज्योतिरूपया दर्शन यायेत दहया अग्नि दिशाय् (फुलोच्चय्) च्वंगु पर्वतय् थहां बिज्यानाः श्री स्वयम्भू ज्योतिरूपया दर्शन याना बिज्यात । उबले महाचीनय् मञ्जुश्री गुरुं लोकदर्शन धैगु समाधि योग यानाः बिचाः यानास्वःबलय् ध्वहे नागबास दहस पलेस्वांया दथुं श्री स्वयम्भू ज्योतिरूप उत्पत्ति जुयाबिज्याः गु खनाः लः छ्वनाछ्वत कि मनूतय्सं पुजा याइ धकाः मती तयाः श्री स्वयम्भू ज्योतिरूप दर्शन यायेत ध्व दहस थ्यंकाः स्वःबलय् दहया दथुइ पलेस्वांया दथुं श्रीज्योतिरूप प्रकाश जुयाबिज्याः गु खनाः श्री स्वयम्भूया दर्शन याना बिज्यात । कन्हय्कुन्हु मञ्जुश्री गुरु चन्द्रहास खड्ग ज्वनाः दक्षिण दिशाय् खड्गं प्रहार यानाः कर्कोटक नागराजायात बासस्थान दह छगू तयाः मेगु लः दक्को छ्वनाछ्वसेलि भूमि खनेदत । थबले मञ्जुश्री गुरुया अनुभावं पूर्व दिशां फय् वयाः पलेस्वां ग्वतुला

गोपुच्छ पर्वतय् लिधनाच्चन । थुबले गुह्येश्वरी उत्पत्ति जुयाबिज्याः गु खनाः दर्शन यानाः गोपुच्छ पर्वतय् थहां बिज्यात ।

थुकथं हे ई बिते जुजुं मनूतय् आयु पीद्वः जुयाच्चंबलय् समावति नगरय् जि ज्योतिपाल बोधिसत्व धायेका कक्रुछन्द तथागतया सेवा यानाच्चना । छन्हु श्री कक्रुछन्द तथागत शिष्यपिं मुंकाः श्री स्वयम्भु ज्योतिरूप, गुह्येश्वरीया दर्शन याना बिज्यानाः शिष्यपिसं सेवा याकाः गुह्येश्वरीदेवीया महात्म्य न्यनाः अन हे च्वना बिज्यात । थुबले श्री स्वयम्भू, श्री गुह्येश्वरी, श्री मञ्जुवज्र आदि पिनिगु प्रभावं लोक रक्षा याये धकाः अष्ट वैतराग उत्पत्ति जुयाबिज्यात । थुकथं मनूत वयाः बस्ती दयेकाः च्वंगु खनाः मन्जुदेव आचार्य मन्जुपतन धैगु नगर दयेकाः थम्हं ब्वनाहयाम्हं जुजु धर्माकरयात राज्याभिषेक बिया बिज्यात धकाः भगवान बुद्धं कना बिज्यात । अनं भगवान बुद्धं तीर्थयागु महात्म्य, उपतीर्थयागु महात्म्यया खँ आज्ञा दयेका बिज्यात ।

थुकथं हे ई बिते जुजुं मनूतय् आयु स्वीद्वः जूबलय् सोमावती धैगु नगरय् जि धर्मराज बोधिसत्व धायेका कनकमुनि तथागतया सेवा यानाच्चना । थबले काशी देशया विकशील धैगु विहारये धर्मश्री मित्र धैम्ह भिक्षुं शिष्यपिं मुंकाः श्री नामसंगीतियागु अर्थ व्याख्या यानाबिज्यात । तर द्वादशाक्षर धैगु भिंतिगः आखः या अर्थ कने मफयाः महाचीन वनाः मञ्जुश्री गुर्याके न्यने धकाः मती तयाः श्री स्वयम्भूया दर्शन याना बिज्याये धकाः उत्तर दिशा स्वया बिज्यात । अन मञ्जुश्री गुर्यात हे थनं महाचीनय् वनेगु खः ला धकाः धर्मश्री मित्रं न्यसेलि जितः हे नापलाः वःम्ह धकाः सीका मञ्जुश्री गुरुं महाचीन तापाणि थौं जिगु छैय् च्वं धकाः ब्वना यंकाः भोजन याकाः चो धकाः आज्ञा दयेका कोथाय् दुहां बिज्यात । उकुन्हु हे बहनी कलाःम्ह केशीनी देवीनाप खँ लहानाबिज्याः गु तायाः ध्वसपोल हे मञ्जुश्री खः धकाः सीका कन्हय्कुन्हु द्वादशाक्षरया अर्थ कनाबिज्याहुं धकाः धर्मश्री मित्रं बिन्ति यासेलि द्वादशाक्षरया अर्थ कनाबिज्यानाः छं थुकिया अर्थ कनीबलय् जिं नं न्यं वये । उफोस्वां ज्वनावःम्ह जि धकाः सीकि धकाः आज्ञा दयेकूगु न्यनाः थःगु विहारय् लिहां वयाः द्वादशाक्षरया व्याख्या याना बिज्यात । थुबले अघोरीया रूप कयाः उफोस्वां ज्वना बिज्याम्ह मञ्जुश्री गुर्यात नाले मछालाः मखंपहः यानाः लिपा बाखं कने धुंकाः गुर्यात नापलायेत धर्मश्री मित्र ब्वांवना गुर्यात नापलानाः छलपोल बिज्याः गु जिं मखना धकाः पालि भवपूबलय् मिखा निपां मञ्जुश्री गुर्या पालिइ कुतुंवन । लिपा जिं छलपोलयात अपराध याना क्षमा यानाबिज्याहुं धकाः बिन्ति यासेलि आवलि छं नुगलं खनी धकाः दृष्टि दान याना थनिनिसें छंगु नां

ज्ञानश्री मित्रजुल धकाः आज्ञा दयेका मञ्जुश्री गुरु अन्तरध्यान जुयाः थःगु आश्रमय् बिज्यात ।

थुकथं हे ई बिते जुजुं मनूतय् आयु निद्वः जूबलय् काश्यप तथागतया पालय् गौड धयागु नगरय् च्वंम्ह प्रचण्डदेव जुजु तीर्थ यात्रा यायां नेपालय् थ्यंकाः श्री स्वयम्भू, गुह्येश्वरीया दर्शन यानाः भिनिगू तीर्थय् बिज्यानाः स्नान यानाः अष्ट वैतराग दर्शन यानाः नेपाल त्वःता वनेगु इच्छा मजुयाः मञ्जुश्री पर्वतय् वनाः भिक्षु जुयाः शान्तिकर आचार्य धायेका धर्मधातु वागीश्वरया सेवा यानाः बिज्यानाच्वन । लिपा कलि कालय् मनूतय्सं ध्वंस याइ धकाः ल्वहतं त्वपुयाः पञ्चबुद्ध स्थापना यानाः पुच्छाग्र पर्वतय् चैत्य दयेका शान्तिपुर, बसुपु, अग्निपुर, नागपुर, वायुपुर दयेका लोक रक्षा यायेत कान्तिपुरय् दुहां बिज्यानाः समाधि योग याना बिज्यात धकाः भगवान बुद्ध आज्ञा दयेका बिज्यात ।

थथे हे ई बिते जुया ववं छकः नेपालय् न्हय्दँतक वा मगाना दुर्भिक्ष जुयाः मनूतय्सं तसकं दुःख सिल । छन्हु गुणकामदेव जुजु शान्तिपुरय् बिज्याःम्ह शान्तिकर आचार्यजुं थ्व दुर्भिक्ष शान्त यायेत नाग साधना याये माल धकाः नवनाग साधना यानाः फुक्क नागराजापिन्त पुजा यानाः थ्व नेपाल मण्डलय् वा मगाःगु यक्को दत इलय्ब्यलय् वा गाका बिज्याहुं थुकिया निंतिं छलपोलपिन्त बिज्याकागु खः धकाः शान्तिकर आचार्यजुं बिन्ति यासेलि नागराजापिं सकलें खुसि जुया याकनं वा गाका बिज्यात । थुबलेनिसें बखत बखतय् वा गानाः सुर्भिक्ष जुल ।

५६. यम नियम सुचि शान्ति परिवर्त

थुकथं भगवान बुद्ध गोपुच्छ पर्वतय् बिज्यानाः शिष्यपिन्त नेपाल महात्म्य कनाः श्री स्वयम्भू, गुह्येश्वरीया दर्शन यानाः पांचाल देशय् बिज्याःबलय् लँय् छथाय् दुष्कर चर्या याना बिज्याःम्ह बोधिसत्वयागु अस्थिपंजर स्वयेगु इच्छा दु ला धकाः भगवान बुद्ध आज्ञा दयेकूगु न्यनाः भिक्षुपिसं इच्छा दु, कनाबिज्याहुं धकाः बिन्ति यासेलि भगवान बुद्ध ल्हाःतं बँय् थियाबिज्यायेवं भूमि तज्याना लुँया चैत्य छगः पिहां वल । अले थ्व चैत्यया गर्भय् च्वंगु पाता प्वला स्वःबलय् तुयूगु अस्थिपंजर पिहां वल । भगवान बुद्ध थ्व अस्थिपंजरयात कयाः अन्त्याना बिज्यात । थ्व खनाः आनन्द भिक्षुं छलपोलं छाया थ्व अस्थिपंजरयात अन्त्याना बिज्याना धकाः बिन्ति यासेलि थ्व जिगु हे खः, पूर्व जन्मय् जि महासत्व राजकुमार धायेका थ्व थासय् च्वनाः धुंयात ला नका वयागु अस्थित दक्को स्वथनाः चैत्य दयेका गुप्त याना तल । लिपा अस्थिपंजर स्वथनाः अधिष्ठान याना बिज्यायेवं कनक चैत्य अन हे अन्तरध्यान जुयावन ।

थनं भगवान् बुद्ध भिक्षुपिं मुंकाः पोतलाक धैगु पर्वतय् बिज्यानाः देवतापिं सहित यानाः धर्म कथा आज्ञा दयेका बिज्यात । थुबले थ्व सभाय् च्वनाबिज्याःम्ह वज्रपाणि दनाः मनूतय्त च्याता प्रकारया भय दु, व भय शान्त जुइगु उपाय आज्ञा दयेका बिज्याहुँ धकाः भगवान् बुद्धयात बिन्ति यासेलि अमिताभ तथागतं आज्ञा दयेका बिज्याथें प्रणिधानयागु वंश उत्पत्ति जुयाः करुणायुक्त जुयाबिज्याःम्ह तारादेवी दु । भयं आकुल जुइबलय् सुनां वसपोलया नां काइ, वयात वसपोल रक्षा याइ धकाः आज्ञा दयेका बिज्यात । थुबले हे देवतापिं सकसिनं तथागतपिसं, बोधिसत्वपिसं आज्ञा दयेका बिज्याःगु श्री तारादेवीयागु सच्छि व च्याता नां आज्ञा दयेका बिज्याहुँ धकाः वज्रपाणिं भगवान् बुद्धयात बिन्ति यात । अले भगवान् बुद्धं वज्रपाण्यात ताराया सच्छि व च्याता नां न्यनाः अनुमोदन याःसा छिपिं सकलें निर्वाण प्राप्त याइपिं जुइ धकाः आज्ञा दयेका बिज्यात । थनं भगवान् बुद्ध श्रावस्ती-पुरया जेतवन विहारय् बिज्यात । अन सकसितं भगवान् बुद्धं मनूतय्सं याइगु यम नियम सुचि शान्तियागु मनूतय्त हित जुइगु, भी बसानिसें सीधुंकाः लिपातकं यायेमाःगु क्रिया, कर्म आज्ञा दयेका बिज्यात ।

५७. श्री शाक्यसिंह जातकमाला परिवर्त

छन्हु काश्यप भिक्षु व मेमेपिं भिक्षुपिसं छलपोलं कर्मभोग याना बिज्यानागु जातक मालायागु पुण्य कथा मानसरोवर बिज्यानाः कना बिज्याहुँ धकाः बिन्ति यासेलि भिक्षुपिं नापं देव, नाग, असुर, यक्ष आदि फुक्क मुंकाः ऋद्धिं आकाश मार्गं जेतवन विहारं उत्तर दिशाय्च्वंगु मानसरोवरय् बिज्यात । अन थ्यंकाः सभा दयेका बिज्याःबलय् अन च्वंपिं फुक्क प्राणीपिं नं भगवान् बुद्धं कनाः बिज्याइगु जातकमाला न्यने धकाः वयाच्वन । तर नन्द र उपनन्द धैपिं नागराजापिनि धाःसा छाया भगवान् बुद्ध थन बिज्यानाः जातकमाला कने धकाः बिज्यात धकाः मती तयाः मानसरोवरया दथुं द्वःछि हः दुगु रत्नया पलेस्वां उत्पत्ति यानाबिल । भगवान् बुद्ध व पलेस्वानय् च्वना बिज्यानाः भिक्षुपिन्त हलय् आसन याकाः जातकमाला कना बिज्याये त्यंबलय् शालिपुत्र मदगुलिं शालिपुत्र गृद्धकुट पर्वतय् च्वनाः चीवर सुयाच्वन सःता वा धकाः मौगल्यायनयात छ्वत । मौगल्यायन गृद्धकुट पर्वतय् वनाः निकोस्वको बिन्ति यात नं नमवासेलि गृद्धकुट पर्वतया त्वाथः ज्वनाः संकेवं व पर्वत तसकं कम्प जुयाः शालिपुत्र सुमेरु पर्वतय् बिज्यात । अन नं कम्पमान जुयाः मानसरोवर वनाः व पलेस्वां ज्वंबिज्यात । शालिपुत्र पर्वतं कुतुंबन जुइ धकाः मती तयाः भगवान् बुद्धयाथाय् बिज्यानाः भगवानया खवय् बिज्याःबलय् शालिपुत्रयात खन । थुकथं सःतःबंम्ह स्वयाः शालिपुत्र न्हापा थ्यंगुलि मेमेपिं भिक्षुपिसं थ्व गथे जुल धकाः

भगवान् बुद्धयात बिन्ति यायेवं बुद्धं ध्व जन्मय् जक शालिपुत्रं त्याकूगु मखु, न्हापा न्हापाया जन्मय् नं शालिपुत्रं मौगल्यायनयात त्याकूगु दु धकाः पूर्व कथा कना बिज्यात ।

थुबले हे काश्यप भिक्षुं भगवान् बुद्धयात छलपोलं पूर्व जन्मय् यानाबिज्यानागु जातकमालायागु खँ कना बिज्याहुँ धकाः बिन्ति यासेलि कना बिज्यात । न्हापा सुप्रभास जुजु, महासत्त्व राजुकमार, शिवि जुजु, कोशल देया जुजु, श्रेष्ठी महाजन, अतिसध्य महाजन, खराचा, अगस्त्य ऋषि, मैत्रीबल जुजु, विश्वन्तर जुजु, इन्द्र ब्राम्हण, माभि, न्या, बखुं, हँय, संन्यासि, माकः, चल्ला, क्षान्तिवादी तपश्वी, ब्रम्हलोक्य ब्राम्हण, नाग, किसि, मेय्, म्हाखा, सिंह आदि धायेका जन्म कया वया । आः ध्व जन्मय् सर्वार्थसिद्ध राजकुमार धायेका जन्म कयाः बोधिज्ञान लाना शाक्यमुनि भगवान् धायेकाः सकसितं हित यानाचवना धकाः भगवान् बुद्धं भिक्षुपिन्ति जातकमालायागु बाखं आज्ञा दयेका बिज्यात ।

५८. सक्क्यवनाबदान परिवर्त

भगवान् बुद्धं भिक्षुपिन्ति पूर्व जन्मय् यानावयागु जातकमालायागु खँ कना बिज्यायेधुंकाः भिक्षुपिं मुंकाः उरुमुण्ड धैगु पर्वतय् बिज्यानाः भविष्य कालयागु खँ कना बिज्यात । जि निर्वाण जुयाः सच्छिदै लीपा अर्हत् धायेकाः प्राणीपिन्ति हित याइम्ह उपगुप्त धैम्ह भिक्षु जुयाः ध्व पर्वतय् वास यानाचवनी । ध्वहेँ इलय् पटना शहरय् जुजुपिनि नं अधिपति जुयाबिज्याइम्ह अशोक महाराजा धायेका जन्म जुयाः चक्रवर्ती जुजु जुइ । ध्व जुजुं जिगु शरीरया धातु दक्को विस्तार यानाः सकल प्राणीपिन्ति हित यायेत नं तःधंगु कीर्ति तैम्ह जुइ । अले चय्प्यद्वः धर्म स्कन्ध स्थापना यानाः थःम्हं न्यनागु धर्म कथा सकसितं न्यंकी धकाः लीपा जुइगु खँ कनाबिज्यानाः भिक्षुपिं मुंकाः इन्द्रमाला गुफाय् बिज्यात ।

छन्हु इन्द्र देवतापिं मुंकाः सभा यानाचवबलय् इन्द्र अकस्मातं सिंहासनं कुतुं वल । थये इन्द्र सिंहासनं कुतुं वःगुलिं इन्द्रया जिगु पुण्य भोग फुत जुइ, जि स्वर्गं कुतुंवना दुःख भोग याये मालीन धकाः ख्वाः खिउँका च्वन । थुकथं थः भाःत शोक यानाचवंगुलिं शचिरानीं थुकिया उपाय याना बिज्याहुँ शोक यानाबिज्यायेमते धकाः बिन्ति यात । अय्सां इन्द्र शोक याना बिज्यागुलिं जम्बुद्विपय् सकसितं हित याना बिज्याइम्ह शाक्यसिंह बुद्ध दु धकाः शचिरानीं बिन्ति यासेलि अन हे वने धकाः देवतापिं मुंकाः इन्द्रमाला गुफाय् बिज्यानाः बुद्धयात पुजा यानाः धर्म उपदेश न्यने धकाः चवनाबिज्यात । इन्द्रया चित्त शुद्ध जूगु खनाः भगवान् बुद्धं प्यंगू आर्य सत्ययागु धर्म आज्ञा दयेका बिज्यात । अले इन्द्रं जि वयागु कारण छलपोलं सि हे स्यू जितः

रक्षा यांना बिज्याहूँ धकाः बिनित्ति यासेलि भगवान बुद्ध न्हिलाः छं ताःकालतक म्बाना चवनेगु इच्छा दुसा अपरिमिता धैगु महाविद्यायागु धारणी पाठ या । अले बोधिज्ञान लाना मोक्ष फल लाइ धकाः आज्ञा दयेका बुद्ध धारणी पाठ यांनाः कना बिज्यात ।

५९. जेतवन विहार प्रत्यागमन परिवर्त

भगवान बुद्ध इन्द्रमाला गुफां पिहां बिज्यानाः गृद्धकुट पर्वतय् बिज्यानाः बंधुनागर धैम्ह जुजुया बाखं कना बिज्यानाः अनं क्वहां बिज्यानाः वेणुवनय् दुहां बिज्यानाः भिक्षुपिं मुंकाः मभा यांना चवनाबिज्यात । थुबले देवदत्तं खनाः थ्वयात थें जितः नं माने याका चवने मफुसा प्राण त्याग यांना वने धकाः छथाय् सुलाच्वन । थ्वहे चान्हय् गृद्धकुट पर्वतय् थहां वनाः भगवान बुद्धयात स्याये धकाः तग्बःगु ल्वहं छगः कयाः प्रहार यांना हल । ल्वहं कुतुंवया भगवान बुद्धयात कये मछाला आकाशय् चाचाहिलाच्वन । थ्व खनाः भगवान बुद्ध देवदत्तं जितः स्याये धकाः प्रहार यात धकाः मती तयाः पूर्व जन्मय् जिं प्रहार यांनागुलिं थौं जितः प्रहार यांना हल भोग मयासे मगाः धकाः थःगु जवगु तुतिया म्हालापतिं फया बिज्यात । थ्वहे पचिनय् लानाः घाः जुयाः हि पिहां वल । कन्हय्खुन्हु भिक्षुपिसं भगवान बुद्धया तुती घाः जूगु खनाः छलपोलया तुती गय् घाः जुल धकाः बिनित्ति यासेलि पूर्व जन्मय् देवदत्तयात थम्हं प्रहार यांनागु कबीर कुमारयागु बाखं कना बिज्यात । थये हे राजगृह, काशी, कपिलवस्तु नगरय् धर्म उपदेश कना बिज्यानाः श्रावस्तीपुर बिज्यानाः जेतवन विहारय् दुहां बिज्यात । थ्व समाचार अनाथ पिण्ड महाजनं सिइका भगवान बुद्ध प्रमुख भिक्षुपिन्त भोजन याकाः धर्म उपदेश न्यनाः बोध जुयाच्वन ।

६०. महेश्वरादि देव समुत्पादन परिवर्त

जेतवन विहारय भगवान बुद्ध बिज्यानाच्वंगुलिं जुजु प्रजा संन्यासी आदि सकसितं इच्छा कथं वसपोलं धर्म कथा आज्ञा दयेका बिज्यानाच्वन । थुकथं ई बिते जुजुं छुन्हु सर्व निवरण विष्कंभी बोधिसत्त्वं भगवान बुद्धयात संसार सृष्टियागु बाखं कना बिज्याहूँ धकाः बिनित्ति यासेलि भगवान बुद्धं विपश्ची तथागतं आज्ञा दयेका बिज्याःथें कने धकाः कना बिज्यात । न्हापा युग आदि महाशून्य जुयाच्वन । थ्व शून्यं पञ्चमहाभूत धैगु पृथ्वी, लः, तेज, वायु, आकाश उत्पत्ति जुल । अले पञ्चमहाभूतं निरञ्जन निराकार जुयाबिज्याःम्ह आदि बुद्ध श्री अमिताभ तथागत ज्योतिस्वरूप उत्पत्ति जुया बिज्यात । अमिताभ तथागतं मनूत सृष्टि याये धकाः

लोक संसर्जन धैगु समाधि योग याना: लोकनाथ श्री करुणामययात उत्पत्ति याना बिज्यात । थ्वसपोलं लोकोत्भव धैगु समाधि योग याना बिज्याना: मिखां चन्द्रसूर्य, कपालं माहाद्यो, बोहलं चतुरमुख ब्रम्हा, नुगलं नारायण, वाभो निभोलं सरस्वती, म्हुतुं वायु देवता, पालीं पृथ्वीमाता, प्वाथं वरुण देवता, त्यफुचां अग्नि देवता, जवगु पुलीं कुबेर, देपागु पुलीं लक्ष्मी उत्पत्ति याना बिज्यात । छन्हु माहाद्यो लोकनाथया न्ह्यःने बिज्याना: नमस्कार याना: छलपोलं जिमित छाया सृष्टि याना धका: बिन्ति यासेलि लोकनाथं उत्पत्ति जूपिं फुक्क छोपिन्त सःता: छिमिसं थःथःगु ज्या याना सत्त्वप्राणीपिन्त बोधिमार्गय् तथा: पालना या धका: आज्ञा दयेका बिज्यात ।

उकिं थ्वसपोलया शरण वना: भजन या:सा दुर्गति गुबले वने मालीमखु । सतगति जन्म कया: सद्धर्म साधना याना: सिना सुखावती भुवनय् बास लाइ धका: शाक्यमुनि भगवानं सकसितं आज्ञा दयेका बिज्यात । भगवान बुद्धं कना बिज्या:गु धर्म कथा न्यना: विष्कंभी बोधिसत्त्व नापं सकले बोध जुल ।

६१. सदाप्ररूदित बोधिसत्त्व परिवर्त

छन्हु भिक्षुपिं मुना: गृद्धकुट पर्वतय् बिज्या:बलय् अन सुभुति धैम्ह भिक्षुं प्रज्ञापारमिता देवीयागु गुण महात्म्य कना बिज्याहुं धका: बिन्ति यासेलि भगवान बुद्धं अष्टसहस्रिकायागु बाखं आज्ञा दयेका बिज्यात । न्हापा सदाप्ररूदित बोधिसत्त्वं श्री प्रज्ञापारमिता देवीयागु ज्ञान गुण न्यनेगु इच्छा याना: भीष्म गर्जित निर्घोषेश्वर तथागतयाके शरण वना: गुर्यागु उपदेश न्यना: राग द्वेष मोहं वर्जित जुया: प्रज्ञापार मितायात दर्शन याये फयेमा धका: आशिका याना: देशान्तरय् वने धका: वन । गन धका: सीके मफया ववं छगू वनय् थ्यंबलय् ल: मदया: ख्वयाच्चन । थुबले हे छं धैर्य या, एकचित्त याना: पूर्व दिशा स्वया: हुं वन फोचाला मैदान ध्यनकि श्री प्रज्ञापारमिता देवीयागु खबर न्यनेदइ धका आकाशवाणी जुया: आज्ञा दयेका हल । थथे आकावाणी दय्कुथें पूर्व दिशा स्वया: ववं वन फोचाला मैदान ध्यन । थुकथं ववं च्यान्हु दसेलि बोधिसत्त्वया न्ह्यःने तथागत छम्ह बिज्याना: छं दुःख जुल धका: हरेस नय्मते थनं न्यास: योजन तापाक्क गन्धवती धैगु नगरया दथ्वी धर्मोद्गत बोधिसत्त्व बिज्याना: मनूतय्त श्री प्रज्ञापारमिता देवीयागु व्याख्या यानाबिज्याना च्वन । थ्वसपोलं छन्त श्री प्रज्ञापारमिता देवीयागु उपाय कुशल मूल धर्म कना: छंगु इच्छा पुरे यानाबी । थ्व खँ न्यना: गुबले श्री प्रज्ञापारमिता देवीयागु उपाय कुशल मूल्यगु ज्ञान न्यनेदइ धका: मती तयेमात्रं बोधिसत्त्वयात ख्वीछता

प्रकारयागु समाधि उत्पत्ति जुयावल । अले भिगू दिशाय् बिज्यानाच्चंभिं तथागतपिं बिज्यानाः छं धैर्य या, न्ह्याबलें कल्याणमित्र नाप जक सङ्गत या । छन्त उपदेश बीम्ह कल्याणमित्र धर्मोद्गत बोधिसत्व खः धकाः बोधिसत्वयात आज्ञा दयेका तथागतपिं थःथःगु थासय् लिहां बिज्यात ।

ववं छन्हु छगू नगर खने दयाः आः धर्मोद्गत बोधिसत्वयात छु ज्वना वने धकाः मती वया बजारय् वनाः जिगु ला न्याःवा धकाः हालाच्वन । थ्व खँ इन्द्र सियाः धात्थें पाइम्ह खःला स्वये धकाः भेष हिलाः परीक्षा याना स्वल । सदाप्ररूदित बोधिसत्वं धात्थें श्री प्रज्ञापारमिता देवी लुमंका प्राणया माया मकासैं जवगु लप्पा खंपाय्च्वंगु ला ध्यनाः न्ह्योने तयाबिल । थुबले अन हे झ्यालय् च्वंच्वंम्ह महाजनया म्हायाय्चं बोधिसत्वं ला ध्यनाः दुष्कर चर्या यानाच्वंगु खनाः क्वहां वयाः छाय् थथे याना बिज्याना धकाः न्येनेवं बोधिसत्वं थ्व दामं पुजा सामान न्यानाः प्रज्ञापारमिता देवीया पुजा यानाः धर्मोद्गत बोधिसत्वयात सत्कार याये धकाः थ्व ज्या यानाच्वना धकाः बोधिसत्वं आज्ञा दयेका बिज्यात । थ्व खँ न्यनाः व मिसां जितः नं थ्व धर्म यायेगु इच्छा दु । तर थज्यागु कर्म छता यानाबिज्याये मते पुजा सामानयात माक्को पुरे यानाबी छलपोलनापं जितः नं च्वनायंका बिज्याहुं धकाः व मिसां बित्ति यात । भेषधारी इन्द्र नं भेष हिलाः इन्द्रया भेषय् वयाः छंगु चित्त शुद्ध जूगु खनाः जि खुसि जुल । जितः ला हि छुं म्वाः धकाः बोधिसत्वया ला हि दक्को पुरे यानाः दिव्य देह यानाबिल । अले व महाजनया म्हायाय्चं बोधिसत्वयात थःगु छेंय् यंकाः माक्को सामान पुरे यानाबिल ।

पुजायात माःगु सामान तयार यानाः बोधिसत्व रथय् बिज्याकाः मांभौपिं न्ह्यःन्ह्यः तयाः गन्धवती नगरय् वनेत प्रस्थान यात । उकुन्हु हे गन्धवती नगरय् थ्यंकाः नगरय्च्वंगु देवालय आकारगु विहारया दथुइ धर्म उपदेश बिया बिज्यानाच्चंम्ह धर्मोद्गत बोधिसत्वयात खन । बोधिसत्व सकलें मुंकाः पुजा सामान ज्वंकाबिज्याना दर्शन याना बिज्यात । अले बोधिचर्या व्रतय् च्वनाबिज्याम्ह धकाः प्रशंसा यानाः लिपाया जन्मय् अर्हत् पद लाना सम्यक् संबुद्ध जुयाः बोधिज्ञान लाये फयेमा धकाः आशिका यानाः धर्मोद्गत बोधिसत्वया चरणकमलय् भवपुयाः ल्हाः बित्ति यानाः थःत जूगु वृत्तान्त खँ कना बिज्यात । अन धर्मोद्गत बोधिसत्वं आज्ञा दयेका बिज्याःगु धर्म न्यनाः चय्प्यद्वः प्राणीपिन्त ज्ञान उत्पत्ति जुल । अले न्हय्दंतक धर्मोद्गत बोधिसत्वं ध्यानागारय् उपाय कुशलयागु समाधि योग याना बिज्यागुलिं वसपोलयात दर्शन याये धकाः न्हय्दंतक सदाप्ररूदित बोधिसत्वं तयार यानातःगु सिंहासनय् बिज्यासैलि पुजा यानाः धर्म लाये धकाः इच्छा यानाच्वंगुलिं

श्री प्रज्ञापारमिता देवीयागु उपाय कुशलयागु धर्म व्याख्या याना बिज्यात । अले गथे सकल धर्म समान स्वरूप जुयाच्वन वथे प्रज्ञापारमिता नं समान स्वरूप खः । समान निर्मल अचल, चैतन्य स्वभाव धकाः सीकी धकाः धर्मोदगत बोधिसत्त्वं आज्ञा दयेका बिज्यात गथे आकाश, सागर, समुद्र अन्त कायेमफु अथेहे प्रज्ञापारमिता नं अन्त काये फइमखु । गथे रूप, वेदना, संज्ञा, संस्कार, विज्ञान अन्त काये मफु अथे हे प्रज्ञापारमिता नं अन्त काये फइमखु । उकिं थ्व धर्म व श्री प्रज्ञापारमिता देवी छुं फरक मदु । थ्व धर्म न्यनाः सदाप्ररूदित बोधिसत्त्व ख्वीद्वः समाधियागु ज्ञान उत्पत्ति जुयाः अनन्त ज्ञान लानाः सर्वज्ञाता जुल धकाः सकसितं आज्ञा दयेका बिज्यात ।

६२. महेश्वर उमादेवी व्याकरण परिवर्त

छन्हु जेतवन विहारय् रश्मि खयाः न्ह्यइपुसेच्वंच्वंगु खनाः सर्वनिवर्ण विष्कंभी धैम्ह बोधिसत्त्वं थ्व रश्मि गनं वल धकाः बिन्ति यासेलि भगवान बुद्धं श्री आर्यावलोकितेश्वर थन बिज्याये धकाः रश्मिं खयेकाः शुद्ध याना बिज्यात धकाः आज्ञा दयेका बिज्याःगु इलय् लोकनाथ जेतवन विहारय् दुहां बिज्यात । लोकनाथ दुने बिज्यायेवं भगवान बुद्धं कुशलवार्ता याना बिज्यात । अले थ्व लुंया पलेस्वां अमिताभ तथागतं बिया कुशल वार्ता यानाहल कयाबिज्याहुं धकाः लोकनाथं धायेवं बुद्धं पलेस्वां कयाः लोकनाथया प्रशंसा यानाः बुद्ध सुम्क च्वनाबिज्यात ।

थुबले हे माहाद्यो पार्वती नं जेतवन विहारय् बिज्यानाः भगवान बुद्धया शरणय् वनाः महायानया ज्ञान दान याना बिज्याहुं धकाः बिन्ति याना बिज्यात । थुबले भगवान बुद्धं थ्व ज्ञान न्यनेत लोकनाथया शरणय् हुं धकाः आज्ञा दयेका बिज्यायेवं माहाद्यो पार्वती लोकनाथयाथाय् बिज्यानाः पालिभ्वपुयाः प्रशंया याना बिज्यात । वसपोलपिनिगु बिन्ति कथं श्री लोकनाथं लोक रक्षाया नितिं बोधिज्ञान लायेत व्याकरण उपदेश बिया बिज्यात । अले पार्वती लोकनाथयात छलपोलं जितः मिसायागु भाव छुटे यानाः गर्भवास जुइम्वाःक तथागतपिनिगु गती छ्वया बिज्याहुं धकाः बिन्ति यासेलि लोकनाथं छुं निर्वाण यायेगु इच्छा दुसा चित्त शुद्ध यानाः अमिताभ तथागतया शरण वनाः धर्म कथा न्यनाः बोधिचर्या व्रत याःसा बोधिज्ञान लाना उमेश्वर तथागत धायेके दइ । अले हिमालय पर्वतया दक्षिण दिशाय् छंगु बुद्ध क्षेत्र जुइ । तिर्थिकपिसं छंगु धर्म प्रचार याइ धकाः लोकनाथं आज्ञा दयेका बिज्याःगु न्यनाः खुसि जुयाः नमस्कार याना बिज्यात । अले भगवान बुद्धं विष्कंभी

बोधिसत्त्वयात पार्वतीं थें छिमिसं नं लोकनाथया शरणय् वनाः बोधिचर्या व्रत याः सा बोधिज्ञान लानाः मोक्षफल लाइ धकाः आज्ञा दयेका बिज्यायेव बोधिसत्त्व प्रमुख सकलें बोध जुयाः लोकनाथया शरणय् वनाः नमस्कार यात । अले लोकनाथं नं सकसितं बोधिज्ञान लाये फयेमा धकाः आशिर्वाद बिया बिज्यात ।

६३. मायादेवी संप्रबोधन परिवर्त

छन्हु भगवान बुद्ध मौगल्यायन छम्हेसित जक धयाः स्वर्ग भुवनया नन्दन वनय् बिज्यानाः ध्यान याना बिज्यात । भगवान बुद्ध बिज्यात धैगु सियाः मायादेवीया थः काय्यात दर्शन याये धकाः नन्दन वनय् बिज्यात । कुशल वार्ता लिपा भगवान बुद्ध इन्द्र आदि सकसितं चतुरार्य सत्य व मेमेगु धर्म कथाया नापं बोधिज्ञान साधन यायेगु धर्म उपदेश बिया बिज्यात । थ्व उपदेश न्यनाः इन्द्र आदि सकलें थोपिं बोध जुयाच्वन । अले मायादेवी भगवान बुद्धयात छलपोल न्ह्याबलें थन हे बिज्याहुँ धकाः बिन्ति याय्वं भगवान बुद्धं छलपोल छम्हेसित जक उद्धार याये धकाः बुद्ध जुयागु मखु सत्त्वप्राणीपिन्त उद्धार याये धकाः बुद्ध जुयागु खः, उकिं जि थन न्ह्याबलें च्वनेमखु वर्षावास स्वला जक च्वने धकाः धया बिज्यायेवं मायादेवी सन्तोष जुयाबिज्यात । थुकथं स्वलातक नन्दन वनय् च्वनाः भगवान बुद्धं धर्म उपदेश बिया बिज्यात ।

६४. सुचन्द्रावदान परिवर्त

अनं भगवान बुद्ध कौशाबी नगरया महाजन घोषिलं दयेकातः गु घोषिला उद्यानय् बिज्यानाः धर्म उपदेश बिया बिज्यात । थुबले थ्व नगरया सुचन्द्रगृहपति धैम्ह महाजनया काय् सुनन्द धैम्हस्यां मभिपिनिगु उपदेश न्यनाः चैत्य स्यंकूगुलिं इपिं दरिद्र जुल । थ्वहे सुचन्द्रगृहपति भगवान बुद्धयाथाय् वयाः संसारे दरिद्र जुयाः दुःख सियाच्वीपिं मनूत छु याः सा धनाढ्य जुइ व उपाय कना बिज्याहुँ धकाः बिन्ति यात । थ्व खँ न्यना भगवान बुद्धं तथागतपिनि मां श्री वसुन्धरा देवीयागु धारणी ब्वनाः धारणा या । अले दरिद्र नाश जुइ धया बिज्याः गु न्यनाः थ्व महाजन बोध जुयाः व्रत याये धकाः इच्छा यात । थुकिया प्रभावं सुचन्द्रगृहपतिया भण्डार न्हापायासितं दुगछि पूर्ण जुया बल । सुचन्द्रगृहपतिया छँ वना स्वःबल्य् दक्कोभनं पूर्ण जुयाच्वंगु खनाः खुसि जुयाः बुद्धयात लुमकाः वसुन्धरा देवीया धारणी ब्वन ।

भगवान बुद्धया आज्ञा कथं सुचन्द्रगृहपतिया छँय् वनाः स्वःबिज्याः बल्य्

स्वया स्वयाथाय् सकभनं परिपूर्णं जुयाच्चंगु खनाः भगवान् बुद्धयाथाय् वयाः छु जुया
 थथे जुल छलपोलं कना बिज्याहुँ धकाः आनन्द भिक्षुं बिनित्ति यासेलि सुचन्द्रगृहपतिं
 वसुन्धरा देवीयागु धारणा याःगुलिं खः धकाः कना बिज्यात । थुकथं सुचन्द्रगृहपति
 छैँ धन सम्पत्ति सकतां नं परिपूर्णं जूगुलिं भगवान् बुद्धयाथाय् वनाः पालि भवपुयाः
 नमस्कार यानाः छलपोल प्रमुख भिक्षुपिं सकलें भोजनया निम्तिं जिगु छैँय् बिज्याहुँ
 धकाः बिनित्ति यात । ई जुइवं भगवान् बुद्धं भिक्षुपिं सकलें मुंकाः सुचन्द्रगृहपतिया
 छैँय् बिज्यानाः भोजन याना बिज्यात । भोजन सिधय्वं भगवान् बुद्धं सकसितं श्री
 वसुन्धरा देवीयागु गुण महात्म्य कनाः व्रतयागु धारणी ब्वनेगु त्वःतेमते धकाः
 उपदेश बिया बिज्यात ।

६५. निर्वाण गमन परिवर्त

घोषिला उद्यानं जेतवन विहारय् बिज्यानाः सकसितं हित जुइगु पञ्चरक्षाया
 धर्म उपदेश बियाबिज्याना च्वन । छन्हु भिक्षुपिन्त भगवान् बुद्धं थौतक जिं सकसितं
 हित याना वयाच्चवना छिमिसं नं जिगु धर्म प्रचार यानाः निर्वाण पद लायेगु स्व ।
 जिगु ज्या सिद्ध जुल हानं जन्म काये म्वायेक निर्वाण जुया वने छिमिसं जितः बेला
 बियाछ्व जि कुशीनगरय् वनेत्यल धकाः भगवान् बुद्धं धयाबिज्याय् आनन्द भिक्षु
 ख्वयाबिज्यागुलिं ख्वयेमते धकाः धयाबिज्यानाः कुशीनगरय् बिज्यात । श्रावस्तीपुर
 त्वःताः मगधं वैशाली अम्बपालिया बगिचाय् बिज्यात । अम्बपालिं भगवान् बुद्ध
 बिज्याःगु खनाः खुसि जुयाः भगवान् बुद्ध प्रमुख भिक्षुपिन्त भोजन याकल । अतं
 गामंगामं बिज्याज्यां पांचाग्राम आम्रवनय् बिज्यात । थन वनय् च्वनाच्चंम्ह चुन्दा
 धैम्ह मिसां भगवान् बुद्ध बिज्याःगु खनाः भोजन याके धकाः जाकि महि छुनाः भोजन
 याकल । तर थ्व भोजन यायेधुंकाः भगवान् बुद्धया शरीरय् रोग प्रवेश जुल । थःत
 म्हसुख मदुगुलिं बुद्ध याकनं कुशीनगरय् बिज्याये धकाः बिज्यात । चुन्दां तःधंगु
 पुण्य यात, वं प्रदान याःगु भोजनं मृत्यु जुयाः निर्वाण पद लाना वने धयाब्यु धकाः
 आनन्दयात धया बिज्यात । थनं कुशीनगरया लिक्क च्वंगु सालवृक्षया वनय्
 बिज्यानाः सालवृक्षया क्वय् विश्राम याना बिज्यानाः उपदेश बियाः गुथाय्तक जि
 शिष्यपिसं शुद्ध आचरण यानाः सत्मार्गय् चले यानाच्चनी उबलेतक जिगु धर्म पृथ्वी
 दक्कोभनं प्रचार जुयाच्चनी । न्याद्वदँ लिपा थ्व धर्म लोप जुयावनी । तर उबले मैत्री
 बोधिसत्वं मल्ल जुजुयागु कुलय् जन्म जुयाः जिगु धर्म हानं प्रचार याइ धकाः
 भगवान् बुद्धं भिक्षुपिन्त कना बिज्यात ।

कन्हय्खुन्हु भगवान बुद्धं फुक्कसितं न्ह्योने तयाः छिमिके छुं सन्देह जूसा न्यं धकाः धया बिज्यायेवं आनन्द भिक्षुं बुद्ध धर्म संघ प्रति जिमि हामो छगः प्रमाणं शंखा मदु धकाः बित्ति यासैलि छिमिसं सत्य व धर्म निता पालन यानाः मोक्ष वनेगु ज्या या धकाः धया बिज्यानाः समाधि योग याना बिज्यात । थुबले शालिपुत्र व मौगल्यायन निम्हस्यां समाधि योग यानाः देह त्याग यानाः मोक्ष पद लाना बिज्यात । अनं भगवान बुद्धया मां गौतमी, कलाः यशोधरा, काय् राहुलभद्रपिसं समाधि योग यानाः देहत्याग यानाः मोक्ष पद लाना बिज्यात । भगवान बुद्धं थुखुन्हुया चा बिते जुयाः सुथसिया प्रहरे चतुर्थ योग यानाः देह त्वःताः निर्वाण जुया बिज्यात । अले भिक्षुपिसं सकसितं बोध यानाः भगवान बुद्धया अग्नि संस्कार याना बिज्यात । देह भस्म जुयावंसैलि अस्थिक्रिया च्या भाग यानाः च्याम्ह जुजुपिसं यंकल, ल्यं दुगु तीर्थय् यंकाः चुइका बिज्यात । फुक्क जुजुपिसं भगवान बुद्धया अस्थि ज्वनाः थःथःगु राज्यय् बिज्यानाः अस्थि गर्भय् तयाः चैत्य दयेकाः पुजा याना तल ।

६६. निगम परिवर्त*

भगवान बुद्धं ललितविस्तर महायान सूत्र धर्म देशना याना बिज्याः बलय् तथागतं अधिष्ठान यानातः गु धर्म पर्यायया खँ न्यनेत १८ गू भुवनया देवपुत्रपिं तथागतया धर्मचक्र प्रवर्तन याः बलय् क्वहां वयाः न्यनाच्चन । भगवान बुद्धं थिपिं देवपुत्रपिन्त सःता थ्व ललितविस्तर धर्म पर्याय महावैपुल्य सूत्र बोधिसत्व विक्रिदित धैपिं सकस्यां बुद्धया विषय सिइके माः गु ललितविस्तरय् प्रवेश जुइगु धर्म तथागतया वचन खः धकाः कना बिज्यात । थ्व ललितविस्तरया धर्म पर्याय ज्ञानयात सुनां ग्रहण याइ वयात च्याता प्रकारं धर्म लाभ जुइ । सुनां थ्व ललितविस्तर पर्याय व्याख्या यानाः कनीम्हेसित आदर तयाः कंकी वयात च्याता प्रकारया आसन प्राप्त जुइ । अले सुनां थ्व ललितविस्तरया धर्म पर्याय भाषण याः म्हेसित साधुकर बी वया च्याता प्रकारं वचन शुद्ध जुइ । हानं सुनां थ्व ललितविस्तरया धर्म पर्याय च्वयाः धारणा याइ, माने याइ, पुजा याइ, वया च्याता प्रकारं महानिधान जुइ । अले सुनां थ्व ललितविस्तरया धर्म पर्याय भिंक रक्षा याना धारणा याइ वया च्याता प्रकारया सम्भारं पूर्ण जुइ । सुनां थ्व ललितविस्तर धर्म पर्याय मेपिन्त मद्रंक कनाः प्रकाश याइ वयात च्याता महापुण्य लाभ जुइ । हानं सुनां थ्व ललितविस्तर धर्म कंगु एकचित्त यानाः न्यनी, न्यंकी वया च्यागू प्रकारं चित्त निर्मल जुइ । गुगु थासय् थ्व ललितविस्तरया धर्म पर्याय प्रचार याइ व थासय् च्याता भय दइमखु । थुकथं तथागतया शील समाधि, प्रज्ञा विमुक्ति ज्ञान दर्शन यायेगु दुर्लभ जुइगुलिं सुनां थ्व

ललितविस्तरया धर्म पर्याय ब्वनी, ब्वंकी, च्वइ, च्वकी सकभनं प्रचार याकी वयात
तसकं उद्धारगु धर्म लाभ जुइ धकाः अनं भगवान् बुद्धं आयुष्मान् महाकाश्यप,
आनन्द, मैत्री बोधिसत्व, महासत्वपिन्त सःताः जिं यक्को कोसिस याना अनुत्तः
सम्यक् संबोधि ज्ञान लानागु खः, ध्व धर्म जिं छिमिगु ल्हाःतय् त्वःता बीधुन, छिमिसं
धारणा यानाः मेपिन्त नं कनाः ध्व धर्म प्रकाश या धकाः धया बिज्यात । लिपा
ध्व हे खँ उपगुप्त भिक्षु पटना शहरया कुक्कुटाराम विहारय् बिज्यानाः अशोक
महाराजा व मेमेपिन्त कना बिज्याःगु खः ।



(*च्वय् बियागु निगम परिवर्त छंगू निष्ठानन्द वज्राचार्यया मूल ललितविस्तर सफुती
दुध्याकातःगु मदु । ध्व निगम परिवर्त मीनबहादुर शाक्यजुं सम्पादन यानादीगु निष्ठानन्द
वज्राचार्यया ललितविस्तर सफुतिं लिक्कागु खः ।)



ने. सं. १०९८ य् अर्थशास्त्रय् एम. ए.
 क्वचायेका ने.सं. १११० य् नेपालभाषाय्
 एम.ए. यानाद्य्मह प्रेमहिरा तुलाधरजु यात दकल्य्
 न्हापां पद्म कन्या क्याम्पसया उपप्राध्यापक कथं
 म्हसीकाम्ह मय्जु तुलाधर ने.सं. १०७५ सालय् मरु
 पीगननी अबुजु नीलवीरसिं ताम्राकार मां हेरालानी
 ताम्राकारया म्हयाय् थौकन्हे असं, बालकुमारीया
 खापामदु दुवातय् भाजु सर्वज्ञ रत्न तुलाधरया जीवन
 पासो आदर्स छेंया भौमचाय् जक लुदना चवनेगु वय्कःया
 जीवनया आजु मखु ।

धर्म, जाति संस्कृति व थः माँभाय् त्वःताः थःयात तंकावनाच्वंगु इलय्
 च्याःगु मतजला शसक्तिकरणया छकचा नेपालभाषा मिसां खलःया दुजः खः
 प्रेमहिरा तुलाधर ।

सरल, सहिष्णुता, कोमल, मिलनसार स्वभावय् ब्वलनाच्वंगु वय्कःया
 म्हसीकाय् जिं खंकाच्वना नेपालभाषा साहित्यया संरचनाय् अति आवश्यकता
 तायेका च्वंगु अनुसन्धानया ख्यलय् नेपालभाषा पुनर्जागरणया सिसिथां
 निष्ठानन्द बज्राचार्यया बृहत “ललितविस्तर” यात “इलं ल्हयया
 ललितविस्तर” नामं नेपालभाषा गद्य साहित्यय् जक मखु बौद्ध धर्मया
 बःचाधंगु क्यानभास दुने Landscape या रुपय् न्ह्यब्वये फुगु विशेषता हे
 मय्जु प्रेमहिरा तुलाधरजुया म्हसीका खः । श्वयां छतं च्वय् सललं न्हयाःगु
 भाषा शैली “मतयाः छगू लुमन्ति” “असंभलु अजिमायाथाय् तायमालं छाये
 पिडुगु”, “असनय् छःल्वाकेगु जात्रा” आदि च्वखं अनुसन्धानात्मक खुबिया
 थूर खः प्रेमहिरा ।

च्वसां न्ह्यब्वःमह प्रेमहिरा “सन्ध्या टाइम्स”, “विश्वभूमि”, “पलेस्वाँ”,
 “पौभा”, “त्रिबोधि”, “चकना” आदि पत्रिकाय् चकनाः न्यना वनाच्वंथे
 गद्यगुरु निष्ठानन्दजुया गद्यरूप व बौद्धधर्मया सविस्तरय् तं पलाः
 च्वयेकायंकातु च्वनी ।

परिमार्जित जीवन अभियानया लँपुइ आदर्श छेंयाजः शिक्षा धर्म व भाषा
 फुक्क छथाय् मुंकाः जिं म्हसीका च्वना प्रेमहिरा उर्जा खः, मतजला कन्हे
 न्यनीगु जः जुया ।

अस्तु ।

पुष्प चित्रकार